



Boston Public Library

PURCHASED FROM THE

Maria Whitney

MEMORIAL FUND ESTABLISHED BY

James Lyman Whitney

BIBLIOGRAPHER

AND SOMETIME LIBRARIAN

27658

Stamps
all of



Digitized by the Internet Archive
in 2012 with funding from
Boston Public Library

<http://archive.org/details/charitableremons00morg>

1. Caton Chrestien, au Cardinal de Richelieu.
2. Francois Fidele, contre M^{rs} des Montagnes.
3. Lettre au Roy Louis 13^{me} par la Reine sa Mere.
4. Lettre de la Reine mere du Roy Louis 13^{me} a Messieurs
du Parlement de Paris.
5. Nicoleon d'Eleouville.

11.

CHARITABLE
REMONSTRANCE
DE
CATON CHRESTIEN
A MONSEIGNEVR
L'EMINENTISSIME
CARDINAL
DE RICHELIEV

*Sur ses actions, & quatre libelles diffamatoires,
faicts par luy ou ses escriuains.*

M. DC. XXXI.

RB DC 123. 9. R5 m62

1631

THE HISTORY OF

THE CITY OF

NEW YORK

FROM THE FIRST

SETTLEMENT

TO THE PRESENT

STATE

OF THE

BY

CHARITABLE
REMONSTRANCE
DE
CATON CHRESTIEN
AV CARDINAL
DE RICHELIEV.



OSTRE Eminence, qui a dans le
loisir de sa ieunesse leu autant
d'Histoires, comme elle en a faict
depuis quelques années, aura peut
estre remarqué celle d'un Ora-
teur Romain, qui par l'effort d'une grande ma-
ladie perdit tellement la memoire, qu'il ne se
souuenoit plus de son extraction, de sa qualité,
ny mesme de son nom. Ce rencontre nous faict
voir que l'homme, qui s'estime beaucoup, est
fort peu de chose; puis que son cerueau, qui est
le lieu où l'ame exerce ses plus hautes fonctions,

est aysement destriqué; & qu'un petit changement de temperament naturel, faict non seulement, que ses actions ne sont plus raisonnables, mais les rauale au deffous des bestes, qui ont quelque souuenance de ce qui leur a esté fauorable, ou contraire. L'ambition, qui est la plus violente maladie de nostre esprit, nous ayant ietté dans des syncopes si estranges, que les plus sages & plus sçauans medecins de l'ame n'y cognoissent rien, nous oste en fin la memoire de ce que nous auons esté, de ce que nous sommes, & de ce que nous pouuons estre. C'est cette fieure ardente, qui a effacé toutes les especes, non seulement de ce que l'estude vous a enseigné, mais de ce que la nature vous a donné. Il est vray, qu'ayant tant de noms & de qualitez qu'à grand peine les peut on retenir, estant Iean Armand du Plessis, de Richelieu, Cardinal, premier Ministre, Admiral, Connestable, Chancelier, Garde des seaux, Surintendant des Finances, Grand maitre de l'Artillerie, Secretaire d'Estat, Duc & Pair, Gouverneur de trente places, Abbé d'autant d'Abbayes, Capitaine de deux cens hōmes d'armes,

d'armes, & d'autant de cheuaux legers ; estant contrainct de comprendre par vn &c. le reste de vos tiltres ; il y a moins de subiect de s'estonner de vostre oubliance, que de celle de Messala Coruinus . Outre cela vous auez eu tant de noms, que les nouueaux vous ont faict oublier les anciens . Nous auons apperceu que vous auez quitté Iean pour Armand , parce que vous ne voulez pas estre semblable au Précurseur de nostre Seigneur , mais vous desirez d'estre luy mesme ; & que le nom d'Armand qui approche des armes que vous aymez, ou d'Aman que vous imitez, vous est plus agreable que celuy de Iean, qui est vn Sainct qui annonçoit la paix & la grace de Dieu . Si Armand vous a faict oublier Iean , Richelieu vous a faict quitter le Plessis . Le nom que vous auez retenu, est non seulement plus noble, mais encore plus riche : & vous auez raison de faire chasser le vieux qui estoit trop cognu dans les actes publics, par celuy qui est entré le dernier dans vostre maison . C'est la raison, qui vous a porté à baptizer plus tost M^r vostre frere Cardinal de Lyon, que de

luy donner le nom de vostre famille; ayant iugé prudemment, qu'on trouueroit plustost Lyon, qui est vne grande ville ; que vostre Pleffis , qui ne fut iamais ny village, ny bourg. Vous n'auiez dans vostre esprit que Richelieu , que vous auez rendu riche de pauure , ayant conuertit en Duché & Pairie , vn petit fief releuant d'une Baronnie voisine , apres que vous auez vni tout le pays d'alentour , & le lieu mesme qui vous rendoit vassal. Vostre bastiment faict sur le modele de celuy de la Roynne Mere, plustost acheué, plus richement meublé, mieux accompagné de canaux , parterres, terrasses, & grand parc, vous a tellement agréé, que pour le rendre riche vous auez mis la pauureté par tout. Vous auez abbaissé toutes les grandeurs de la France, pour releuer vostre nom , & pour vous en souuenir , vous auez oublié, Premièrement, qu'il y a vn Dieu

Prou. 17. *qui a dict , que celuy qui esleue trop son edifice ,*
 Iacob. 4. *cherche la ruine . qu'il resiste aux superbes. qu'il*
 Ierem. 22 *destruiet les maisons dressees avec iniustice . qu'il*
 Iob 27. *dissipe les biens des violents . qu'il faict fondre*
 Sap. 16. *comme la glace les esperances des ingrats . qu'il iette*
 Prou. 17. *le*

le mal dans la famille de celui qui le rend pour le
 bien . qu'il oste sa benediction à l'heritage qu'on Prou. 20.
 acquiert avec trop de precipitation . qu'il faict si Psal. 36.
 nous voyons en passant l'impie esleué comme le
 cedre du Liban , qu'en repassant nous ne le voyons
 plus . qu'il renuerse les thrônes des Capitaines or- Eccli. 10.
 gueillieux, & met les doux en leur place . qu'il cache Iob 40.
 dans la poussiere les insolents . qu'il rend captifs les Iob 12.
 mauvais Prestres, suplante les Chefs des Conseils des
 Roys, leur ceinct les reins avec une corde , leur enuoye Isa. 19, &
 l'esprit d'assoupissement, & de vertigo, surprend les Iob 5.
 rusez dans leurs ruses, & les faict tomber dans la Psal. 7.
 fosse qu'ils ont preparé pour les innocens . Vous
 avez oublié la Theologie en laquelle vous estes
 Bachelier , & les predications que vous avez
 faict autresfois à saint André des Arcs , si
 vous n'avez plus de memoire de ces belles sen-
 tences de l'Escripture sainte . Mais , comment
 auriez vous souuenance de ce qui est escrit
 dans le liure de Dieu , ayant perdu celle de la
 nature , qui vous aduertit tous les iours par
 les infirmités , & les frequents remedes que
 vous prenez, de ce que vous estes ? Il ne faut
 point

point de valet de chambre qui vous crie tous les matins (comme on faisoit au Roy de Perse) Souuenez vous que vous estes homme ; puis que les maux de teste, les ardeurs du sang, les fieures de lyon, qui ne vous quittent point, les firingues, les lancetes, & les baignoires vous donnent aduis, non seulement que vous estes mortel, mais que vous possédez la vie avec des conditions onereuses. Vos ennemis pourroient dire, que vous estes semblable aux malins esprits, qui ne prennent point de diuertissement dans leurs peines ordinaires, qu'en faisant du mal aux hommes.

Il n'est pas possible que vous croyez que vostre vie soit bornée; qu'elle soit non seulement fragile, mais entre les plus foibles, dans les dangers communs à tous les hommes, & qu'elle en prouoque de très-particuliers: que les années la doiuent finir, & les violences la peuuent abreger: que vous estes guetté par tous les accidens du monde, & par tous les ressentimens des maux que vous auez faiât aux Grands, qui ont la puissance de vous faire perir; & aux petits, qui en ont la

la volonté , & qui nonobstant vos gardes seront maistres de vostre vie, lors qu'ils voudront abandonner la leur . Ne considererez vous iamais, que les iours que vous destinez à la ruine de cent mille personnes , peuuent estre au dela des vostres? que le temps qui vous flatte en vous promettant la mort de vos ennemis, leur fera voir vostre enterrement ? & que les saisons & les occasions que vous attendez , & sçavez si bien ordonner & ranger, pour adiouster tous les iours des nouveaux appuis à vostre grandeur, & à l'acheminement du principal dessein qui tend à la Souueraineté, ou du tout, ou d'une bonne partie, verront la pourriture de vos os ? Il n'est pas possible, que vostre Eminence n'aye oublié les conditions avec lesquelles Dieu vous a donné la vie, faisant si bon marché , comme vous faictes, de celle d'autrui . Le grand soing que vous prenez pour vous faire garder , vous persuade, que vostre fin ne pouuant arriuer par les violences du dehors , vous estes aussi exempt de celle qui vient du temperement du dedans . Vous croyez que vostre prudence, ou finesse , a fermé toutes

les portes, par lesquelles la mort ou les ruines sont entrées, pour faire perir ceux qui ont en quelque façon approché de vostre autorité : mais vous ne sçavez pas, que si vous avez mille artifices pour vous establir, Dieu a vne infinité de moyens pour vous perdre ; & que ceux là mesme, que vous prenez pour vous affermir, sont ceux qui vous affoiblissent, & qui n'empeschent & ne reculent pas vostre cheute, mais l'aduancent & la rendent plus grande, parce que vous tomberez avec vne charge plus pesante.

Vous faictes toutes les sepmaines quelque progres, & vous vous hastez tant que vous pouvez pour monter au sommet de la felicité : lors que vous y serez, vous n'aurez plus qu'à faire le faut. Il n'y a point d'estat de consistance en ce monde : l'homme qui y est arriué à ses plus grandes forces, commence à les perdre : les fruiçts apres la maturité se destachent des arbres ; ceux qui viennent promptement, se pourrissent bien tost : & ce que la nature a voulu conseruer long temps, comme l'or & les diamans, elle l'a faict avec beaucoup d'années. Vous ne considerez
pas,

pas, qu'on va aux grandes puissances par des chemins estroicts & difficiles, mais qu'il n'y en a du tout point pour la retraicte: que cette fortune malicieuse, qui taille les degrez pour nous faire aller au plus haut, les rompt apres que nous sommes passez; & nous faict voir non pas vne descente là où nous auions trouué vne montée, mais vn precipice. Il n'y a qu'une minute entre les caresses des Empereurs, la con-
Scian,
Aman,
Ruffin,
Bellisat-
re.
 duiete de leurs Estats, des richesses prodigieuses, & les commandemens des armées, & vn croc pour estre traifné dans vne ville, vne potence pour estre pendu, cent mille picques & autant d'espées pour estre mis en pieces, & vn chemin public pour mandier son pain.

C'est la nature du monde, qui suit les ordres de la Prouidence, que vostre prudence ne peut changer, & que vos artifices n'arresteront pas. Ceux qui s'y opposent, sont plustost & plus violemment emportez, & meritent d'auoir non seulement le nom de meschans, mais encore d'insensez. Dieu se mocque d'eux, comme nous ferions de ceux qui voudroient faire vne digue

au milieu de l'Ocean, qui entreprendroient de renuoyer les grandes riuieres à leur source, ou avec leur petit soufflé arrester vne tempeste, pousée par vn vent impetueux. Quand vous n'aurez rien leu dans les liures que vous auez feüilleté autresfois, & que les grandes affaires que vous auez traicté depuis peu, vous auroient faict oublier ce que l'estude vous auoit enseigné; vous deuriez vous souuenir, que sur le theatre où vous estes vous auez veu vne mort violente, & vne naturele, qui ont arresté le cours de deux grandes felicitez. A la verité, elles ne se peuuent comparer à la vostre: mais prenez garde aussi que vos appuis ne vous chargent trop; & que le respect qu'on peut porter à vostre Pourpre, ne vous exempte pas d'affliction, mais la rende plus longue.

C'est ce qui m'a poussé à vous représenter, que vous n'auez pas seulement oublié vostre nom, vostre naissance, & vostre nature, mais encore vos qualitez. Les plus releuées & les plus sainctes, sont celles de Prestre, d'Euesque, & de Cardinal. La Prestrise vous deuroit faire souuenir,

uenir , que tout ainsi qu'elle est vne ambassade ^{2. Cor. 5.}
 enuers Dieu, pour implorer sa misericorde pour
 les pechez du peuple; ainsi elle vous donne l'au-
 thorité de prescher au Roy la clemence, & de
 le supplier d'vser souuent de cette belle vertu
 Royale. Vous pouuez & deuez, ayant le cha-
 ractere du Sacerdoce , retirer quelquefois du
 supplice les criminels qui n'ont point failli con-
 tre l'Estat, mais contre vous; & estes obligé d'ap-
 païser la cholere du Roy, s'il est plus irrité pour
 vostre interest, que pour le sien. Vous aurez peut
 estre leu dans les Prouerbes de Salomon cette
 belle sentence: *Delure ceux qui sont menez, à la* ^{Prou. 24.}
mort. S. Ambroise dict: *Toy qui es Prestre, re-* ^{D. Am-}
tire par tes prieres enuers Dieu, & par tes supplica- ^{brof. in}
tions & faueurs enuers les hommes, ceux qui sont ^{Pfal. 114.}
conduicts à vne fin ignominieuse. Ce que vous pra- ^{Serm. 8.}
 ctiquez tous les iours, est bien esloigné de ce qui ^{Eripe eū}
 vous est cōmandé par l'Escripture saine, & con- ^{qui duci-}
 seillé par les Saincts. Il semble qu'il n'y a plus de ^{tur ad}
 crime de leze Maïesté, que celui qui vous offen- ^{mortem;}
 ce: vous remplissez de ceux qui vous ont despleu ^{hoc est, e-}
 les prisons d'Estat, & les rendez vne peine per- ^{ripe eum}
^{interces-}
^{sione, eri-}
^{pe gratiā}
^{tu Sacer-}
^{dos.}

petuelle : celles là n'estant point suffisantes pour
 retenir le grand nombre de vos ennemis, vous en
 employez qui n'ont iamais serui à ces vsages; cō-
 me la tour de la Porte neufue, afin que le Louure,
 qui est vne maison d'asile & de grace, soit des-
 honoré par l'infamie d'un cachot qui le tou-
 che; & que de la galerie qui va aux Thuilleries,
 on puisse entendre les cris lamentables de ceux
 qui sont dans les tenebres, & dans les fers. Vous
 transportez, & esgarez sans forme de Iustice,
 ceux qui ont esté quelque temps dans la Bastille:
 vous ostez à leurs amis la cognoissance du lieu
 où ils sont, & où vous auez dessein de les faire
 languir & sentir vne longue mort: vous sçavez
 qui sont ceux que vous retenez dans le chasteau
 d'Angers, & ailleurs. Tant s'en faut, qu'en fai-
 sant l'office d'un bon Prestre, vous taschiez de
 donner la vie & la liberté à ceux que vostre cho-
 lere & vostre ambition ont rendus criminels, ou
 persuadé qu'ils le sont; que non seulement vostre
 puissance, mais vostre industrie s'employe tous
 les iours pour les faire perir. Nous dirons vne
 chose horrible, mais veritable, & que vous ne
 sçauriez

ſçauriez auoir denié ny deſguiſé. Vous ſçauiez ce que vous pratiquez ordinairement pour ietter dans les pieges de la mort & de l'infamie, ceux qui par vos pourſuittes & pour vos intereſts ſont dans les priſons. Vous qui eſtes en effect leur partie, les viſitez en habit deſguiſé, ou les faiçtes caioler par les voſtres, ſur tout par deux Dames qui vous ſont fort acquiſes, & par voſtre Capitaine de la Baſtille. Ce que ie diray, eſt bien plus eſtrange: c'eſt que de voſtre authorité particuliere vous enuoyez querir la nuit dans des carroſſes ces pauures miſerables; vous leur faiçtes des grandes proteſtations de compaſſion, d'affection & de deſir de leur deliurance, que vous leur promettez à foy de Preſtre, & de Gentilhomme, s'ils veulent dire ce que vous leur ſugerez, & charger des perſonnes que vous deſirez ou perdre, ou des-honorer: & comme il faut aduoüer que la nature vous a donné des grands aduantages pour la viuacité d'eſprit, & facilité de la parole, vous eniolez tellement ces pauures gens, qu'eſtans ennuyez de leur longue captiuité, ſurpris par voſtre beau langage,

ge, attirez par vos feintes douceurs, quelquesfois accompagnées de larmes, assurez par vos sermens, & par les promesses non seulement d'impunité, mais de grandes recompenses; ne se pouuans imaginer, qu'un homme de vostre profession soit meschant iusques au point que vous l'estes; ils disent cent fois plus qu'ils ne sçauent, & deuant des tefmoins cachez: ils se mettent la corde au col, & attirent dans leur ruine ceux auxquels vous desirez d'oster ou la vie, ou la reputation. Vous ne pouuez nier, que vous n'en ayez vsé ainsi à l'endroit de Chalais, que vous auez veu souuent en prison; enuers Rodin, que vous auez faict mettre aux galleres; enuers Marcel, Vaultier, Senel, du Val, & plusieurs autres, que vous auez faict amener chez vous de nuit: ayant faict tout ce que vous auez peu, tantost par esperances, tantost par menaces, pour faire dire aux trois derniers quelque chose contre la Royne Mere du Roy, ou contre Monsieur; afin d'auoir vn moyen de les ruiner dans l'esprit de sa Maiesté, & de les diffamer dans le public. Voila les detestables artifices que vous pratiquez,

quez , bien esloignez de la qualité de Prestre , qui doit plustost rompre les pieges qu'on a dresfé aux malheureux , que d'en faire pour les surprendre, & pour vous en desfaire, afin d'etoufer la cognoissance de vostre procedé, & deshonnorer les innocens. Ainsi, vous estes partie, examinateur, commissaire, & iuge de ceux que vous desirez de perdre . Vous faictes dauantage; car vous les rendez criminels par la confession d'un peché qu'ils n'ont pas commis , & les portez à mentir , non seulement contre leur conscience, en accusant les gens de bien; mais contre leur vie, en se recognoissans coupables.

Vous ne sçauriez auoir oublié que vous estes Prestre, & vous souuenir que vous estes Euesque; cette qualité est appuyée sur l'autre. Je vous proposeray l'exēple d'un Prince & Pere des Pasteurs & des Euesques, qui est S. Gregoire; afin que vous recognoissiez combien vous estes esloigné de ses mœurs , & de vostre condition. Ce bon Pape disoit : *Si ie me voulois mesler dans la mort des Lombards , il est certain que cette nation n'auroit point de Roy , ny de Capitaine : mais parce que ie* Gregor.
in Epi-
stolis.

C

crains

crains Dieu, i'ay vne grande apprehension de m'em-
barrasser dans la mort de qui que ce soit . Helas !
 Monsieur, pourrez vous iamais dire les paroles
 de ce Sainct, vous qui estes coupable de la mort
 de plus de deux millions d'hommes, sans com-
 pter ceux qui ont esté egorgez pour teindre vo-
 stre chapeau avec leur sang, ny ceux que vous
 avez mis entre les mains des bourreaux, & faict
 mourir en prison ? Vous aurez, peut-estre, leu vn
 Dialogue feint, qui faict trouuer vne grande ar-
 mée de morts à la suite d'un Prelat, qui se presen-
 toit à la porte du paradis, d'où il fut chassé igno-
 minieusement par saint Pierre. Si l'Allemand,
 qui composa cette raillerie, viuoit au temps de
 vostre deces, il auroit vn beau subiect pour faire
 paroistre les inuentions de son esprit, & mon-
 strer que le vostre a esté trop guerrier pour vn
 homme de condition Episcopale, que vous
 exercez si rarement, qu'il ne faut pas trouuer es-
 trange si vous en avez perdu la souuenance, qui
 vous a quitté avec l'habit violet.

C'est encore vn plus grand subiect d'estonne-
 ment, que vous ayez oublié, que la couleur que

vous

vous portez est celle du Sang du Fils de Dieu, sur lequel son Eglise est fondée, en laquelle vous tenez rang de Prince, mais pacifique. Vostre liurée est celle du feu de la charité, non du feu de la guerre, comme vous vous estes imaginé, & que nous recognoissons dans vostre conduicte. L'escarlate vous remet en memoire, que vous deuez chercher les occasions du martyre pour la verité & pour la iustice: au contraire, vous le faictes trouuer à la verité & à la iustice, lors que vous bannissez, emprisonnez, & faictes mourir ceux qui les soustiennent. Vous protestates à la Royne Mere du Roy, en la remerciant des grandes instances & despèces, qu'elle auoit faict pour vous procurer la Pourpre sacrée; que vous ne la porteriez iamais, que pour vous faire souuenir de l'obligation que vous auiez de respendre vostre sang pour elle. Vos actions ont faict voir, que le credit, que cette dignité & les soins de vostre bonne Maistresse vous ont acquis, a esté employé, non pour vous disposer à verser vostre sang pour son seruice, & pour tesmoigner vostre recognoissance; mais pour tirer, si vous pouuiez, celuy de

ses veines , comme vous auez faict les larmes de ses yeux . C'est en quoy vostre ingratitude paroist extreme , & vous est reprochée par l'habit que vous prenez tous les iours . Mais il ne faut pas s'esmerueiller , si vostre pourpre n'a pas assez de force pour vous faire souuenir de la Maistresse qui vous l'a procurée , puis qu'elle n'a pas le pouuoir de vous remettre en memoire l'Eglise qui vous l'a donnée , laquelle par cette couleur rouge vous exhorte à l'amour de Dieu , & de vostre prochain ; au lieu qu'il semble qu'elle vous effarouche comme vn taureau , & vous faict hurter teste baissée , non seulement tous ceux que vous rencontrez dans vostre chemin , mais les Maistres qui vous ont nourry .

Je recherchois ces iours passez d'où procedoit cette furie & fieure phrenetique , qui a produict en vous vne si grande oubliance de vostre nom , de vostre naissance , de vostre nature mortelle & fragile , de la Prestriſe , de l'Episcopat , & du Cardinalat ; vous laissant à penser , si ayant perdu la souuenance de toutes ces choses , on peut croire que vous ayez retenu celle de Dieu .

Je

Je croyois au commencement que quelque magicien vous auoit enchanté, & lié les plus nobles facultez de l'ame, ou qu'un negromancien vous auoit faict apporter de l'autre monde de l'eau du Lethe, & vous en auoit faict boire par surprise, ou qu'un droguiste Oriental, ayant trouué le Lothos d'Homere, vous en auoit faict part, & que par mesgarde vous l'auiez mangé, comme fit Vlisse: mais en fin i'ay trouué trois causes, qui sont, selon mon aduis, les plus certaines. Et afin que ie ne me rende pas vostre semblable, ie ne desroberay rien à mes Maistres, & confesse-
 ray librement que Seneque m'a appris la premiere, lors qu'il dict, *que celuy-là oste quasi tout à la* Seneca de Benef. lib. 3. c. 4.
memoire, qui donne beaucoup à l'esperance. I'ay Memo- ria mini- mum tri- buit, quis- quis spei plurimū.
 trouué par cette regle, que vous qui esperez tout, ne vous souuenez de rien, que de ce qui conduict vos desirs, ou de ce qui les arreste, & les recule. I'ay aussi recognu, que vous ne pouuez estre yure de la douceur de vostre fortune, sans estre oublieux de celle que vous avez quitté, & de ceux qui vous en ont tiré. Vous allez avec telle impetuosité à ce que vous voyez deuant vous, que
 C 3 vous

vous ne tournez iamais la teste pour voir ce que vous auez laissé derriere . Vous ne regardez ny la terre, où vous remarqueriez vostre origine, & vostre fin; ny le ciel, qui vous aduertiroit de vostre foiblesse, & de vostre petitesse: vous ne faictes pas reflexion sur vous mesmes; & nous pouuons dire avec verité, ce que Dieu disoit de Moab, *que vostre ambition va par dessus vos forces*, & s'estend non seulement au dela du Royaume, dans lequel vous auez le plus grand credit, & tantost la meilleure part; mais au dela du monde, & d'autant de mondes comme l'orgueil d'Alexandre en desiroit deuant qu'il recontraist sept pieds de terre, apres la conqueste de la centiesme partie de celuy que nous habitons.

I'ay aussi attribué vostre defect de memoire aux flatteurs qui vous enuironnent, que vous chérissiez grandement, & qui vous esleuent par belles paroles & meschans escrits, au dela des cieux, iusques dans les espaces imaginaires de vostre vanité: dequoy on ne s'estonne pas; mais de deux choses: l'une, qu'on entreprenne de persuader au public tout ce qu'ils vous ont fait croire,

croire, & qu'ils ne croient pas: l'autre, qu'il se trouue non seulement des parasites & sicophantes, qui veulent par vos loüanges changer leur condition en vne meilleure, mais des plus grands du Royaume de toutes qualitez, qui se rendent esclaves de vostre puissance, & s'atellent au chariot de vostre gloire, pour vous conduire à la fin de vos desseins, s'ils en peuuent trouuer vne arrestée.

Il faut que ie vous confesse, que les submissions basses, les seruices lasches, & les respects, quoy que feints, de ces gens là qui sont dans leur cœur vos ennemis, m'ont faict souuenir d'une histoire que j'ay leu autrefois dans Iustin. Il dict, Iustin.
lib. I 5. qu'un homme d'assez basse condition, nommé Sandrocot, fut esleu Roy des Bactrians par un estrange artifice: il auoit faict appriuoiser des lyons, que le peuple croyoit estre sauuages, qui le venoient lecher lors qu'il dormoit à la campagne; où se rencontroit aussi un elephant priué, qui se couchoit deuant cet homme, & le receuoit sur son dos avec tesmoignage de quelque veneration; ce qui donna vne si ferme opinion aux Ba-

Bactrians, qu'il y auoit quelque diuinité dans Sandrocot, qui estoit recognuë par les plus fiers animaux, qu'ils se resolurent de le faire leur Roy. Il est vray, que beaucoup de Seigneurs, que nous estimions des lyons, vous ont leché avec leurs langues flatteuses; & que des elephans (c'est à dire les plus releuez du Royaume) ont faict des submissiions si basses deuant vostre puissance, que cela vous a persuadé que vous pourriez estre Roy, & au petit peuple, que vous l'estiez en effect, lors qu'on vous a veu flatté par tant de vail-lans, & porté sur le dos de tant de Grands. Ce qui vous a esté autant honorable en apparence, comme il est infame par effect à ceux qui ont abaissé leur naissance pour releuer la vostre, & qui sous l'esperance de quelque augmentation de fortune incertaine, ou d'un employ ruineux, ont serui à lacheminement de vos desseins, & ont presté leurs mains pour vous ayder à destruire le Royaume, & la Royauté. Entre deux Princes du Sang, qui estoient en estat de vous resister, vn s'est mis au dessous de vous pour recueillir ce que vous auez mesprisé; l'autre, plus genereux, a refusé

refusé l'alliance de vostre sang, comme indigne d'estre mélé avec le sien ; s'est maintenu dans son rang, & tout ce qu'on a peu gagner sur luy, a esté, qu'il cacheroit son ressentiment, que la dissimulation ne sçauroit plus retenir sans faire tort à son courage. Nous auons veu vn Prince sorti d'une des plus grandes maisons de l'Europe, & des mieux establies dans la France, qui s'est rendu suiuant de celuy qui est ennemy iuré de sa famille, depuis le siege de la Rochelle, & a faict vœu qu'il la ruineroit ; à quoy il a desia bien trauaillé, sans que celuy que nous designons aye sceu recognoistre, qu'on luy fera la grace du Cyclope, de le manger le dernier, apres qu'on aura faict vne seconde querelle à sa femme : ce qui sera bien ayse, & ne tardera pas long temps. Pour les Seigneurs, qui estoient des plus estimez de France, & qui auoient rendu beaucoup de preuues de leur generosité ; on s'estonne comme ces ieunes lyons, qui auoient desia secoüé leur crin, & faict sentir leurs ongles, se sont laissez emmuser & rendre esclauues, parce qu'on les nourrit d'une vaine esperance, qui leur a faict quitter

l'honneur solide pour courir apres vn ombre qui leur paroist plus grande. Apollonius voyant vn charlatan, qui auoit dressé vn lyon à tendre la patte pour demander l'aumosne , se prit à pleurer ; & dit, qu'il auoit compassion d'Amasis Roy d'Egypte, l'ame duquel estoit dans cet animal. N'est ce pas vn obiect digne de larmes, de voir des esprits que la creance publique tenoit pour genereux , mandier la faueur d'un homme , qui faict semblant d'en vouloir faire part à plusieurs, & la reserue toute pour soy ? C'est chose bien plus estrange, que ces Messieurs flattent vostre vanité, & se soumettent à vn usurpateur, pour le porter sur leurs espaules, & le mettre, s'ils pouuoient, sur leurs testes. Entre ceux là nous remarquons des Prelats, qui tiennent des premiers rangs en l'Eglise, qui ont abaissé leurs dignitez & leur courage, iusques à prendre des charges & qualitez de grand vicaire, & le contreroole de vostre maison. Je ne dis rien d'un tas de parasites & sicophantes de toutes conditions, qui vous assiegent, & vostre table; qui sont payez aux despens du Roy & du public pour chanter

estre celuy de vostre recognoissance , ou au moins de vostre compassion . Vous estes tellement abandonné à vos passions , qu'il est hors de vostre pouuoir de les retenir ; & la maladie de vostre esprit est si pressante, que vous ne sçauriez vous en diuertir.

Vous faictes des propositions de respondre à la lettre de Monsieur , ou de luy faire vne belle remonstrance : apres cinq ou six lignes vous ne vous souuenez plus de vostre dessein; vous quittez là Monsieur , & deschargez vostre cholere sur la Royne Mere de sa Maiesté; parce qu'il est impossible que vostre bile estant eschauffée , vous oubliez ce qui a esté par vn iuste iugement de Dieu , prouoqué par vostre crime , la seule cause du renuersement de vostre cerueau . Au lieu d'employer vostre plume pour la defense du Roy (comme vous dictes) ou pour dresser vne belle instruction à Monsieur, vous iettez là le stile, & prenez la stillette pour blesser la Mere de celuy que vous voulez defendre, & de celuy que vous desirez d'instruire.

Je diray bien dauantage, sans apprehension

D 3 de

de paroistre scandaleux, parce que ie fuis tant que ie peux d'estre semblable à vous, que vous taschez de rendre vostre plume plus cruelle que le foïet avec lequel ce sacrilege Estienne, Persan de nation, & le moyne Theodote, semblable à celuy qui est aupres de vous, battirent la bonne & saincte Imperatrice Anastasia, Mere de Iustinian, furnommé Pogonat, ou la grand' barbe; laquelle souffrit cet affront, pour s'estre opposée à la ruine de son fils, lequel estant absent vengea à son retour cette iniure, & les deux scele-rats peu de temps apres furent brulez tous vifs. Il est vray que vous n'avez pas eu la puissance de venir à ces extremitez; mais vous avez eu l'effronterie de battre iusques au sang, avec les foïets des langues & plumes mesdisantes, la plus grande & la plus vertueuse des Roynes de la Chrestienté, qui possede avec cette qualité celle de Mere de vostre Roy, & celle de vostre Maistresse & Bienfaitrice; & vous n'avez rien de grand que sa bonté ne vous aye ou donné, ou faict donner. Ce qui est le plus facheux, est, que l'ingratitude soit cachée sous la pourpre d'un

Car-

vos loüanges, & vous seruir de mouchars. Entre ceux là sont vos escriuains à gages, qui sont la plus part vos pensionnaires, & comme domestiques, nourris & recompensez pour aller de maison en maison releuer vos actions, & faire toutes les sepmaines des libelles remplis de calomnies contre ceux que vous n'aymez pas, & de flatteries pour vous. En quoy vous imitez ce Psaphon, qui auoit dans des cages quantité de perroquets, merles, pies, geays, sanfonnets, & autres oyseaux de semblable nature; auxquels ayant enseigné, avec vn tres-grand soing, à dire souuent *Psaphon est vn grand Dieu*, & les ayant laschez, ces escoliers qui repetoient tousiours la seule leçon qu'ils sçauoient, attirerent le peuple ignorant à dresser des autels à cet imposteur. Vos flatteurs, par parole, & par escrit, vous procurent tant qu'ils peuent les mesmes honneurs; & ne tient pas à eux que vous ne montiez au ciel *par les eschelons du mensonge*, ainsi que Tertulian disoit *qu'on auoit entrepris d'y faire aller Romulus*.

Pardonnez moy si ie vous dis, que prenant vostre vol au ciel, ou aux espaces imaginaires,

vous nous deuriez donner quelque benediction, pluſtoſt que les maledictions qui ſont dans vos eſcrits; & vous feriez mieux de nous laiſſer le preſent de la paix, à l'exemple de noſtre Seigneur, que de nous ietter dans la guerre, que vous procurez par ambition, ou prouoquez par le deſeſpoir. N'y a t'il point de moyen de vous faire riche en loüanges, qu'en deſrobant tous les honneurs de la terre, ſans conſiderer que vous ſeriez bien malheureux, ſi vos vertus n'eſtoient releuées que par les vices d'autrui; ny vos belles actions recognuës, ſi celles de tout le reſte des hommes ne paroïſſoient fort laides?

Greg.in
Paſt.

Voila l'eſtat auquel voſtre orgueil & les flat-
teries vous ont reduit: qui eſt tel, ſi nous croyons
à S. Gregoire, *que vous eſtes ſemblable à l'Ange
apostat; parce que vous ne voulez pas eſtre ſem-
blable aux hommes qui ont eſté deuant vous, qui
viuent avec vous, & qui viendront apres vous.* Cet-
te preſomption deſreglée pourroit eſtre excuſée
par la folie, ſi elle n'eſtoit accompagnée de ma-
lice, ou de rage, lors que vous rendez le principal
obiet de voſtre furie, la perſonne qui deuroit
eſtre

Cardinal; que vous foyez vn poireau sur cette belle face; qu'on vous voye comme vne tache en cet habit des Princes Ecclesiastiques; que vous ayez fourni quelque subiect de mespris aux esprits foibles des enfans de l'Eglise, & prouoqué les blasphemes de ses ennemis. On espere que ces maux seront reparez, non seulement par les blasmes que ceux qui possèdent plus dignement cette dignité eminentissime vous donneront, mais par les declarations publiques que sa Saincteté fera à toute la Chrestienté, que vostre conduicte est contre les regles de Dieu, & doit estre reprouuée. Le S. Pere garde les ordres de l'Euangile, & commence par les aduertissemens charitables, & particuliers: mais lors que sa prudence aura recognu qu'ils sont inutiles, & que les huilles qu'on veut mettre sur vos playes ne font qu'allumer les feux de vos passions, elle employera sans doute des remedes plus cuisans; & apres qu'on aura rapporté à l'Eglise, de laquelle il est le Chef en terre, ce que vous faites tous les iours contre elle en France, en Allemagne, & aux Pays-bas, & les scandales que

vous

vous produisez en iettant la discorde entre le Fils & la Mere, l'Espous & l'Espouse, & entre les Freres, on declarera que vous deuez estre tenu pour vn payen & publicain, qui ne voulez plus escouter la voix de vostre Mere, mais qui entreprenez de ruiner celle des enfans de Dieu, comme vous faictes celle des enfans de France.

Cette iustice fera changer de langage à tous ces bons Religieux, & petit peuple, qui vous ont estimé vn Beat, apres la prise de la Rochelle; & qui ont perdu vne partie de cette bonne opinion, lors que vous la faictes fortifier pour la vendre ou la laisser surprendre. On commence à cognoistre que vous n'avez pas cherché la gloire de Dieu, mais la vostre; ny le bien de la Religion, mais vos aduantages; que vous estes maintenant, non le fleau des heretiques, mais celuy des Catholiques; & comme disoit le Prophete, *le marteau qui brise toute la terre*, que vous avez troublée par la guerre que vous mettez par tout, & par la faim & la peste qui l'accompagnent.

En quelle execration ferez vous, & où trouuerez vous sureté, si tous les esprits sont destrompez

pez, & si vos artifices ne peuuent plus cacher aux fols ce que les sages ont descouuert il y a long temps? C'est en vain que vous prenez & donnez la peine de faire des liures à vostre loüange & iustificatiõ, & pour des-honorer ceux que vous auez ietté dans la misere. Le liure que vous auez rendu public, & qui est leu par les sçauans & ignorans, par les vertueux & vicieux, est celuy de vos actions, qui sont recognuës d'un chacun; celuy-là refute tous ceux que les colporteurs de Paris crient, & que vous faictes disperfer avec tant de soin. Comme le grand Dieu faisoit mon-
Ezec. 43.
 strer à son peuple, pour le confondre, la desolation que leurs pechez auoient mis dans le temple; il nous suffiroit aussi de faire voir les ruines que vous auez faict en France, & ailleurs, & de représenter les effects de vostre ambition, iniustice, violence, & auarice, au lieu de nous amuser à répondre à vos escrits. Mais parce que nous sçauons que vous estes pointilleux, & que vous & vos flatteurs taschez de tirer aduantage de toutes choses, sur tout de nostre modestie, que vous prenez pour confession des crimes que

vous nous imposez , & pour vn adueu de ce qui est dict à vostre loüange ; nous auons iugé qu'il estoit à propos, en vous marquant les fautes que vous auez faict , de vous cotter aussi les calomnies & impertinences que vous auez escrit & faict escrire.

Nous commencerons par la Remonstrance que vous auez faicte à Monsieur, parce qu'on croit qu'elle est de vostre stile ; & que par honneur vous meritez de passer le premier entre les escriuains , afin que vous soyez premier en tout.

*Responce
à la Re-
monstrā-
ce faicte
à Mon-
sieur.*

Je trouue tout à l'entrée, que vous auez bronché comme le cheual cantherius, & auez mal debutté, lors que vous dictes, *Monseigneur, les monstres d'enuie, d'auarice, & d'ambition, qui vous environnent.* Ce mot de *monstres* est capable de faire peur ou horreur: vous n'auiez pas sceu que les commémemens des escrits doiuent estre doux & honnestes pour obliger & engager toute sorte de personnes à les lire. Ces regles ne sont bonnes que pour les ames exemptes de passion; la vostre, qui est tousiours agitée par la cholere, l'a faict paroistre dans la premiere parole, & nous faict iuger que

que vostre discours fera quelque monstre , puis qu'il commence , *Monseigneur, les monstres:* au moins si vous eussiez vn peu flatté, avec la main plaisante, le bras auquel vous vouliez bailler vn coup de lancette ; mais vous le faictes apres , & donnez des loüanges impertinentes à celuy que vous auez representé comme enuironné des monstres, qu'il n'a pas l'esprit de recognoistre par leurs figures estranges, qui ont la teste d'une hye-ne d'enuie, les mains d'une harpie d'auarice, & les ailes d'une aigle d'ambition . On void bien que vous n'escriuez pas avec intention de conuertir Monsieur, ny de l'instruire, mais de l'effaroucher , & de donner quelque apprehension de ses monstres au petit peuple , qui se moque de vos escrits malins, iniurieux, & impertinens.

Après les monstres, vous taschez de faire voir Pag. 5.
à Monsieur le beau visage de la paix, *que vous dictes estre grandement alterée par son esloignement.*
Qui est la cause de ce malheur ? ceux qui souffrent toute sorte d'extremitez , ou ceux qui les font souffrir ? ceux qui ont emprisonné la Roynne Mere, & chassé Monsieur Frere vnique du Roy,

ou ceux qu'on a voulu accabler ? Il est certain, que la paix de la maison du Roy assure la publique ; que les troubles dans la source de nostre bien paroissent dans tout le cours de la riuere ; qu'il est impossible que les chefs de la famille Royale soient frappez, que tous les membres ne soient estonnez : les nerfs, qui sont les forces de l'Estat, ont leur origine à la teste ; elle ne peut estre blessée que tout le corps ne tremble. Trouuez vous estrange qu'un Frere unique d'un Roy sans enfans, prenne quelque part à la conseruation du Royaume ? se garde d'oppression, & resiste à celui qui a toutes les marques d'un vsurpateur, encore qu'il reiette ce nom, iusques à ce qu'il aye acheué ce qu'il a desia bien auancé, & qui reserve le tiltre de Souuerain pour la derniere chose qu'il veut prendre ?

Nous confessons avec vous, & ressentons plus tendrement que vous ne faiçtes, que c'est un grand malheur pour le peuple ; & disons avec souspirs & larmes, *Ce pendant que le superbe s'esleue, le pauvre est brulé.* Nous esperons que l'vtilité publique sera plus grande, que le mal qui sera souffert

souffert par quelques particuliers. Si vous estiez charitable, vous y apporteriez le remede, qui est tres-aisé puis qu'il ne consiste qu'en vostre retraicte : mais vous estes obstiné en vos poursuites, & comme vous avez dict souuent, il faut que vous voyez iusques où la fortune peut porter vn homme ; sans considerer que les felicitez sont semblables aux palais enchantez de Menippus: Apres auoir veu beaucoup de maisons & de meubles magnifiques, on se trouue assis sur vn fumier ; & les faueurs extraordinaires des Roys viennent avec impetuosité, comme rauines qui passent avec vn grand bruiet & ne laissent que de l'ordure & du sable. Si vous quittiez vos meditations de vanité, pour prendre comme Prelat de l'Eglise, comme Chrestien, & homme sage, celles que ie vous fournis, nous aurions la paix, & vous feriez voir sa beauté dans les terres de France, telle que vous taschez de la depeindre dans vos escrits: mais vous la deschirez avec les mesmes mains qui prennent la plume pour nous faire voir son excellence ; & vous estes conuaincu de pecher contre le saint Esprit, en destrui-

fant vn bien duquel vous cognoissez les aduan-
tages.

Vous nous assurez, *que le Roy est d'un acces tres-facile*; & vous dictes vray; on l'approche plus aysement que vous. *Il escoute plus que Prince du monde les plainctes de ses subiects*: vous ne mentez pas; mais il le feroit plus souuent sans vous. *Tous ceux de la Cour luy parlent tous les iours*: nous l'aduoions, pourueu que ce ne soit pas contre vous, & en particulier; vous y auez donné si bon ordre, que la verité des maux que vous auez faict, que vous faictes & voulez faire, ne peut aborder le Roy: on faict plus d'essay des personnes qui doiuent entretenir sa Maiesté, que des viandes qu'elle doit manger; & si ceux qui ont vn grand interest à sa conseruation, & de son Estat, estoient assurez que les chemins sont aussi bien fermez aux fieures qui peuuent attaquer son corps comme aux lumieres qui peuuent esclairer son esprit, les leurs ioüiroient d'une grande tranquillité.

Vous sçauiez bien, & vous l'auiez practiqué ainsi ailleurs, que c'est vn crime capital de parler
à l'o-

à l'oreille du Roy, si on n'est dans vostre cabale, & pour donner quelque aduis qui vous soit agreable ou profitable. Que si on auoit dict en secret quelque chose indifferente, sur la coniecture & iugement temeraire, vous rendez mauvais office à celuy qui a esté si hardy, sans vous estre affidé, de parler ou en cachette, ou tout bas; & la seconde fois qu'il entreprend la mesme chose, il est chassé par la supposition du crime, qui est auiourdhuy le plus grand, d'auoir intelligence avec la Royne Mere du Roy, ou avec Monsieur son Frere vnique. Vous sçauiez bien que cette presumption a faict bannir Belingan & Iacquinot, premiers valets de Chambre fort fideles, & enfans de bons & vieux seruiteurs; & que le mesme soupçon a faict commander de se retirer à Messieurs de Souuray & de Liancourt, premiers Gentilhommes de la Chambre, à Desguilly, & à plusieurs autres, qui n'ont esté esloignez & disgraciez que parce qu'on a creu que leurs charges & les bonnes graces du Roy leur donnoient les moyens & le credit de parler avec quelque liberté, & en secret; ce que personne n'oseroit

seroit entreprendre, ne restant aupres de sa Ma-
iesté que vos creatures corrompuës, ou ceux
que les frequens bannissemens & autres violen-
ces ont espouuantez, & qui souspirent pour la
tyrannie que vous exercez sur l'esprit du Roy &
sur leurs langues.

Par ce discours vous voyez que nous ne di-
sons pas qu'il y aye du manquement du costé du
Roy, qui ne sçauroit auoir cognoissance du mal,
auquel par sa bonté & Iustice il apporteroit les
remedes; estant enuironé de plus de gardes con-
tre la verité, & contre ses amis & seruiteurs, qu'il
n'en a contre ses ennemis : & nous pouuons dire
auec tres-grande douleur que vous estes comme
ces forciers, qui pour faire voir des illusions en-
ferment vn homme dans vn cercle, duquel il
ne peut sortir; ou comme cet insolent Popilius,
Romain, qui en fit vn à Antiochus pour luy fai-
re refoudre là dedans tout ce qu'il auoit enuie de
tirer de luy. Nous n'accusons pas le Roy, mais
nous en auons compassion; & nous serions tres-
marris de luy auoir donné la moindre partie du
blasme qui vous doit estre reserué tout entier :
comme

comme nous aduoüions qu'il n'y a point de Prince plus vertueux que luy, nous sommes aussi forcez de confesser qu'il n'y a point d'homme qui le soit moins que vous.

Il semble que vous entriez dans les reproches Pag. 8.
de ce que vous auez faict pour Monsieur; vous dictes *que vous l'avez trouué esloigné des affaires, lors que vous y estes entré*: vous ne l'en auez pas approché, & l'avez esloigné non seulement des affaires, mais des bonnes graces & de la presence du Roy; l'avez poursuiuy en armes, chassé hors du Royaume, & reduict par la faisie de ses reuenus, à l'assistance des estrangers: vous ne luy auez iamais procuré du bien, & luy auez faict beaucoup de mal: c'est le premier enfant de la maison, en laquelle vous n'estes & ne pouuez iamais estre que seruiteur; & vous deuriez dire inutile, comme nostre Seigneur vous l'enseigne: quand vous auriez faict tout ce que vous pouuez pour le seruice de celuy auquel vous estes obligé de le rendre; recognoissez le, si l'orgueil le vous peut permettre.

Vous commencez les histoires du temps pas- Pag. 9.

fé, par celles que vous dictes que le Mareſchal
 d'Ornano (que vous nommez Colonel) a faiât:
 vous luy donnez les qualitez *d'homme hardy*,
 & *ambitieux* : vous appelez hardis tous ceux
 qui ont entrepris de vous reſiſter; & ambitieux,
 tous ceux qui ont voulu auoir quelque part à la
 puissance que vous auez deſiré de poſſeder tout
 ſeul. Comme vous trouuez tous les iours quel-
 que moyen pour faire du mal aux viuans que
 vous n'aymez point; vous inuentez auſſi quel-
 que crime contre les morts, qui ne ſe defendent
 pas. C'eſt donc depuis trois mois ſeulement, &
 quatre ans apres le deces du Mareſchal, que
 Pag. 10. vous auez ſceu *qu'il formoit dedans la France, &
 au dehors, des grandes factions* : il le faut croire
 ainſi, parce que vous le dictes ſans preuue, com-
 me vous l'auiez faiât mourir ſans iuſtice; à laquel-
 le vous le pouuiez renuoyer auſſi hardiment,
 que vous auez faiât le Mareſchal de Marillac,
 pour faire deſplaiſir à la Royne Mere, deuant
 meſme qu'elle fuſt arreſtée : mais ce que vous
 faiâtes contre ceſtui-cy par corruption de teſ-
 moins, vous l'auiez faiât contre l'autre par op-
 preſſion,

pression, n'ayant rien trouué dans ses actions contre le seruice du Roy & le bien de l'Estat, auquel luy & les siens ont esté tres-fidéles & tres-vtiles. Maintenant vous nous voudriez persuader que son ombre a traicté avec celle de feu Monsieur de Sauoye avec lequel il n'a iamais eu intelligence en ce monde, ny à la Cour avec l'Abbé de Scaglie son Ambassadeur. Vous n'apportez point de preuue de ce que vous dictes; & la confirmation de ce que i'aduance est tres-forte, parce que vous auriez esté infidele au Roy, & auriez desrobé vn grand exemple au public, si vous n'eussiez faict chastier courageusement par les voyes ordinaires vne trahison faicte contre sa Maiesté & son Estat, par vn Mareschal de France. La consideration de Monsieur ne vous deuoit point retenir; vous luy auez faict plus de desplaisir de faire pourrir en prison son seruiteur que vous deshonnorez, que de le mettre entre les mains d'un bourreau, qui d'un seul coup eust tranché sa teste & ses miseres: outre que ce supplice, ayant descouuert les pretenduës menées du Mareschal, eust peut estre arresté les des-

Pag. 11.

seins sur l'Italie, & la ruine de tant de villes & de peuples, que vous faictes sortir de cette conspiration, & qui viennent en effect plustost de vostre ambition, & de vos quereles particulieres. Il faudroit estre beste pour ne le croire pas, & tout à faict ignorant des affaires du monde, pour prendre le change que vous voulez donner, pour tromper tous les viuans, aux despens de la reputation d'un homme que vous avez faict mourir, & l'honneur duquel vous tuez aussi impunement comme vous avez faict son corps.

Pag. 12.

Afin que vous ne croyez pas que ie sois aussi iniuste que vous, & que ie n'approuue rien de tout ce qui part de vostre plume, ie confesseray que i'ay trouué vn fort bon traict, & vne belle verité que vous avez dict, en voulant faire le Politi-

Pag. 9.

que & homme serieux; voicy vos paroles: *Ne doutez pas, Monseigneur, que les desseins de ceux qui ont l'honneur d'approcher les grands Princes, ne montent tousiours, & qu'apres s'estre donné creance aupres de leurs maistres, ils ne les portent à tout entreprendre. Il y en a peu qui le facent pour aduancer leur gloire, mais pour leur tesmoigner qu'ils*

qu'ils leur sont tout à faict necessaires, & de là s'acquiescer une authorité dans leurs actions, dont bien souvent ils abusent. Je croy que Dieu vous a forcé, comme il a faict quelquefois le malin esprit, de dire ces belles veritez, que nous recognoissons par vne malheureuse experience en vous, ne les ayant pas descouvertes encore dans les actions des seruiteurs de Monsieur, auquel l'exemple de vostre insolence, & de l'abus de l'authorité du Roy vostre Maistre, seruira de meilleure instruction que tout ce que vous pouuez iamais escrire.

Vous parlez apres à vostre mode par enig- Pag. 13.
mes, comme les Oracles; pour tascher de persuader que les factions du Colonel ont esté grandes, & que Monsieur en a voulu entreprendre pour le salut de son seruiteur; qu'il eust tres-aisément tiré de prison, si le respect qu'il a tousiours rendu au Roy n'eust retenu son courage & sa main. C'est faire tort à l'innocence, de la delivrer par la violence, qui faict soupçonner qu'on craint la descouverte de quelque crime: celui qui en est exempt doit plustost estre accōpagné

au supplice avec larmes, que d'en estre tiré avec les armes. Le Fils de Dieu tança le Disciple, qui le vouloit garentir d'oppression avec l'espée. Le maistre s'accuse, qui rompt la prison dans laquelle on a mis son seruiteur. Il faut faire ce qu'on peut avec sollicitations & prieres, pour conseruer la vie à vn homme de bien; mais il ne se faut pas rendre coupable, pour monstrier qu'il ne l'est pas. Monsieur & son Conseil ont suiui ces maximes, en l'affaire du Colonel, & on n'a point faiët d'entreprise pour le mettre en liberté, parce qu'on n'a pas creu qu'on le peust faire mourir par iustice; & on a esperé que le temps, qui a esté preueni par sa mort, pourroit faire cognoistre la verité.

Pag. 14.

C'est vn crime, dictes vous, d'attenter aux Ministres de l'Estat, qui sont comme les organes de la Monarchie. Vous appelez attenter aux Ministres de l'Estat, de leur resister, ou de faire paroistre leurs mauuais desseins, non pas d'entreprendre sur leurs personnes: car vous ne doutez pas, que si on eust voulu prendre ce chemin, que quelques esprits violens croyoient estre le plus court,

court , on n'en fust venu à bout , nonobstant toutes les gardes qui vous donnent la hardiesse de faire mal , & ostent l'apprehension d'en recevoir. Vous ne prenez aussi ce mot *d'attenter*, que pour s'opposer ; en quoy vous me pardonnerez, si ie vous dicts librement que vous auez tort de parler en ces termes . Vous ne doutez pas, par exemple, qu'un Frere unique d'un Roy sans enfans, & autrement, ne puisse se faire entendre par viues raisons , & mesmes par armes s'il y estoit contrainct, contre un Ministre d'Estat qui prendroit toutes les marques d'un vsurpateur, & qui voudroit perdre tous ceux qui ont quelque interest à la cōseruation du Roy, & de son Royaume : vostre proposition est donc trop generale. Or vous sçavez bien , qu'un organe ou membre estant pourry on le retranche si on peut , de peur que la gangrene ne saisisse le cœur, & qu'il ne se face transport au cerueau ; ce qui cause des terribles conuulsions, & en fin apporte la mort : il la faut tousiours preuenir, si on peut, iusques à employer le fer & le feu , s'il est impossible de sauuer autrement tout le corps. Pour un homme qui

vise

vse souuent de la medecine, vous estes aussi mau-
uais Medecin qu'Escriuain.

Pag. 14.

Vous faictes paroistre que vostre Remon-
strance, qui deuroit estre remplie de respect (si
vostre intention estoit que Monsieur en fist son
profit) n'est autre chose qu'une mesdisance, &
vn descri de sa personne, si elle en pouuoit rece-
voir par la vostre. Vous luy dictes *que la vanité
de ses efforts l'a descredité dans la France, & chez
les estrangers.* Ces efforts ont esté inuisibles par
le passé; ce mot signifie vne entreprise ouuerte
par les armes qui n'ont pas reussi: nous n'en a-
uons point veu d'heureuses ny de malheureuses,
deuant la publication de vostre escrit: vous auez
eu sans doute des visions, elles vous sont ordinai-
res, sur tout quand vous craignez & desirez. La
France, & les autres Pays, ont tres-bonne opinion
de la personne de Monsieur; l'auront de la pru-
dence de ses resolutions, lors que vous le cōtrain-
drez d'en prendre des genereuses, & loüeront ses
executions, si le salut du Roy & de l'Estat l'obli-
gent à en venir iusques là. Pour lors on fera trou-
uer faux ce que vous dictes, *que Monsieur est pour
esmonuoir*

Pag. 15.

esmoouvoir des grands troubles, & pour en terminer bien peu. Sans doute vous auiez deuant les yeux vostre fortune, lors que vous auez escrit de celle de Monsieur: vos exploits paroissent grands avec des lunettes d'approche, que la flatterie & la presumption vous ont donné; mais ceux qui voyent sans artifice ce que vous auez faict, trouuent que vos desseins ont eu quelque prosperité iusques à present, parce que vous n'auiez trouué personne qui vous aye resisté viuement, & que trois choses vous ont grandement aydé: la lascheté & foiblesse de vos ennemis; la mort, ou procurée ou autrement arriuée, de ceux qui vous pouuoient arrester, en faisant cognoistre la verité au Roy, ou en s'opposant genereusement à vos entreprises; & en troisieme lieu le nom du Roy, sa conduction, ses forces reglées, & ses Finances. Avec tous ces aduantages nous ne voyons rien de parfait; & pouuons dire avec verité que toute l'Europe, mais principalement la France, est esmeüe par vostre imprudence & malice. Personne ne peut croire, que vous ayez moyen de bien deuider toutes ces fusées, si vous n'employez les

Parques, comme vous auez desia faict fort souvent, pour couper beaucoup de filets : mais fouenez vous aussi, qu'elles portent des ciseaux pour le vostre; vous n'estes qu'un seul homme, mortel, & de petite santé.

Pag. 15.

Vous entrez dans la raillerie, & tesmoignez d'auoir du regret, *que Monsieur n'aye faict election de ministres semblables à ceux du Roy; parce que vous ne seriez en peine, que d'escrire les combats qu'il auroit gaigné sur les ennemis de l'Estat, & la prise de tant de villes, où sa naissance & son courage luy donnent droict.* A la verité si Monsieur auoit la bourse & les armes desquelles vous disposez, il auroit faict ce que vous faictes semblant de desirer; & qu'en effect vous auez tousiours empesché, n'ayant peu souffrir qu'il aye commandé dans les armées; & ayant donné des ialousies estranges au Roy, par ce que vous auiez apprehension de la puissance de Monsieur; & que la vanité & l'auarice vous ont porté a estre Generalissime. Vous estes remercié des belles offres que vous faictes d'estre escriuain des exploits de Monsieur. Il dict qu'outre que vous estes peu
verita-

veritable, & n'estes point iudicieux, vous auez vn stile fort grossier; il veut auoir vn meilleur trompette de sa gloire: comme il ne desire point d'historien passionné pour luy, il reiette ceux qui mentiroient contre luy; sur tout vous, qui estes tellemēt accoustumé à vous attribuer l'honneur de toutes les executions, à cause de quelques conseils que vous auez donné, que vous ne laissez rien ny au Roy, qui a cominandé, ny à ses seruiteurs qui ont esté dans les perils & ont perdu la vie, ce pendant que vous estiez mieux gardé que vostre Maistre, dans vn logement bien re-tranché.

Après auoir tesmoigné vostre regret de ce que Pag. 16. vous ne pouuez estre l'historien de Monsieur, vous faictes voir que vous voulez estre denoncia-teur contre luy, & son Iuge, en luy faisant son procez *sur la deposition de Chalais, & de ceux qui vivent encore; lesquels se vengeans dans la misericorde du Roy ont faict passer Monsieur pour coupable en quelque chose.* Voilà vostre discours: contre lequel, pour ce qui regarde Chalais, on employe ce qui est dans la lettre de Monsieur; à quoy vous

n'auez rien peu repartir ; ce qui descouure vostre malice , qui faict semblant dans deux ou trois mots de cacher des grands mysteres , qui ont esté esuentez ; ce que vous dissimulez . Il faudroit auoir les depositions , & le procez, pour le produire contre ceux que vous desirez de rendre suspects : mais comme vous auez sacrifié vn homme à vostre artifice , vous auez aussi sacrifié toutes les procédures qui ont esté faictes contre luy, & ses declarations, à l'honneur des Dames qui seruent à present à vostre dessein : nous ne condamnons pas les Iuges , mais les tesmoins que vous auez corrompu ; & nous ne declarons pas innocent celuy qui par vos persuasions & promesses d'impunité s'est cōfessé coupable: il meritoit de mourir pour cette lascheté ; mais non pas d'estre haché & chercuté de trente deux coups: & si son procez ne faisoit voir vos tours de souplesse , non les mauuais desseins des Ministres de Monsieur, vous l'aurez plustost conserué pour le mettre en lumiere, que de le ietter dans le feu.

Pag. 17.

Quand aux abolitions qui ont esté prises, vous declarez assez par la suite de vostre discours de
qui

qui vous parlez : & pour laisser à part les pieces qu'on a ioué pour extorquer quelque cōfession si generale qu'elle ne conclud rien , vous sçavez bien dans vostre ame, & quand vous seriez si effronté de le desnier, les lettres du grand Seau & les registres du Parlement prouueroient contre vous, que dans l'abolition il n'y a aucune declaration ny contre Monsieur ny contre ses Ministres. S'ils auoiēt esté chargez en quelque chose, ils auroient esté obligez de prendre vne abolition, deuant que de s'affoir avec vn mortier sur les fleurs de Lis du Parlement. A quoy pensez vous? mais à quoy ne pensez vous pas ? n'est ce pas sur cette calomnie horrible que vous desirez d'appuyer vos menaces de Charles de Lorraine ? Prenez garde que vous n'ayez pris la tour de Loches pour celle d'Orleans, & que vous ne foyez plustost le Cardinal de Balüe, que Gaston de France Charles de Lorraine. Monsieur est vne personne, pour la conseruation de laquelle tout le public s'interesse, comme il faict pour la ruine de la vostre, ou pour le moins, pour celle de vostre fortune : & on vous iuge si pernicieux, qu'il n'y a iamais eu

monstre contre lequel tant d'hommes se soient armez, comme on en verroit pour vous exterminer si le Roy vous auoit abandonné, deuant que vous ayez le loisir de bastir cette grande & forte Ville, de laquelle les Commissaires de sa M^{te} ont desia tracé les murailles. On est seulement en peine de sçauoir le nom que vous luy donnerez: on dict que si vous luy laissez celui de Richelieu, on l'appellera Richelieu des ruines de la France, Richelieu de la desolation de l'Estat, Richelieu du sang du peuple, Richelieu des larrecins faicts au Roy & aux gens de guerre. Quelques vns ont voulu dire, que Boissel ayant esté basti, il n'y a pas long temps, on appelleroit vostre ville Babel, apres les confusions que vous auez mis dans le Royaume, dans la maison Royale, dans les Loix, & dans les Finances. On adioust, que vous ferez vne tour au milieu, comme Nemrod, pour donner l'escalade au Ciel, apres que vous aurez pris toute la terre & la mer: mais Dieu vous arrestera par la diuersité des langues. I'ay aussi escouté quelques personnes, qui on dict qu'il y auoit dans les Indes Orientales

vne Isle de larrons : fans aller si loing, l'Isle d'Oleron a esté appelée par les anciens l'Isle des larrons; vous ne vous contentez pas d'en estre Gouverneur & Seigneur, mais vous avez voulu auoir en terre ferme vne ville de larrons : & c'est peut estre, pour ce subiect que M^r Deffiat y auoit desia faict bastir le premier & le plus grand logis, & y a retenu place de bonne heure : cela soit dict en passant.

Vous estes en belle humeur, lors que vous dites, *que depuis que le Sieur de Monsigot a debité les notions qu'il auoit acquises, pendant qu'il estoit Secrétaire du Connestable de Luynes, les affaires de Monsieur ne se faisoient pas si à contre-temps.* Je n'ay rien à respondre à vostre raillerie, qu'une chose: c'est qu'on vous cognoist pour vn homme qui ne craint pas tant les grandes notions, puis qu'il vous plaist qu'on se serue de ce mot, comme les courages bien resolus, qu'il faut opposer à vos finesses pour vous combattre par armes contraires. Ceux desquels vous vous mocquez comme grossiers, & que vous dictes *auoir faict des lourderies*, ont eu assez d'esprit pour cognoistre vos artifices;

fices; ont beaucoup de generosité pour s'y opposer, vne tref-grande fidelité pour seruir leur Maître, & vne parfaicte recognoissance du bien qu'ils en ont receu. Vous n'avez pas ces belles qualitez, vous estes plus fin, parce que c'est vn vice; & n'estes pas si prudent, parce que c'est vne vertu.

Pag. 19.

Vous remarquez les fautes que son conseil a faict commettre à Monsieur, qui ne sont pas en si grand nombre que les vostres, parce que vous n'en cotez que trois. La premiere est, *qu'ils luy ont faict quitter le siege de la Rochele pour le ramener à Paris.* Vostre face deuroit estre aussi rouge que vostre robe, si l'effronterie ne vous auoit plus osté de bon sang, que les frequentes saignées, de mauuais. Ne vous souuenez vous point de ce que vous avez faict escrire dans le libelle de vostre Defence, imprimé vn mois deuant vostre Remonstrance, *que le Roy, qui n'a iamais voulu faire la guerre par procureur, auoit desiré de commander au siege de la Rochele?* duquel Monsieur se retira, non seulement à cause de l'arriuée de sa Maiesté, qui luy ostoit sa charge par sa presence; mais encore, parce que vous fistes aussi tost les actions de

de Lieutenant Generalissime, & en pristés toutes les marques : entre autres, deuant que Monsieur partist, vostre temerité fut si grande, que de faire entrer en garde deuant vostre logis bien retranché, le regiment des gardes du Roy, l'ayant faict retirer de celuy de Monsieur, qui ne pouuoit plus souffrir cette insolence, sans se porter à vne grande extremité contre vous; ny estre plus long temps qu'avec des-honneur dans l'armée, en laquelle vostre ambition ne luy laissoit plus que la qualité de petit volontaire. Tant s'en faut donc qu'il aye esté mal conseillé par ses seruiteurs, qui furent d'auis qu'il se retirast; qu'au contraire ils sont dignes d'une grãde loüange de ce que la generosité de leur Maistre, qui ne pouuoit souffrir vostre orgueil, & sa prudence qui ne le voulut point chastier, furent accompagnées de leur approbation, qui merite que ce seruice soit mis au rang des plus grands qu'ils luy ayent iamais rendu. Je vous prie, pour l'honneur que ie porte à vostre dignité, non pas d'escrire avec plus de pudeur (car ie croy avec grand regret, que vous l'avez toute perduë) mais avec vn peu d'auanta-

H

ge de

ge de memoire; & de concerter vos escrits, afin que les propositions nouuelles ne soient pas cō-
 trairees aux anciennes. Comment pourriez vous
 remarquer ce defaut, & auoir souuenance de ce
 qui a esté escrit vn mois auparauant, veu que les
 passions qui vous agitent, vous ostent en escri-
 uant dans la seconde feüille, ce que vous auez
 couché sur la premiere? Et pour vous monstrier
 que ie me trompe moins que vous, prenez gar-
 de, s'il vous plaist, qu'apres auoir detesté en cet
 escrit *les troubles, que Monsieur pourroit faire;*
 apres luy auoir predict *qu'il ne peut rien entrepren-*
dre contre la volonté du Roy qui luy reüssisse bien;
 mesmes apres l'auoir *declaré incapable de conduire*
à vne fin glorieuse ce qu'il auroit commencé; vous
 luy dictes sur le subiect de la Princesse Marie,
que tout le monde se preparoit pour l'assister dans vne
boutade d'amoureux, & qu'il eüst trouué vingt mille
ieunes hommes qui pouuoient enleuer sa Maistresse:
 n'estoit ce pas vne sedition, de se mettre à la teste
 d'vne si grande armée; & vne violence, de rom-
 pre la maison du Roy? vous monstrez ses for-
 ces à Monsieur, & luy enseignez qu'il doit dans
 quelques

quelques rencontres s'en seruir. Mais vous dictes, *que celuy de l'enleuement de cette Princesse n'eust point faict de desplaisir au Roy.* Qui pouuoit estre assuré que cette disposition fust dans l'ame de sa Maiesté, qui faisoit paroistre tout le contraire, si on s'y fust opposé? Vous qui auez tousiours ioüé les deux ieux, qui ne sçauriez faire autrement, & cherchiez en ce temps là, comme vous faictes à present, des pretextes pour ruiner Monsieur dans l'esprit du Roy, eussiez crié au tumulte, à la sedition, & eussiez eu peur que ces vingt mille hommes, ayant assisté Monsieur en cette occasion, ne l'eussent vn iour suiuy contre vous. Vostre discours est bien esloigné de vostre pensée, vous le faictes plus seruir au temps qu'à la verité, & vous le changez selon que les faisons & les passions vous conduisent.

Je n'en vois qu'une qui demeure tousiours ferme, qui est celle qui prend subiect de toutes choses de mesdire de vostre Bienfaitrice, & de luy oster tous les droicts que Dieu & la nature luy donnent sur ses enfans. Vous dictes *que si Monsieur eust enleué avec vingt mille hommes la*

Princesse Marie, il n'eust offensé que la Royne sa Mere, & qu'il n'y a point de loy qui nous oblige d'obeir à nos parens en leurs passions. Voila des belles maximes pour vn Prestre, pour vn Theologien, pour vn Euesque, pour vn Cardinal, & pour vn seruiteur tres-obligé: toutes ces qualitez rendent vostre crime autant infame, comme elles sont honorables. Monsieur, dictes vous, *n'eust offensé que la Royne sa Mere.* Est ce vne personne de si petite importance, qu'il ne faille point apprehender de la fascher? n'est ce pas vne Royne, vne Mere, & vostre Bienfaitrice? La premiere condition qui a faict Monsieur vn grand Prince, ne luy donne point de priuilege de mespriser sa source, mais de l'estimer dauantage; parce qu'elle est celle non seulement de la vie, mais de la qualité qu'il possede. Tant s'en faut donc que les Roys, & les enfans des Roys, puissent estre dispensez par leur puissance du respect qu'ils doiuent à leurs Meres, que les biens qu'ils ont receus de la fidelité de leur mariage, & par les soins de leur education, estans beaucoup plus grands que ceux que le reste des hommes

tire

tire de leurs parens, les Princes sont obligez par
 la loy de Dieu & de la nature, de tesmoigner plus
 de recognoissance à ceux qui leur ont donné les
 couronnes avec la vie. L'Escripture sainte, qui a
 dict, *que celui-là est maudict de Dieu qui afflige sa* Eccli. 3.
Mere, ne vous a pas enseigné de dire à vn en-
 fant, *Vous n'eussiez offencé que la Royne vostre*
Mere. Le mesme liure de Dieu, qui dict *que la* Eccli. 3.
benediction du Pere affermit la maison des enfans,
& que la malediction de la Mere arrache les fonde-
mens; vous aduertit qu'il ne faut iamais dresser
 sa famille, & bastir sa maison (ce qui se faict par
 le mariage) contre la volonté des Peres & Meres.
 Sainct Ambroise dict *qu'il faut auoir apprehension* D. Am-
de leur malediction mal fondée. Sainct Augustin brof. de
 l'assure, *que la vergoigne naturelle retient tousiours* Benedi-
quelque respect enuers les Parens, qui ne peut estre ef- ctionib.
facé par la plus grande malice. & Origené a dict August.
que le nom du Pere est de grand mystere, & celui de de Ciuit.
la Mere de grande reuerence. Cecy vous doit estre Dei.
 représenté, parce que vous estes d'une profession Orige-
 qui vous porte non seulement à apprendre tou- nes.
 tes ces choses, mais à les enseigner. Vous les auez
 H 3 mespri-

mesprisées , au mesme temps que l'ingratitude vous a faict oublier les bienfaicts de celle qui vous en a tant donné, qu'elle s'accuse d'auoir confondu vostre memoire. Il vous deuroit rester vn peu de conscience pour retenir vostre main, lors qu'elle escrit ces paroles scandaleuses, *qu'il n'y a point de loy qui nous oblige d'obeir à nos parens en leurs passions.* Vous ne sçauiez donc pas, que les passions des Peres & Meres sont excusées deuant Dieu, & par les hommes sages, & que nostre Seigneur reprit bien les Disciples , non la Mere, qui auoit faict vne demande qui partoist d'ambition. On ne peut pas aymer beaucoup les siens, sans passion, puis que l'amour est vne passion : on ne sçauroit craindre pour les siens, sans passion, autrement la crainte ne seroit pas vne passion. Si les enfans estoient dispensez d'obeir à leurs Peres & Meres, quand ils ont quelque passion pour eux , ils ne leur obeiroient iamais . Il ny a rien qui nous puisse tirer de ce deuoir qu'vn commandement de Dieu , aussi clair qu'est celuy qui a dict, *Honore ton Pere & ta Mere, afin que tu viues longuement sur la terre.*

L'Eglise

L'Eglise demande pour les mariages leur consentement, la iustice du monde le veut aussi; on tient pour vn rapt ceux qui sont faits autrement: & nous auons veu bien souuent, qu'ils sont punis dans l'an, de quelque notable iugement de Dieu, dans lequel vous voudriez precipiter Monsieur, pour vous en desfaire, ou pour le priuer de la benediction d'une belle suite d'enfans, que vous apprehendez. Contentez vous d'auoir defendu la predication de la quatriesme loy de Dieu; ne la destruisiez point par escrit, & par mauuais exemple: vous portez les deux tiers du Royau-

*Æquali
pœnâ in
Deum
blasphē-
mantes
& Paren-
tibus ma-
ledicentes
puniūtur.
Exod. 25
Leuit. 20
Matth.
15.*

Je veux encore auoir cet aduantage de vous conuaincre de malice, lors que vous faictes passer la Royne Mere du Roy pour passionnée cōtre le mariage de Monsieur avec la Princesse Marie.

Je

Je soustiens que la resolution de s'y opposer par-
toit de prudence , & vous le sçauiez aussi bien
que moy; & quel a esté le subiect de la sage ap-
prehension de la Royne Mere: la personne estoit
tres-agreable pour son merite & plusieurs belles
qualitez que chacun recognoist en elle; il n'y
auoit point d'inimitié contre sa maison, qui ar-
restast le contentement des siens. Monsieur l'a
reconnu, & s'est retiré peu à peu de cette recher-
che: les conseils de ses seruiteurs que vous blas-
mez, ont esté tres-fideles. Vous faictes semblant
de l'ignorer, & nous attaquez sur ce rencontre,
parce que vous croyez bien que vostre insolence
ne forcera point nostre discretion à publier le se-
cret de cet affaire.

Pag. 22.

Vous estes abominable, en prenant occasion
des meilleures actions de la Royne Mere du
Roy, & des plus aduantageuses à ses enfans, pour
la diuiser d'auec eux; vous rendant par ce moyen
detestable deuant Dieu, qui ne peut auoir hor-
reur de celuy qui seme la discorde entre les fre-
res, qu'il n'en aye beaucoup dauantage du mes-
chant qui l'a ietté entre la Mere & les Enfans.

Vostre

Vostre rage ne s'arreste pas apres auoir produict la mauuaise intelligence entre le Roy & la Royne sa Mere: vous voulez que la desunion soit avec Monsieur: vous la chargez de tous les des-plaisirs qu'il a receu; & representez les effects de son amour & sagesse, comme actions de haine & de vengeance. Quel feu, s'il n'est d'enfer, peut chastier vostre crime? & quelles peines, si elles ne sont eternelles, seront suffisantes pour respondre à vos pechez? La personne que vous deuriez le plus espargner parlant à son enfant, est celle que vous deschirez plus cruellement; & la Princesse qui vous a chargé de tant de bien-faicts, que le grand nombre a etouffé vostre recognoissance, est celle que vous chargez de tous les maux du monde, pour l'accabler dans la ruine de ceux, que la prouidence de Dieu a tiré de son ventre. Laissez luy, si la furie le vous peut permettre, le plus ieune de ses fils, apres luy auoir desrobé le cœur du plus grand, & que pour l'appuy de cette Monarchie elle s'est priuée de la douce presence & consolation de trois filles.

Vous dictes à Monsieur, *que la Royne sa Me-*

re toute pleine de desirs de vengeance contre la maison de Mantoïe a sans cesse traversé ses affaires, pour en perdre le chef. Vn ancien Docteur, parlant de

Tertul.in
Apolog.

l'innocence des premiers Chrestiens, disoit que ceux qui ne sont ennemis de personne, à plus forte raison ne le seront pas de l'Empereur: ainsi ie vous dicts que la Royne, qui ne se vange d'aucun ennemy, se vengera encor' moins de la maison de Mantoïe. Si elle rendoit quelque mal pour celuy qu'elle a receu, vous en auriez sceu des nouvelles, & n'auriez pas eu le loisir d'escrire ce que vous escriuez. Vous sçauiez bien, que vous n'avez iamais esté en peine dans vostre credit, d'arrester les effects de sa cholere contre ceux qui l'auoient offencée; & vous n'en avez point senti, encore que vous l'ayez prouquée plus que iamais homme ne sçauroit faire. Je diray bien davantage, qu'on accuse plustost sa patience, pour estre trop facile à pardonner & n'estre propre qu'à prouquer les iniures, que sa passion, pour estre trop prompte à tesmoigner ses ressentimens: & nous pouuons dire sans flatter, & sans calomnier, que vous n'oubliez pas plustost les
bien-

bienfaicts, que la Royne Mere du Roy faict les offences. Pourquoy seroit elle ennemie de la maison de Mantoüe qui l'a tousiours honorée, & qu'elle a fort aymé? n'est ce pas de sa bonne sœur, & Marreine du Roy, que les Ducs predecesseurs de celuy qui est à present sont sortis? & n'est ce pas sa petite niepce qui est la Princeesse? pourquoy voudroit elle contribuer quelque chose à la ruine de son Sang, qui ne luy a point rendu de desplaisir? Si vous croyez qu'elle en aye receu autrefois de Monsieur de Mantoüe; pensez vous que le temps ne l'aye pas effacé d'un esprit qui ne retient point le mal? ne sçavez vous pas ce qu'elle a contribué pour son establissement dans l'Italie, & que ses aduis ont tousiours esté qu'il le falloit garder d'oppression? n'ayant iamais blasmé que le mauuais chemin qu'on a pris contre les regles de Iustice & de Prudence, qui ont esté violées par vostre vengeance; laquelle est aussi veritablement la cause des miseres de la France, & de la ruine du Piedmont, & de Mantoüe, comme il est faux qu'elle aye esté dans l'ame de la Royne Mere du Roy contre la maison de Mantoüe, que vos con-

seils temeraires, & la vanité de vos emplois ont mis en l'estat où elle est à present.

Ne dictes donc pas *que les diuerses negotiations aupres des Princes armez, pour la destruire, les lettres surprises pendant la maladie du Roy, sans parler de beaucoup d'autres choses que vous aymez mieux taire que publier, seront d'assez puissans tesmoignages aux siecles aduenir de ce que vous escriuez.* Lors que les preuues bien claires vous manquent vous parlez par enigmes & par mysteres : vous seriez capable de persuader que le respect vous faict retenir quelque chose, si vous ne l'auiez entierement perdu. Croyez vous qu'ayant vſé d'imposture aux choses que vous auez publié, on ne iuge pas que vous vous en seruez plus effrontement en celles que vous faictes semblant de tenir cachées? Produisez hardiment non seulement en Iustice, mais dans vos libelles, les pieces que vous dictes estre contre nous ; afin que nous ayons moyen de les debattre, & de faire voir que vous les auez faussement fabriquées. Quelle apparence y à il qu'une bonne Mere, laquelle durant la maladie du Roy estoit toute fonduë en larmes, qui pre-

noit

noit quelque peu de repos durant le iour, apres auoir veillé toute la nuict, qui assistoit avec grand soing aux consultations des Medecins, & tomba en deffaillance lors qu'elle ouyt parler de l'extreme Onction; durant tous ces accidens estranges, & syncopes, s'occupast à escrire & faire escrire quantité de depesches aux pays estranges, & se seruiſt pour deſeruir son Fils du rencontre de son indisposition? Nous escrirons plus claiement de vostre mauuaise conduicte durant ce temps d'affliction; parce que la verité ne se cache pas, comme faict le mensonge. Vous sçauiez bien que vostre imprudence, ou meschant dessein, estoit aussi assurement la cause de son mal, comme les mauuaises humeurs. Pour couurir vostre indiscretion, & vostre malice, qui auoit ietté le Roy dans vn air empesté, & enſermé dans le vallon de ſainct Iean de Morienne, vous tirastes par force vn certificat du premier Medecin, qui tesmoigna, que cet air, & le voyage que ſa Maieſté auoit entrepris, ne pouuoient estre contraires à ſa ſanté. C'est la premiere piece que vous ioiaſtes pour amuser les fols; celles que vous fistes à

Lyon, sont plus malignes. Vous qui assurez que la Royne Mere du Roy, qui ne mania iamais plume pour escrire en ce temps là, fit des grandes depesches; ne sçauriez desnier, que vous n'en ayez faict vne, qui fut enuoyée par courier expres pour demander protection contre elle, & contre Monsieur; à vn Prince avec lequel vous voudriez auoir partagé le Royaume, pourueu qu'il se contentast de la moitié, & de ce qui est au milieu, & qu'il vous laissast toutes les places & gouuernemens des frontieres. Vous sçaez bien aussi, qu'en cette lamentable saison, vous qui estiez en deffiance de toutes choses, & sur tout de vostre peché, enuoyastes en Auignon les deux layettes remplies de vos bagues, qui estoient, depuis vostre depart pour aller en Sauoye, entre les mains de M^r le Cardinal de Lyon: ces tresors furent accompagnez de Finances qui auoient esté desrobées au Roy, & aux gens de guerre en Piedmont, & du plus precieux de vos meubles. Vous voyez que nous ne parlons point en termes generaux, ny obscurs; mais que nos veritez sont claires & naiues, pour tascher de vous prouoquer
à en

à en dire quelqu'une contre nous, si vous en sçavez: vostre qualité vous obligeroit à estre si religieux en escriuant, qu'il ne deuroit rien sortir de vostre main, qui ne peust seruir dans le Parlement de Paris de piece iustificatiue à vostre innocence, & qui ne fust assez fort pour faire condamner ceux que vous accusez: vous reconnoistrez avec le temps, que nous en auons vſé ainsi; & que rien n'a esté auancé de nostre part, que nous ne prouuions deuant les plus scrupuleux iuges de la terre, & dans le temps de la iustice, qui arriuera apres que celuy de l'oppression sera passé.

Vous dictes *que le pillage de Mantouie, & de* Pag. 23.
tant d'autres places, avec les maux soufferts par tant de milliers de personnes, les meurtres, & les violemens qui s'en sont ensuiuis sont les effects de la passion de la Royne Mere, & de Monsieur. Vous imaginez vous qu'on le croira (comme disent les petites artisanes de Paris) parce qu'il est moulé; & que tous les sages prendront le change sur vostre rapport & sans preuue? Qui est celuy qui ne sçait que la guerre d'Italie, & tout ce qui est

venu en suite , sont les effects de vos quereles
 particulieres avec Monsieur le Prince de Pied-
 mōt, & l'Abbé de l'Escaille? que tous vos desseins
 tendoient , ou à arracher la thiare qu'on appelle
 le regne, sur des fausses propheties, ou à ruiner en
 passant tout le Piedmont , que vostre vanité vous
 auoit faict croire d'aussi facile conqueste que la
 plaine de Vaugirart? La prise & le pillage de Man-
 toïe, les meurtres, brulemens, & violemens dans
 la France, Piedmont, Montferrat & Mantoïan,
 sont les effects non seulement de vostre mauuai-
 se conduicte, mais de vos vengeance, & de vos
 pernicioeux desseins, qui estoient, ou de vous faire
 Chef de l'Eglise, ou si cela manquoit , de trou-
 uer plus de facilité dans la conqueste de l'Estat,
 apres que vous l'aurez affoibly par la dissipation
 des armes, & Finances, & par la mort de tous les
 vieux Capitaines & soldats, qui ont esté les vi-
 ctimes de vostre ambition iusques à cinquante
 mille, sans compter les habitans deçà & delà
 les monts , que les pestes & famines ont rauagé
 iusques à vn nombre presque infiny. Toutes
 ces ames, avec celles qui ont versé leur sang pour
 la

la teinture de vostre chapeau, attendent la vostre : elles demandent vengeance à Dieu, & ioignent leurs cris lamentables avec les larmes de la Vefue calomniée. Son ambition n'a iamais faict mourir personne , parce que ses qualitez & ses vertus la rendent assez grande, sans faire marchepied des corps morts pour se releuer; & si sa vengeance estoit cause de la mort d'un seul homme, elle auroit choisi celuy qui l'a le plus cruelement offensée; & en la ruine duquel on ne doute point qu'il n'y eust plus de merite, que de crime.

Afin que la Royne Mere du Roy soit la cause de tous les maux que Monsieur a soufferts, vous adioustez, *que de peur de l'irriter il refusa le commandement de l'armée d'Italie.* Vous estes tres-humblement supplié de vous expliquer sur cet article, & de nous dire, si vous entendez parler de l'armée de l'an mille six cens vingt-neuf, ou de l'an mille six cens trente. Pour la premiere, Monsieur l'auoit acceptée, & s'estoit mis en chemin pour la conduire : mais vous sçavez bien, que le Roy par vostre conseil le rappella, & voulut commander en personne. Cette resolution ayant

esté prise deuant que Monsieur eust rien faict, ne peut pas estre fondée sur sa mauuaise conduicte, mais sur vostre ialousie. On ne peut dire aussi, que s'estant mis en deuoir, & acheminé pour obeir à sa M^{te}, & ne s'estant retiré que par ses ordres tres-expres, fuiuis de la personne du Roy, il aye refusé ce que la mesme autorité qui l'auoit mis en charge luy ostoit. Il faut dire, que vos secondes pensées effacerent les premieres (comme il vous arriue bien souuent) sur tout apres auoir escouté mille flagorneurs, qui vous approchent pour griueler quelque chose sous vostre autorité, & pour vous donner deffiance de tout ce qui ne despend point absolument de vostre pouuoir. Vous le desiriez auoir tout entier dans les armées d'Italie; & commencer l'an mille six cens vingt-neuf, par la charge de Lieutenant General du Roy, pour estre l'an mille six cens trente Monsieur le Generalissime : tout cela ne se pouoit bien adiufter avec les emplois que la naissance & le merite de Monsieur luy acquierent; il a fallu violer l'un & l'autre, pour faire place à vostre vanité & vengeance : elles vous ont porté

à re-

à reuoquer le premier pouuoir de Monsieur, & vous ont empesché de luy presenter le second, que vous pristés pour vous seul; en ayant faict part au Roy, que vous fistes approcher, lors que vous auiez perdu la tramontane, & reconnu que la conqueste d'Italie & le passage iusques à Rome n'estoient pas si aysez qu'ils paroissent dans la carte de vostre chambre, & par les discours de vos flatteurs.

Là où ie descouure que vous n'avez point de Pag. 24.
 conscience, c'est quand vous marquez pour
 vne des fautes de Monsieur, & imprudence de
 son conseil, *que durant le secours donné à l'Ita-*
lie, & deuant la conqueste du Languedoc, pen-
dant laquelle les maux pressans, & les cœurs esleuez,
luy donnoient beau ieu d'entreprendre pour se faire
escouter, on l'eust faict reuenir avec toutes les satisfa-
ctions qu'il eust sceu souhaiter. Ce discours me faict
 dire, ou que vous estes preuaricateur en la cause
 que vous defendez, & en l'accusation que vous
 faictes, ou que vous n'avez plus la souuenance de
 vostre dessein. Ce qui me porte à faire la premiere
 conclusion, est, qu'en faisant paroistre vne vertu

pour vn vice, c'est à dire la fidelité de Monsieur & des siens comme vne lascheté, & voulant persuader qu'il a laissé eschapper vne belle occasion de tirer par les troubles du Royaume, & diuertissement des armes du Roy, toute sorte de contentement, mesmes au preiudice des affaires & de la reputation de sa M^{te}; il merite d'estre blasmé avec ses conseilliers, de ne s'estre point serui du temps, qui luy estoit si fauorable. Ce reproche est vn crime de leze M^{te}; cette instruction est punissable de mort, sur tout estant donnée par vn Ministre de l'Estat: c'est vn aduis pour l'aduenir qu'on doit chercher son profit dans les malheurs de la France; & c'est vouloir faire passer vn témoignage de bonté & d'affection enuers le Roy pour vn manquement de courage & de sagesse. Il me semble qu'on peut dire qu'il vous est arriué comme à Balaam, de changer tout à coup le dessein de ietter des maledictions, en paroles de benedictions, & les iniures en loüange. Vous auiez faict vn proiect au commencement de vostre escrit, de coter toutes les fautes que les Ministres de Monsieur luy ont faict faire, & apres vous ne remarquez

marquez que des bonnes actions que Monsieur a faict, ou des meschantes qu'il n'a pas voulu faire; & donnez quelque part dans sa conduicte à ceux qui ont eu l'honneur d'estre en quelque consideration aupres de luy. S'estre retiré de la Rochelle apres vne charge finie par l'arriuée du Roy, & les marques du commandement ostées par vostre ambition, est non seulement vn effect de courage & de prudence, mais de crainte de Dieu, de n'auoir pas arresté le cours de vostre insolence avec celuy de vostre vie. Auoir obey au Roy, qui a reuoqué le pouuoir de Monsieur, & l'a rappelé, lors qu'il s'en alloit en Italie commander les armes de France, est vn tesmoignage de vertu que vous desirez de conuertir en vice. Par ce que vous auez renuersé toutes choses, il ne faut pas trouuer estrange si vous changez aussi les noms & les qualitez, & estes de ceux qui sont maudits en l'Escripture sainte, pour auoir appelé *vn mal* Isaïæ 5. *vn bien, & vn bien vn mal.* Vous l'avez faict non seulement en ces deux chefs que i'ay marqué, mais encore lors que vous dictes, que Monsieur a deu prendre son temps pour se faire donner la

dague à la gorge ; ce que sa generosité ne veut auoir que par iustice, & par merite. Vous mettez dans le nombre des fautes pretenduës, de n'auoir point armé & exposé à la mort vingt mille ieunes hommes, pour leur faire remplir de leurs corps les fossez du bois de Vincennes, & faire manger les murailles & les portes; & sur tout, de n'auoir point destourné le Roy, par vne guerre ciuile, de l'assistance de ses alliez opprimez en Italie, & du chastiment de ses subiects sousleuez en Languedoc.

Après toutes ces choses, qui sont glorieuses pour Monsieur, & honorables à son conseil, vous apportez pour comble d'abomination ces belles paroles : *Ils vous ont vny avec la Royne : i'aduoie que c'est un acte de pieté de reduire un fils dans l'obeissance de sa mere, pourueu que ce soit à bonne fin; car il faudroit estre bien simple, pour ne sçauoir pas qu'on peut aussi bien offencer Dieu en obeissant à vne mere qui commanderoit chose mauuaise, comme en luy desobeissant en chose bonne.* Je suis fort ayse que vous ayez icy esueillé vostre Theologie: elle est tres-bonne, mais tres-mal appliquée,

pliquée, en ce que vous ne monstrez pas, ny ce que la Royne Mere du Roy a commandé à Monsieur, ny ce que Monsieur a faict par ordre de la Royne sa Mere contre la loy de Dieu: vous n'auriez pas manqué de le faire valoir, si vous l'auiez descouuert: Monsieur n'a donc peu failir en obeissant, & a grandement merité deuant Dieu en tesmoignant ses ressentimens & bons mouuemens pour les desplaisirs qu'on a rendu à la Royne sa Mere. Vos ingrattitudes & vos mespris donnerent lieu à la liberté des paroles qu'il vous dict, & à sa retraicte. Si vos violences qui sont venuës en fuite; les cognoissances qu'on a eu de vos desseins, ont faict embrasser à Monsieur la defense de l'honneur de la naissance du Roy, & de la sienne, avec celle de l'innocence de la plus grande Princeesse du monde; si la Mere n'a point vsé de l'autorité que la nature luy donne sur son Fils, pour l'obliger à la vanger, mais si son bon naturel, sa prudence, & les aduis de ses fideles seruiteurs l'ont porté à faire paroistre, qu'il ne pouuoit approuuer vostre procedé sans vn notable preiudice de sa reputation,

&

& mesmes de ses droicts; trouuerez vous dans l'Escripture saincte, & dans les liures des saincts Peres, qu'on aye offensé Dieu, en obeissant non pas à la Mere, qui n'a rien commandé ny recom-mandé que la paix, mais à la nature, qui a faict la premiere loy sur laquelle Dieu a fondé non seulement celle de Moyse, mais encore son

Matth. 6. Euangile? Vous sçauiez ce qu'il dist aux Phari-siens, qui la vouloient destruire pour establir leurs traditions. Mais que direz vous, si vous rencontrez iamais dans l'Histoire de Pologne, que le Roy Ladislaus autant estimé pour sa pieté que pour sa valeur, fit pendre vn des premiers de son Royaume, & qui luy auoit rendu de tres-grands seruices, appelé Vvitoud, parce qu'il auoit mesdict de sa Mere? qu'eust il faict, si apres des emprisonnemens, & autres violences estranges, il eust faict imprimer ce que nous auons veu dans vos libelles, & sur tout dans vostre Defen-se? Daudid commanda par testament qu'on tuast Semei qui l'auoit maudit, & luy auoit ietté des pierres dans son affliction, encore qu'il luy eust pardonné dans la chaleur de sa cholere,

pour

Crome-
rus l. 5.

pour faire iustice lors qu'elle seroit passée : quelle peine eust il ordonné à Semei s'il eust entrepris de des-honorer sa Mere, de l'emprisonner, & de la vouloir faire mourir avec son Frere? Si le priuilege du Temple & de l'Autel ne peut garentir la vie de cet homme; où trouueriez vous vn asile, si iustice vous estoit faicte par vn Roy qui est aussi bon & aussi pieux comme Dauid, & comme Ladislaus.

Vous concluez vostre denombrement des fautes que Monsieur a faict, par l'aduis de son Conseil, en disant , *Voilà des iolis Conseillers d'Estat!* Mais confessez, si vous n'avez autre chose à dire, voilà des gens de bien, & des bons seruiteurs: desquels, pour conclusion de toutes leurs loüanges, vous dictes qu'ils ont reüiny Monsieur avec la Royne sa Mere; ce qu'ils n'ont pas faict, parce qu'il n'y a iamais eu desunion : il est bien vray, qu'ils n'ont rien entrepris pour la faire naistre, comme vous avez faict entre le Roy & sa Mere, & taschez de faire par cet escrit avec Monsieur. Mais qui estes vous, qui avez l'effronterie de nous conseiller; nostre capital ennemy, celui qui nous

L avez

avez chassé de nostre place & de nostre bien; qui voudriez, si vous pouuiez, nous boucher tous les chemins pour nous empescher d'y rentrer & d'arrester vostre vsurpation? Vos violences contre la Mere & l'Enfant n'ont faict qu'une cause des deux. Si la froideur de vostre malice n'auoit point redoublé la chaleur de ces deux cœurs, la nature auroit produict cet effect, & auroit ietté Monsieur dans les ressentimens d'un bon Sang, quand il n'auroit point esté offencé en son particulier. C'est en vain que vous employez vos artifices & vos escrits, pour rendre les bons seruiteurs suspects, & pour les diuiser entr'eux; vos finesses sont descouuertes: les brebis ne reçoient point le conseil des loups; elles les cognoissent non seulement par leur puanteur, mais par les vestiges de leurs pattes; c'est à dire, qu'on vous void dans vos mauuaises actions, & encore mieux dans vos escrits.

Pag. 28.

Vous quittez la poursuite des Ministres de Monsieur, & n'abandonnez point celle de la Royne Mere: vous ne vous laissez point de dire du mal de celle qui ne s'est point lassée de vous faire

faire

faire du bien. Vous dictes *qu'elle a assuré les Ministres de Monsieur, par Mrs de Marillac, de vostre perte* : vous sçavez que ces Mrs, sur tout le Marechal, n'auoient pas les bonnes graces de Monsieur, & par consequent estoit mal avec ceux qui les possedoient. La Royne Mere du Roy vous a peu ruiner à Lyon, & se seruir de la mauuaise disposition en laquelle le Roy estoit contre vous peu de temps deuant sa maladie: vous sçavez l'obligation que vous auez à Messieurs de Marillac, ie n'en diray pas dauantage.

Vous representez la vanité des esperances de Pag. 28.
 Monsieur, en ce *que le Roy trouue tant de suretez, en la fidelité du Cardinal, qu'il souffre plustost l'esloignement de sa Mere, que la perte d'un homme tant utile au bien de ses affaires, & de son Estat.* Ie trouue vn bon mot dans ce discours : vous dictes que le Roy *souffre l'esloignement* : c'est donc signe qu'il n'en est pas l'auteur, autrement vous parleriez mal à propos ; ce que vous fuyez plus soigneusement que de mal faire. Il est vray que le Roy souffre ce scandale, comme Dieu, duquel

il est l'image ; souffre & permet le peché, mais en fin il le chastie, & faict paroistre sa iustice , apres qu'on a long temps abusé de sa patience. Vous vous chargez du crime, & le Roy de la dissimulation *d'un esloignement* : c'est le mot honneste que vous donnez à vne detention, & à mille violences qui l'ont accompagnée. Vous continuez tousiours dans vos deguise mens , qui n'ont iama is esté receus par le public ; mais qui peuuent encore tromper le Roy , parce que vous faictes en forte qu'il entend le dernier les veritez qu'il deuroit sçauoir le premier. Vous luy donnez la loüange d'auoir preferé vn mauuais seruiteur à vne bonne Mere , celuy qui prend toutes les meilleures places de son Royaume à celle qui les a toutes conseruées , & vn ingrat à sa Bienfaitrice.

Pag. 29. Vous traictez comme egal avec Monsieur, quãd vous vsez de ces termes, *qu'il vous auoit iuré amitié*. Par tout on void vostre orgueil, & vostre mespris insupportable, en parlant de la plus grande Royne du monde, *si le cœur luy en dict*; & apres, Pag. 31. *que la foiblesse d'une femme estoit trop peu de chose* Pag. 32. *pour*

pour opposer aux pernicioeux desseins que vous faisiez esclatter contre l'Estat. Ainsi la presumption vous rend semblable à l'oyson qui a mangé de la ciguë: elle vous faict leuer la teste en haut, & apres la ietter tantost à droict, tantost à gauche: vous parlez en homme yure de prosperité; auez oublié qui vous estes, où la bonté de la Royne Mere vous a trouué, & où elle vous a conduict. Elle a eu assez de puissance pour vous esleuer; & lors que vous dictes *qu'elle est trop foible pour s'opposer à vos desseins*, vous luy donnez cette loüange d'auoir eu le moyen de vous rendre plus fort qu'elle n'est; & de n'auoir iamais eu la volonté, depuis que vous vous estes rendu indigne de ses bonnes graces, d'employer autre chose que des paroles veritables, pour vous oster l'autorité de laquelle vous abusez. Ne parlez point de la foiblesse, qui a esté assez forte pour vous faire grand; & qui l'est assez pour vous perdre, si elle n'aymoit mieux vous donner le loisir de vous conuertir, & faire penitence. Vous vous seruez de ce mot de *femme*, comme si vous parliez d'une petite damoiselle. Si vous voulez oublier les qualitez

que sa naissance, son mariage, & ses alliances luy donnent; souuenez vous que c'est la Mere de vostre Roy, de vostre Bienfacteur, & de celuy qui vous protege: portez quelque honneur à celle qui l'a donné à la France, & qui vous a donné à luy. Mais vous avez oublié ce qu'elle est, lors que vous n'avez plus eu de souuenance de ce que vous estes, avez esté, & pouuez estre lors que Dieu vous fera iustice.

Pag. 32.

Vous aduancez beaucoup de choses, & n'en prouuez pas vne: c'est que la bonne opinion que vous avez conceu de vous mesmes, vous faict croire que toute la terre dira de vos escrits, ce que les disciples de Pithagore disoient des leçons de leur Maistre, *C'est luy qui l'a dict*. N'avez vous iamais pensé que vos actions peuuent auoir osté quelque creance à vostre pourpre; & que vous avez esté si souuent surpris en menterie, à faute de memoire & de probité, qu'il vous est necessaire d'auoir des fortes raisons, & des cautions meilleures que celles du bon P. Ioseph, & de vostre Confesseur Mulo, si vous desirez de passer pour veritable ?

Vous

Vous dictes *que la Royne Mere du Roy a voulu ranger Monsieur dans l'alliance de Florence, que c'estoit son principal dessein, & ce qui a pluſtoſt armé ſa reſolution contre un homme qu'elle n'eût iamais abandonné, apres l'auoir ſi hautement protégé, & luy l'auoir ſi dignement ſeruié*. Vne choſe de ſi grande importance ayant eſté auancée, il la falloit appuyer de quelque piece iuſtificatiue, ou d'une coniecture; mais voſtre dessein n'eſtant que d'empoifonner à petis frais le petit peuple, vous ne voulez faire que des liurets d'un ſol ou de dix-huiſt deniers: outre que vous ſeriez bien en peine d'apporter quelque preuue, n'en ayant point en main, n'y d'argument en l'eſprit. Si le Mariage de la Princeſſe de Florence avec Monsieur eſtoit le principal dessein de la Royne Mere du Roy; c'eſt vne grande merueille de ce qu'elle l'a ſi bien caché que perſonne ne l'a apperceu: les choſes qu'on a ſi fort à cœur ne ſ'oublent pas aiſement, & ne ſe couurent pas facilement; rien n'empescheroit (au moins à preſent) qu'on ne fiſt paroître cette volonté; ſur tout, lors qu'il n'y a rien en cette alliance du coſté des parties, qui en
doiué

doiue destourner. La Princesse est d'aussi bonne maison que la Royne Mere du Roy, & Monsieur n'est pas de meilleure maison que le Roy Henry le Grand. Si on auoit pensé à ce mariage, il n'y a ny manquement de iugement, ny entreprise contre l'Estat, ny rien qui puisse donner soupçon qu'il seroit priué de la benediction des enfans, ce que nous deuons rechercher. Vous auez tort de dire, que le desir que la Royne Mere du Roy a eu de cette alliance, a esté cause de ce qu'elle vous a abandonné. Vous sçauiez que cela n'a iamais esté mis en consideration, mais d'autres choses qu'on vous a desia dict, & que vous faictes semblant d'ignorer. Si la Royne *vous a protégé hautement*, cela vous obligeoit à la seruir dignement : la fin qui couronne & descouure toutes les œuvres, & toutes les intentions, a faict voir les vostres : & si vous auez serui plus fidelement vostre Maistresse, que vous ne vous estes serui d'elle, pour arriuer là où vous estes; & apres vostre grand establissement, luy oster les biens que sa condition & sa vertu luy auoient acquis, pour vous maintenir dans ceux que vous tenez de sa bonté : sou-

uenez

uenez vous, que vous auez dessein de reduire à la necessité celle qui vous a donné le moyen de tenir la meilleure table de France.

Vous venez sur la fin à vostre apologie; vous taschez de monstrier, qu'il n'y a point d'apparence *que vous entrepreniez contre le Roy, & l'Estat, pour auoir quelques gouuernemens, & quelques charges, avec vne compagnie de gardes, qui n'est que pour vous defendre contre tant d'attentats que l'on a faict contre vostre vie; ce qui n'est pas suffisant pour conquerir vn Royaume, &c.* Il me semble que i'entens l'histoire d'un riche marchand Portugais, qui se retiroit en son pays, apres auoir faict des grands gains au Mexique, & declaroit en secret à vn sien amy, qu'il auoit dans le vaisseau deux cens mille escus; estant mort ce bon compagnon alla trouuer le Roy d'Espagne Philippe II. pour luy demãder *quelques quartillos*, que ce marchand, qui n'auoit point d'heritiers, auoit laissé: ainsi, vous dictes que la moitié des fortes places du Royaume, & trois ou quatre grandes Prouinces qui sont en vos mains ou de vos confidens, toutes les grandes charges de l'Estat vnies à vo-

estre personne, ou exercées par vos Commis, toutes les Finances, vn regiment des gardes, vne compagnie de gendarmes, vne de cheuaux legers, vne troisieme de carrabins, dix mille hommes dans vos forts & citadeles, & l'absoluë disposition de toutes les forces de France, sont quelques petits gouuernemens, des petites charges, des petites gardes, & des petits biens. Il n'y a rien en tout cela de grand que vous, & vos actions. C'est vn tesmoignage de cette ingratitude que vous auez souuent reproché au Roy : comme c'est aussi vne preuue que vous estes bien malheureux, d'estre enuironné & pressé par tant de gens de peur des entreprises sur vostre vie ; laquelle seroit en sureté & liberté, si l'amour des Grands & des peuples, vous gardoit. Mais vous auez tellement irrité les particuliers, & le public, que vous craignez comme vn tyran : il vous semble que tous les hommes qui vous approchent sont des assassins, tous leurs doigts des poignards, & tous les fers de leurs esguilletes des stiletes. C'est qu'il est impossible de faire le mal, sans auoir apprehension de le receuoir ; & Dieu l'a
ainsi

ainsi ordonné, que l'homme criminel seroit le premier bourreau de sa iustice. C'est ce qui vous rend plus digne de compassion que d'enuie; & qui portera ceux qui cognoistront les craintes qui accompagnent vostre pouuoir, à desirer plustost d'estre dans la basse, estroicte & obscure condition d'un pauvre Curé de village, que dans l'esclat de vostre Escarlate Eminentissime, de vostre Lieutenance Generalissime, & de vostre Admirauté Illustissime. Si les tiltres, les biens & les flatteurs rendent les hommes bien-heureux, vous le deuez estre: si les vrayes & fausses alarmes, si les chagrins & les infirmités les peuuent faire malheureux, humiliez vous, en confessant que vos maux sont plus sensibles que vos biens. Le moindre desplaisir altere un grand contentement, comme un grain de poison corrompt la santé de tout le corps: la piquure d'un moucheron est plus cuisante, que toutes les voluptez du monde ne sont agreables; & le Sage a bien dict, *que la malice*, c'est à dire l'affliction *d'une heure, nous faict oublier un plaisir de longue durée.* Eccli. 2.

Je renuoye à la liste de vos charges, gouuerne- Pag. 34.

mens, & benefices, la refutation de ce que vous dictes, *que vous ne possédez pas davantage que les fauoris des Roys qui ont precedé le nostre*. Pardonnez moy si ie vous dicts, ou que vous auez receu tant de biens de vostre Maistre & de vostre Maistresse qu'ils ont confondu vostre memoire, ou que vous les estimez si peu de chose, au pris de ce que vous croyez auoir merité, que dans vostre imagination le pois de vos actions emporteroit celuy de tout le Royaume. Vostre discours est mauuais, lors que vous vous appelez *fauory*, qui est vn mot qui vient de faueur, & n'est pas bien employé pour représenter vn homme qui tient tout du merite, & rien de la faueur; qui n'est pas vn petit complaisant, qui attire les bienfaicts en se rendant agreable; ce qui est, à proprement parler, estre *fauory*: mais vous estes vn grand Ministre, auquel, comme vous dictes, *le Roy confie non seulement ses secrets*, mais les principales pieces des Pays de son obeissance, ne les pouuant confier à personne plus vigilante & plus vaillante. Si vous n'auiez fait cet escrit, reprenez hardiment ce sot Escruiuin, qui vous a appelé *fauory*,
qui

qui est aujourdhuy le nom des chiens de couchette.

Lors que vous dictes *que le feu Roy a eu des Mi-* Pag. 35.
nistres qui partageoient les affaires; vous n'avez pas
 remarqué qu'ils ne partageoient point le Royau-
 me. Iamais homme du viuant de ce grand Prince
 n'a eu deux gouuernemens d'importance, ny
 mesmes les places fortes de la Prouince où il a esté
 Lieutenant pour sa M^{te}: iamais Prestre n'a com-
 mandé, ny sur la mer, ny sur la terre: iamais Mi-
 nistre de son Estat n'a composé vn conseil à sa
 mode: iamais on n'a veu la moindre chose de cel-
 les que nous voyons, & que nous n'oserions auoir
 représenté. Nous vous supplions de ne parler pas
 indignement de son Regne, comme vous avez
 faict de sa personne, pour releuer vos actions sur
 les siennes. Si cet Hercule endormy, que vos
 pigmées mesurent impunement avec leurs petits
 poulces, se releuoit, il vous abattroit, & tous vos
 mirmidons, avec le soufflé de sa bouche.

Vous nous demandez la paix, pour faire des Pag. 36.
 merueilles; & dictes, *Laissez nous en paix seulemēt,*
& vous verrez que le Cardinal, apres s'estre recon-

cilié avec vous, & la Royne Mere (que vous mettez la derniere) *il fera tout ce qui luy sera possible pour acquerir les benedictions du peuple.* Vous avez bonne grace de dire, *Laissez nous en paix*: vous ne parlez pas de la publique, que nous n'auons pas troublée; mais de la vostre particuliere que vous desirez de conseruer : c'est à dire, faire ce que vous faites, & aduancer tousiours vos desseins sans que personne s'y oppose, ny par paroles, ny par escrits, ny par actions. Au moins si vous estiez semblable aux dieux d'Epicure, qui ne vouloient ny faire ny souffrir le mal, vous auriez quelque raison de demander le repos en le donnant à tout le monde: mais vous estes resolu de le garder si vous pouuez, en le rauissant à la Royne Mere du Roy, à Monsieur, à beaucoup de Grands du Royaume, à plusieurs particuliers, à la France, & à toute l'Europe. Vous assurez que vous ferez fleurir ce Royaume, apres que vous ferez reconcilié avec ceux desquels vous cognoissez le bon naturel, qui honnore le Roy, ayme l'Estat, & n'est pas vindicatif: mais la grandeur de vostre peché, & la priuation de la grace de Dieu, vous font di-

re ce que dist le plus malin de tous les hommes,
Mon offence ne merite point le pardon. Ce desespoir Genes. 4.
vous a fermé les yeux, & a faict obstiner vostre
esprit au mal; auquel il ne sçauroit courir à toute
bride, sans rencontrer bien tost vn achopement,
& sa fin, qui sera celle des miseres d'un grand
nombre des gens de bien. Vous sçavez que la re-
conciliation ne seroit pas mal aysee du costé des
persecutez, qui doiuent desirer de rentrer dans
leurs pays, dans leurs charges, dans leurs biens,
sortir des prisons, & de la necessité. Sur tout, vous
n'ignorez pas que la Royne Mere du Roy, &
Monsieur, ne voulussent estre en la place que
Dieu & la nature leur ont donné; en estre dehors
est vn estat de violence : le centre de ces deux
cœurs est celuy du Roy; c'est le lieu de leur re-
pos, duquel vous les auez arrachez pour les lais-
ser en vne continuelle agitation. Ils cherchent
tous les moyens raisonnables pour y reuenir; mais
ils vous trouuent comme vne barriere en leur
chemin; vous les repoussez avec les armes, avec
les calomnies secretes dans l'aureille du Roy, &
avec les publiques dans les escrits. Vous ne les ap-
pellez,

pellez, ny avec la langue, ny avec la main, & encore moins avec l'esprit, qu'on cognoist estre double, de si petite foy, & remply de tant d'inuentions, que vous ne manquerez iamais, apres vne reconciliation simulée de vostre part, d'envelopper vn iour sous vn mesme filet la Mere & le Fils, & de faire comme disoit le Sauueur du monde,

Matt. 27. *de, que la derniere tromperie soit beaucoup plus grande que la premiere*, de laquelle les personnes se sont garanties. Si vous les voulez attrapper, ie vous aduoüe franchement qu'il faut presenter des cautions meilleures & plus suffisantes, que ne sont les deux hommes que nous auons nommé.

Pag. 37.
38. 39.

Le reste de vostre escrit, & de vostre esprit, s'employe pour représenter à Monsieur *sa foiblesse, & les forces de la France*. Il est vray, que Monsieur est bien aise d'estre plus foible que le Roy; & bien marry de l'estre plus que vous, qui auez toutes les forces, & les meilleures places du Royaume. Nous voudrions que l'Estat fust encore plus puissant que vous ne le depeignez: il le feroit sans les ruines que vous auez faict, sans les diuisions que vous y auez apporté, s'il auoit les hommes
que

que vous auez faiët perdre mal à propos ; si les munitions & canons qui sont dans vos places estoient dans les Arsenats ; & si les Finances que vous auez mis dans le Haure & Broiïage, estoient dans la Bastille dans des sacs entacez , au lieu de tant de pauvres miserables qui sont les vns sur les autres. Il vous faut resoudre, pour continuer vos violences, de la descharger, si vous ne voulez que la contagion s'y mette pour vous en deffaire, & accuser de la mort de tant de gens de bien vne fièvre de pourpre , encore qu'elle soit procurée par la vostre.

Vous dictes pour conclusion, *que vous occupez* Pag. 4e.
& 41.
toutes les affections du Roy, & ne pouvez estre d'humeur de quitter la place que vous tenez dans l'Estat. La Royne Mere du Roy, la Royne Espouse du Roy, Mr Frere unique du Roy, tous les Princes du Sang, les autres Princes & Grands du Royaume, tous les seruiteurs de sa M^{te} & son peuple, sont à ce compte biẽ malheureux de n'auoir rien dans cette affection ; ce qui ne peut estre, si vous l'occupez toute. Puis que nous n'auons point de place dans ce cœur Royal, nous croyons que les se-
N mences

mences de quelque compassion y sont encore; & qu'elles germeront avec le temps. Permettez nous au moins de flatter nos esperances pour l'aduenir, puis que vous ne nous laissez rien pour le present, & que vous parlez d'occupation & possession, comme feroit vn demon, ou vn forcier. O Dieu, où sommes nous, à quel poinct est montée l'impudence! on nous appelle aupres du Roy; & on nous dict en mesme temps, qu'il n'y a plus de part dans sa bien-ueillance pour nous, comme si nous pouuions estre en sureté sans cela; & celuy qui nous a chassé non seulement du Royaume, mais de l'esprit de nostre Roy, tenant la moitié de celuy-là, & celuy-cy tout entier, comme il confesse luy mesme! Apres cela il dict, *qu'il ne sera pas en humeur de se deffaire de la place qu'il tient dans l'Estat.* C'est que vous croyez la posseder à vie, comme vn benefice dans le tiltre duquel vous voulez mourir; comme si l'autorité que vous auez, estoit acquise par quelque droit, & assurée par les loix Royales & Imperiales. Si la mesme puissance qui l'a donnée par excez de bonté, ne la pouuoit oster par raison & iusti-

iustice , & si les seruiteurs des Roys n'estoient point deiettons dans les mains de leurs Maistres, qui s'en seruent pour vn grand & pour vn petit nombre. Aduoüez que vostre fortune est non seulement malicieuse, mais folle : son aueuglement nous feroit rire , si elle n'estoit plus meschante que plaisante; & si nos maux n'estoient plus sensibles, que vos impertinences, agreables. Vous exhortez Monsieur *de retourner sans traiter*. Il ne le fera pas par vostre conseil, mais par sa bonne inclination: lors que les empeschemens que vous apportez seront ostez, & qu'un article sera vuidé, on n'en desirera point d'autres. Vostre puissance est suspecte, vos violences trop reconnües, & vostre naturel trop dangereux: toutes les vertus, sur tout la generosité & la bonté, doiuent estre conduictes par la prudence, qui enseigne à Monsieur par l'experience du passé, ce qu'il doit faire pour l'aduenir.

Vos remonstrances seroient receües, si vous estiez non pas comme vous dictes *son amy*, mais Pag. 42.
son seruiteur. Vous dictes *qu'il touchera le cœur du Roy par vn repentir de bonne grace*. De quoy vou-

lez vous qu'il se repente ? de ne s'estre point laissé emprisonner dans le bois de Vincennes ? de ne s'estre point laissé prendre dans Orléans ? d'estre fortý du Royaume, lors qu'on l'a chassé avec vne armée ? d'auoir trouué mauuaise la detention de la Royne sa Mere ? de s'estre plainct du traictement qu'un seruiteur ingrat luy a faict, & des crimes qu'il luy a imposez ?

On ne demande point pardon des maux qu'on a souffert, ou auxquels on s'est opposé ; mais de ceux qu'on a faict : la penitence ne fuit point la patience, mais l'offence : puis que vous seul estes dans cette-cy, cherchez le remede de celle-là ; & pour la rendre parfaicte, ayez toutes ses parties : assauoir le desplaisir d'auoir faict le mal, la confession de vos fautes, & la satisfaction pour les Finances, les places & les charges que vous auez pris au Roy : sur tout, pour la reputation que vous auez rauí par vos calomnies que vous auez porté iusques dans les oreilles de sa Maíesté, & ietté dás le public par les declarations, & escrits remplis de diffamations scandaleuses & impostures abominables. Dieu ne vous donnera

nera iamais l'absolution de ces crimes, que vous n'ayez rendu l'honneur que vous avez osté. Si vostre Confesseur, en la personne duquel vous avez dict souuent que vous auiez vni la charge de vostre bouffon, ne vous oblige à cette reparation, il se damne avec vous; & vous estes aussi sage que luy, lors que vous proposez encore à Monsieur *l'exemple de Charles de Lorraine*. Vous ^{Pag. 42.} ne pouuez dire la moitié d'une histoire, sans faire penser que vous avez le dessein de la rendre entiere; ce qui des-honore le Roy, l'aduertit de son salut, & monstre le chemin que vous desirez de prendre, si on ne vous arreste.

Voila sommairement ce qu'on peut vous remontrer sur le subiect de vostre Remonstrance: de laquelle ie peux dire, ce que dist vn meilleur Cardinal que vous n'estes, à vn meschant Antipape qui fit vne lettre pour la reformation de l'Eglise; qu'il feroit mieux de luy monstre des bons exemples, que de luy enuoyer des grandes lettres.

Nous vous demandons ceux-là, comme tres necessaires à vostre salut; & mesprisons celles-cy,

comme remplies de calomnies & d'impertinences: on les void entacées les vnes sur les autres, non seulement dans vostre Remonstrance, mais dans tous les escrits, que vos flatteurs & loïeurs, loïez à prix d'argent, ou attirez par l'esperance des dignitez & charges, ont composez ou fagottez. Entre ceux-là nous auons remarqué *le vieux*

Second libelle, Le vieux Courtisan desinteressé.

Courtisan desinteressé; lequel ayant effrontement menti en toutes les paroles du tiltre de son escrit, il ne se faut pas estonner si tout le corps de son discours est menteur, puis qu'il porte cette qualité sur le front; ny s'il a esté peu iudicieux dans l'election des choses desquelles il a farcy son libelle, puis qu'il paroist fol en celle de l'inscription de son ouurage.

Il dict qu'il est *vieux Courtisan*, sans estre vieux. Il dict qu'il est *Courtisan*, & est Religieux. Il dict qu'il est *vieux Courtisan*, estant sorti de la Cour fort ieune, & s'estant ietté dans vn Conuent aussi tost qu'il y est r'entré. A la verité, ayant esté plus long temps dans la Cour d'un Prince infidele que dans celle d'un Roy Tres-chrestien, il pourroit passer pour Courtisan, s'il eust adiousté
du

du Turc. Il ne se peut aussi appeller *desintereßé*, ayant pris la plume lors qu'il s'est intereßé dans vn Euesché, qu'il a raiui contre les droicts de la Royne Mere du Roy, contre les intereßts de son amy, & du Protecteur de son Ordre; ayant couru sus à trois affligez, pour leur arracher leur bien; ce que les siens, qui ont autrefois honnorablement employé le leur pour le seruice des Roys, ne luy eussent pas conseillé. Vostre Eminence aduertira donc, s'il luy plaist, cet Escriuain, qui a chambre & entretien en vostre hostel, & qui a, apres le breuet de l'Euesché, voulu tesmoigner son zele & sa recognoissance, en prenant vne plume pour vostre defense, qu'il a bronché, comme vous en vostre Remonstrance, au premier pas qu'il a faict. Il n'est pas plus ferme dans la fuite de son discours, qui est en effect vne censure critique, ou vne anatomie non pas d'un braue Chirurgien, mais d'un chercutier, de la lettre que la Royne Mere escriuit au Roy, apres sa sortie de Compiègne; pour rendre compte à sa Maiesté des subiects qui l'auoient portée à prendre la route des Pays-bas. V.E. qui a, comme
l'Empe-

l'Empereur Constantin, des souris dans son Palais; en a trouué vne qui a rongé les lettres de la Royne vostre Bienfaitrice, & a voulu que ce bestion laissast couler dessus le papier la baue venimeuse de sa folle passion, pour empoisonner ceux qui liront les folies de son petit esprit. Je me contenteray de vous en représenter quelques vnes, ne voulant point perdre le temps, ny abuser de vostre loisir pour vous les estaller toutes. Les pensées sont grossieres & malignes; les paroles sont d'un homme qui a oublié le langage François, dans le long temps qu'il a esté & traffiqué parmy les estrangers.

Il commence, *Ayant veu courre la lettre de la Royne*: il a veu courre vne lettre; il est vray, qu'il a esté le chien, qu'on a lasché & ameuté apres. Il adioust, qu'il a creu *que le Roy ne trouueroit pas mauvais que ie fisse quelques reflexions, que la raison peut faire à tout esprit non interessé, un peu clairvoyant, & capable de ratiocination*. Quel galimatias est-ce là? quelle construction peut on donner à ces paroles? ne diroit on pas que c'est vn escrit de Desuiettes de Normandie, ou du Bouriquet

riquet de la Martegale de Prouence? Voila vn eschantillon d'eloquence bien embarrassée, qui deuroit estre plus nette à l'entrée, pour ne desgouter point le Lecteur. Voicy le bon sens du vieux Courtisan : il dict, *La Royne attribüë la cause de sa sortie à la durescé de sa prison : mais cette cause est sans estre, & sans fondement. Quand elle est partie de Compiègne, elle y estoit avec pleine puissance, sans gens de guerre, & sans gardes de la part du Roy: en quel pays cela s'appelle il vne dure prison? mais il luy estoit dur, peut estre, d'estre traictée avec tant de respect; & n'auoir pas pretexte de se feindre prisonniere estoit vne croix & vne prison à son esprit desireux qu'on la creust bien durement arrestée, pour faire pitié & donner couleur à ses plainctes.* O escolier de Cour! ô le mal adroict homme pour vn vieux Courtisan, duquel V.E. a faict vn lourd & grossier Escriuain! Il n'y a pas vn mot en tout ce discours qui parte du sens commun de l'Autheur, & qui ne choque celuy du Lecteur, quand il dict, *que c'estoit vne croix à la Royne d'estre traictée avec tant de respect.* Il parle en vray conte de la croix ou autrement Herti des

petites maisons, lors qu'il adioust, *qu'elle a desiré qu'on la creust bien durement arrestée pour faire pitié.* Il tasche de persuader aux foibles esprits, semblables au sien, que la plus grande Princeesse du monde a voulu souffrir vn mal cuisant pour esmouvoir vne compassion, qui n'est iamais vn remede; en quoy elle auroit moins d'esprit & de courage que les gueux de la cour des miracles pres la porte de Montmartre à Paris, qui se font des playes & procurent des vlceres pour esmouvoir la charité des passans, desquels ils tirent quelque aumosne. Mais à quoy fert de souhaitter le mal, qui ne fera qu'horreur aux hommes, & les portera à soupirer? De la mesme ceruelle qui a conceu ce beau discours est sorti celuy qui est en la page huictiesme, là où pour deguiser la detention de la Royne à Compiègne, il dict: *Elle y estoit avec toute sa maison, bien payée des estats & pensions que le Roy luy donne, obeye en tout ce qu'il luy plaisoit de commander en pleine liberté de s'aller pourmener par tout où elle vouloit.* Ainsi parlent les voleurs qui ont battu, desualisé, & despoüillé vn pauvre marchand: ils disent qu'il leur a vne grande obligation,

tion , parce qu'ils luy ont donné la vie : ainſi la Royne doit confeſſer par le diſcours de voſtre Eſcriuain , que vous luy auez faiſt beaucoup de bien de ne la reduire pas au pais des priſonniers, de ne l'auoir pas miſe en baſſe foſſe, & de n'auoir pas mis à ſes pieds des fers de cent liures : en fin vous luy auez laiſſé l'air & le iour libres; car pour la campagne que vous luy auez préſenté, vous ſçauiez que c'eſtoit vn leurre ; mais les aigles ne ſ'y prennent pas.

Il eſt plaiſant lors qu'il diſt *que la Royne Mere du Roy eſtoit obeye à Compiègne en tout ce qu'il luy plaiſoit de commander*. Qui croira ce que vous eſcriuez, puis que vous ne le croyez pas vous meſme ? Je vous demande ſi elle donnoit le mot aux gardes, & ſi l'entrée & la fortie des ſiens dependoit d'elle, ou du Gouverneur que vous y auiez mis ; ſi ſes domeſtiques n'eſtoient point conduits deuant luy par des hallebardiers, & ſ'il n'eſt pas vray qu'il interrogeoit ceux qui arriuoient plus ſoigneuſement, qu'on ne faiſt les eſtrangers aux portes des plus importantes places du Royaume ? Les corps de garde de voſtre

infanterie estoient iusques dans la bassecourt du chasteau, la cauallerie tenoit le dehors. Vous ostates les gens de pied pour inuiter la Royne à vne sortie, que vous desiriez de rendre funeste : vous auez voulu prendre cet oyseau Royal au passage, mais Dieu a rompu vos filets. Vostre Escriuain Leuantin parle de ces choses comme s'il estoit encore à Constantinople, informé par les aduis de Monsieur de Guron.

Pag. 10.

Ce qui est en la page dixiesme est encore plus ridicule. Vous dictes *que la façon dont le Roy s'est gouverné en sa separation d'avec la Royne sa Mere, monstre bien qu'elle n'a pas esté arrestée en criminelle : elle n'y a du tout point esté arrestée.* Voila les considerations de vostre Courtisan, qui escrit en vray Secretaire de sainct Innocent. Il loüe la façon avec laquelle le Roy s'est separé d'avec la Royne sa Mere, laquelle n'a pas eu l'honneur de voir sa Maiesté, pour luy dire adieu ; comme elle fit l'an 1617. estant renuoyée à Blois. Deuant que sa Maiesté partist de Compiègne, les corps de garde furent posez autour du chasteau, le premier Medecin auoit esté pris,
les

les clefs des portes auoient esté ostées aux siens : apres cela *elle n'a pas esté arrestée en criminelle*. Comment appelez vous cet arrest faict de sa personne ? est-ce pour matiere ciuile, & pour les debtes qu'elle a faict pour vous enrichir, ou parce qu'elle estoit deuenüe furieuse ? Nous n'auons pas ouy dire qu'elle aye faict aucune extrauagance : nous voulons demeurer d'accord qu'elle *n'a point esté arrestée en criminelle*, mais en innocente. Vous aduoüiez donc qu'elle a esté arrestée ; non pas en criminelle, parce que vous reconnoissez qu'elle ne l'estoit pas. Vostre Courtisan corrige son discours impertinent par vn autre plus sot, lors qu'il adioust; *Elle n'y a du tout point esté arrestée*. Je trouue donc fort estrange qu'elle ne soit allée à Paris, & n'aye pris sa retraite en son Palais du fauxbourg S. Germain, puis que rien ne la retenoit à Compiegne, & qu'elle estoit en pleine liberté. On void l'effronterie de vostre barbouilleur de papier, en la suite de son ouurage, lors qu'il assure *que la separation du Roy & de la Royne sa Mere n'a point esté pour vostre subiect* : il iure non pas à foy de Prelat, car il ne

l'est pas encore, *que la declaration du vingt-troisiesme de Feurier n'en faiet point de mention.* C'est que vous croyez que les registres du Parlement n'en font point chargez, & que toutes les copies sont perduës : c'est vn faiet trop public, vostre imprudence vous a porté à l'imprimer, & vostre malice l'a voulu supprimer. Vous forgez maintenant des causes nouuelles & chimeriques, en termes generaux: vous n'auiez pas encore dict ces beaux mots, *que la Royne affectoit d'estre en mauuaise intelligence avec le Roy.* Au cōtraire (puis qu'il se faut seruir de vos paroles) vous sçauiez que la Royne ayant affecté d'estre bien avec le Roy, son amour la conduisit au lieu qui estoit destiné pour luy seruir de prison. Le desir ardent de veiller à la conseruation de la santé de sa M^{te}, d'estre aupres d'elle pour empescher vos mauuais offices, & poureffacer de son esprit les impressions que vous donniez contre elle, la fit opiniastrer contre les aduis de ses seruiteurs, & en apparence contre vostre dessein, de suiure le Roy par tout. Et vous sçauiez bien les efforts que vous fistes semblant de vouloir faire pour rompre sa resolution : mais si
l'amour

l'amour maternel fut plus fort que vos artifices pour faire partir la Royne Mere de Paris, & l'obliger à ne quitter iamais le Roy; nous pouuons dire avec verité, qu'à Compiegne vos finesses furent plus fortes que l'amour maternel, qui se trouua arresté par vostre violence.

Vostre critique est plaisant, lors qu'il assure *que la lettre que la Royne a escrit aussi tost apres la sortie de Compiegne, a esté dressée par la ceruelle du Coigneux.* Ainsi (pour parler en termes de Paris) on coigne tousiours sur ce pauvre Coigneux. Mais prenez garde, qu'en le voulant faire passer pour meschant, on ne le recognoisse pour saint; ne se pouuant faire autrement que par miracle, qu'en mesme temps il aye esté à Auenes, en Artois, & Remiremont en Lorraine, & qu'il aye escrit vne lettre sur la sortie de la Royne, & sa retraicte au Pays-bas, deuant qu'il sceust ces nouuelles. Si vos Escriuains ne sont plus sages, ils feront receuoir pour Prophetes ceux que vous descriez comme insensez, & vos Prophetes feront estimez des fols à la mode de Turquie.

Vostre Courtisan est il si vieux, qu'il a oublié
com-

comme on parle à la Cour , lors qu'il dict *que la Royne avec une inexcusable fermeté a tousiours demandé au Roy, qu'il trouuast bon qu'elle ne fist rien de tout ce que pour la sureté de son Estat il desiroit d'elle ; tant, qu'en fin la condescendance trop grande du Roy en son endroiect, luy a donné moyen d'executer le dessein de sa retraicte?* Icy les meilleurs esprits de France feroient bien empeschez de iuger , si le sens de ce discours est plus sot que les paroles : ceux qui ne cognoissent pas ce bon autheur, croiront, en voyant le tiltre de vieux Courtisan, que c'est quelque bon homme de cent ans, qui radeote , & parle comme on faisoit du temps des Romans.

Pag. 16.

Pour faire passer pour actions de iustice & de zele au seruice du Roy toutes les violences que vous auez faict, vous dictes *que beaucoup de gens croyent, qu'aux affaires passées d'Italie on auoit quelque intelligence avec les Estrangers.* Est-il possible que vous ayez faict tant de declarations , escrit tant de lettres, composé vn si grand nombre de libelles, sans en descouurir quelqu'une? que vous ayez remply vos imprimez de toute sorte d'iniures,

res, & que vostre discretion aye caché quelque histoire qui pouuoit rendre la Royne Mere du Roy criminelle, & faire paroistre vostre innocence? Si vous auiez crainte de la diffamer, vostre respect auroit plustost retenu les calomnies qui sont dans vostre *Defense du Roy & des Ministres*, que les veritez, si vous en sçauiez : outre que l'emprisonnement d'une Royne doit estre accompagné de la publication du mal qu'elle a fait, afin d'arrester les plainctes des siens, & d'estouffer la compassion des peuples. Apres auoir fait tout ce que vous pouuez de mal; dictes tout ce que vous sçauiez. La Royne Mere du Roy vous deffie, & dict qu'il n'est pas en vostre puissance de faire voir, que ny de volonté, ny de parole, ny par effect elle aye rien entrepris contre le seruice du Roy. Toutes les condamnations sont fondées sur des faicts particuliers : il faut monstrier quel meurtre a fait celuy, qu'on appelle meurtrier; qui a esté empoisonné par l'homme, qui est accusé d'estre empoisonneur. Il est aussi necessaire, de faire voir avec quels estrangers, quand, comment, pourquoy, & à quelles conditions on a

traicté contre le bien de l'Estat, & intentions du Roy. Vous verrez, comme la descouuerte & la poursuite d'un crime se doit manier, si les portes de la Iustice sont vn iour ouuertes contre vous : vous n'avez leu dans nos escrits que les etiquettes des sacs, qui sont remplis des pieces que nous voulons employer; ce pendant vous aurez peu cognoistre, qu'avec nostre misere, & vostre grande puissance, nous sçauons bien de vos nouuelles, encore que nos recherches ne coustent pas tant au Roy comme font les vostres.

Pag. 17.

Le vieux Courtisan nous veut faire croire qu'il ne sçait que les nouuelles de la bassecour, quand il dict, *qu'il seroit bon de sçauoir qui sont ceux qui ont faict telles menaces à la Royne Mere; iamais on n'y pensa.* On void bien par ce discours, que M^r le vieux Courtisan n'est sorti de son Cloistre pour rentrer dans le monde, que depuis quatre iours, & lors qu'il a esté appellé pour faire passer pour œuvre meritoire deuant Dieu l'emprisonnement de la Royne Mere du Roy, & gagner vn Euesché en faisant vne Theologie nouvelle à la courtisane, ou à la Turque, & pre-
nant

nant l'Alcoran pour l'Eſcriture ſaincte . Si ce Frere ignorant veut ſçauoir au vray qui a menacé la Royne Mere du Roy, & luy a dict des paroles bien rudes; ſur tout qu'on luy oſteroit tous ſes Officiers, ſi elle ne vouloit reprendre ceux que vous luy auiez donnez pour eſpions; il ſ'en faut enquerir de M^r le premier Preſident, qui eſt homme d'honneur, qui eſt chef d'une grande Compagnie de Juſtice; outre cela il a faiſt autrefois profeſſion de Cauallier: ſans doute il dira franchement ce qu'il ſçait, & preferera la deſcharge de ſa conſcience à l'affection qu'il a pour vous. M^{rs} le Mareſchal de Schomberg & Garde des Seaux en pourroient bien dire quelque choſe, ſ'ils vouloient: mais il ne les faut pas preſſer, parce qu'ils ſont vn peu choleres, & qu'ils craignent de vous offencer. Voſtre vieux Courtiſan, qui les void tous les iours, ſe peut enquerir d'eux tout doucement, & apprendre ce qu'ils on dict à la Royne Mere à Paris, & à Compiègne, pour obeir à voſtre paſſion, contre leur ſentiment.

Vous confeſſez que vous avez oſté à la Royne Pag. 18.
ſon Medecin: ce qui ne ſ'accorde pas avec ce que

vous auez dict en la page dixiesme, qu'on auoit laissé la Royne à Compiègne avec toute sa maison, en laquelle le Medecin estoit vn des principaux, le plus necessaire, & personne qui vous deuoit estre sacrée: mais vous dictes *qu'il estoit vn broiillon, factieux, & bontefeu*. Sur quoy vous alleguez Caton, & luy faictes dire ce à quoy il ne pensa iamais. Peut estre que vous auez desiré des choses du Medecin de la Royne pour le restablissement des vostres aupres d'elle, que ses poursuittes n'ont peu gagner sur la raison de sa Maistresse: nous ne sçaurions croire qu'il vous aye faict esperer plus qu'il ne pouuoit & deuoit: vous qui estes sa partie, l'avez faict amener chez vous, & luy auez baillé la question (de parole s'entend) sur cet article, & plusieurs autres: mais c'est vn témoignage qu'il est innocent; & que ses depositions ne vous peuuent seruir contre la Royne, parce qu'il est viuant.

Si vos actions n'estoient des plus assurez témoignages de la perte de vostre respect, que vos escrits, on diroit que vous l'avez perdu en parlant d'une grande Royne, & vostre Bienfaitrice,

ce,

ce, comme d'une petite marchande de Paris. Je laisse à part qu'en la page deuxiesme vous avez dict *qu'on peut sans crime douter de la sincerité de ses paroles*: & que dans tout cet escrit, au lieu que vostre recognoissance ne deuroit point espargner cette repetition, *la Royne Mere du Roy*; vous dictes, *elle, elle*. Souuenez vous au moins que c'est elle qui a faict vn bon & grand L. & que vous L. Louys avez tant d'obligation à cet ouurage, & à l'ouuriere, qui est celle de vostre aduancement, que vous deuriez tancer ceux qui escriuent pour vous. *On luy offre de s'aboucher avec le Roy; elle en tire subiect de plainte: on luy propose Mantte & Chartres; elle veut que ce soit à Compiegne*. On vous a respondu pertinemment à cet article, dans les obseruations sur vostre Declaration: mais parce qu'on recognoist par l'oubliance des bienfaicts que vous avez la memoire fort courte, on vous repetera que cette entreueüe que vous avez offert en passant, quand elle n'eust pas esté suspecte, ne pouuoit produire que des larmes, des souspirs & des sanglots, capables de faire mourir la Royne Mere

du Roy , qui eust trouué sa Maiefté tellement preuenüe par vos artifices ; qu'un demy quart d'heure ne pouuoit guarir les maux de quatre mois ; & un adieu ou compliment semblable à celui du depart pour aller à Blois, estoit suffisant d'enuoyer la Royne aux abois . Vous estes fasché de ce que sa prudence a cognu vostre artifice : vous escumez de rage lors qu'on descouure vostre ieu ; vous estes autant marry quand on est sage , que vous estes ioyeux lors qu'on est temeraire : vous voulez faire & escrire le mal , & estes au desespoir lors qu'on s'y oppose , ou qu'on faict des Apologies. En fin, vous estes tellement accoustumé de faire la guerre sans resistance, que lors que vous en trouuez dans les esprits que vous esueillez , & dans les escrits que vous prouoquez, vous entrez en furie . Il vous faut pourtant refoudre, ou à ne faire ny escrire les mauuaises choses, ou à souffrir qu'on s'y oppose par bons conseils & bonnes responses ; n'estant pas raisonnable , que vous qui n'estes & ne pouuez iamais estre que seruiteur, ayez cet aduantage sur vostre Maistresse, & la Mere de vostre Roy, de pouoir
mal

mal faire & mesdire, & qu'elle n'aye ny le courage ny la puissance de se defendre. Elle seroit aussi tres-malheureuse, si vostre fortune auoit rencontré des personnes qui vous donnent des mauuais aduis, & font pour vous des libelles; & que sa vertu fust abandonnée de toute sorte de secours. Vous auez beau à crier & à menacer; tous les hommes ne sont & ne seront pas ingrats comme vous. En fin, quand vous aurez faict, dict, & escrit tout ce qui vous plaira; on fera, dira, & escrira ce qui ne vous plaira pas.

Vostre Escriuain poursuit avec aussi peu de Pag. 20. respect que de sens: *Elle dict qu'en elle toute l'Europe eust esté menée en triomphe, pource que ses Enfans y dominant; comme si les Roynes ses filles appartenoient à elle seule, & non point au Roy.* Je croy que vostre Courtisan resuoit, & croyoit que le feu Roy viuoit, lors qu'il a escrit, parlant à vne Mere, que ses Enfans appartenoient aussi bien au Roy qu'à elle. Vous aduoüerez, s'il vous plaist, qu'il y a quelque difference entre frere & sœur, & Mere & filles: nous deuons la vie à nostre source, non aux ruisseaux qui en sont sortis deuant,

uant, ou apres. La premiere & plus grande obligation de la nature est pour les Peres & Meres; ils vont immediatement apres Dieu : les affections qui montent ou descendent en droicte ligne, sont plus fortes que les collaterales : les respects & les amours que se doiuent rendre ceux qui sont fortis de mesme ventre, sont fondez sur le sang duquel ils ont esté formez; s'il les porte à s'honorer & aymer les vns les autres, à plus forte raison ce qui en est la cause & le lien. Cela nous faict voir, que les Roynes d'Espagne & d'Angleterre (puis que vous ne voulez point faire mention de Madame la Duchesse de Savoie, qui n'est pas de pire naissance pour n'estre point Roynes) appartiennent à la Roynes leur Mere d'autre façon qu'au Roy, & sont obligées par la nature, & par la loy de Dieu, de prendre vne grande part à ses desplaistrs, & à tesmoigner leurs ressentimens contre tous ceux qui en sont les auteurs. Si vostre Courtisan auoit estudié en Theologie naturele & diuine, autant de temps comme il a faict à l'Alcoran & l'Arabe, il auroit appris cette belle leçon, & escriroit autrement,

pourueu

pourueu que la recompence de la mitre , qui ne luy fera point changer la ceruelle, ne luy fist point changer de discours.

La teste de vostre Escriuain s'estant eschauf- Pag. 21.
fée, est deuenüe de folle furieuse : elle faißt vne
salie de prisonnier du pillier de S. Mathurin en
Gastinois , ou de la chasse de saint Benigne de
Dijon, lors qu'il dict, parlant de la Royne Mere
du Roy: *Si elle continuë, elle auroit à craindre de pa-
roistre en fin ennemie de l'authorité du Roy, & de
donner lieu de croire, qu'elle la hayt mesme en sa per-
sonne, & non seulement en celles de ses seruiteurs:*
vrayement le Roy a vn bon tuteur de sa person-
ne, & de son authorité. Par vostre foy (s'il vous
en reste) cet homme qui se dict desinteressé en
toutes choses, est il plus interessé en la conserua-
tion du salut du Roy & de son Estat, que la Roy-
ne sa Mere? aura il plus de vertu, apres auoir
vendu sa conscience pour vn Euesché, que la
Royne qui est despoiillée de son bien, pour
n'auoir point voulu dissimuler vos vsurpations?

Monstrez nous le vice qui a corrompu ce bon
Sang; il y a long temps que nous vous pressons

Q

sur

fur cet article, qui est le seul que vous proposez
 au Roy. Vous le deuiez cacher au public comme
 le plus grand de vos malefices : vous estes obligé
 de blasmer cet indiscret, qui reuele vos secrets
 mysteres, qui sont de persuader au Roy que la
 Royne sa Mere *est ennemie de sa personne* ; à la-
 quelle son cœur ne pense iamais que sa poitrine
 ne souspire, & que ses yeux ne pleurent. Elle vou-
 droit perdre la vie de laquelle Dieu a tiré celle de
 sa Maiesté, si sa mort pouuoit estre vtile non seu-
 lement à sa santé, mais à sa prosperité. Vous sça-
 uiez bien qu'elle est de bon naturel; le Roy l'a sou-
 uent reconnu: & parce que le sien qui est de mes-
 me trempe, ioignoit facilement ses affections a-
 uec celles de la Royne sa Mere, vous n'avez point
 trouué de moyen de les desunir, qu'en separant
 les personnes; à quoy vous avez adiousté la vio-
 lence des soupçons que vous avez donné à cette
 ame Royale: mais elle fera surmontée par la puis-
 sance inuincible du plus noble & plus genereux
 Sang de la terre. Nous ne le supplions pas qu'il
 se venge sur le vostre, de l'iniure que vous avez
 faict au sien : nous prions Dieu qu'il suggere à sa
 prudence

prudence d'autres moyens pour vous chastier; & que sa Maiefté apporte des remedes genereux, iustes, & puissans, aux maux que vous auez faiët, & aux blasphememes que vous auez escrit.

Vostre Escriuain diët, *que la Verité, Royne des* Pag. 22.
hommes & des Anges, a bien perdu son credit aux
esprits (pour dire dans les esprits) de ceux qui ont
diët que U. E. auoit desseïn de perdre l'Estat. Est-ce
 vn iugement temeraire contre lequel il faille in-
 uoquer la Verité, & faire des exclamations pue-
 riles; de dire que nous voyons toutes les apparen-
 ces d'inuasion d'un Estat, en la distribution de
 toutes les grandes charges du Royaume, & de sa
 conduicte entre des Ministres qui dependent plus
 de vous que du Roy, & que vous rendez ennemis
 de ceux qui ont le principal interest à la conser-
 uation de la Couronne? Vous auez depuis peu, ou
 pris, ou faiët distribuer à vos amis & creatures les
 Gouuernemens de Bretagne, de Poictou, de Pi-
 cardie, d'Anjou, de Bourgongne, & d'Auuergne;
 voila le tiers du Royaume. Vous auez trente pla-
 ces importantes, desquelles vous ou les vostres
 estes Gouuerneurs : vous auez vny à vostre per-
 sonne

bonne les charges de Conneſtable & d'Admiral, & faiâtes exercer par vos procureurs celles de Garde des Seaux, de Surintendant des Finances, de grand Maiftre de l'artillerie, & de Secretaire d'Eſtat. Iamais les Anglois ny la ligue derniere n'ont eu ſes aduantages en France : ils ont, peut eſtre, tenu plus de places; mais il n'y en auoit pas vne ſi bonne comme eſt la moindre des voſtres; les Officiers de la Couronne n'eſtoient pas à leur deuotion, ny les Finances dans leurs coffres, ny les armes & toutes les munitions dans leurs magafins, ny le Roy preuenü & aſſiegé par eux, comme il eſt par vous, & ceux de voſtre faction. Apres cela nous ne ſommes point criminels deuant Dieu, de dire que vous auez toutes les marques d'un uſurpateur, ou diſſipateur; prenez de ces deux tiltres celuy qui vous agréera le plus : ne iuger pas que vous deuez porter ou l'un ou l'autre, ſeroit un teſmoignage de ſottife; & ne le publier pas, ſeroit vne conuiction de trahiſon. Nous ſçauons mieux les cas de conſcience que voſtre Theologien ignorant, & corrompu : il y a long temps que S. Auguſtin nous a enſeigné, qu'il eſt loiſible

loisible de iuger hardiment des choses manifestes; & nous sçauons bien que pour estre vrais Chrestiens, on n'est pas obligé d'estre grosse beste.

Sur ce qui auoit esté escrit que vous auiez des- Pag. 23.
sein de faire mourir la Royne entre quatre murailles, vostre Courtisan se met en cholere, & dict, *que si le respect qu'on veut rendre à la Royne n'estoit extraordinaire, on le perdrait en cette occasion*; comme s'il n'auoit pas esté foulé aux pieds il y a long temps, & qu'on ne l'eust pas reconnu par les actions, par les paroles & par les escrits. Mais afin que la mauuaise humeur de vostre Courtisan s'appaise, & qu'il ne trouue pas si estrange ce qu'on a dict; il remarquera, s'il luy plaist, que ceux qui ont eu le pouuoir & l'audace de faire arrester la Royne Mere du Roy, ont peu passer au de la de cette violence, & la faire reserrer plus estroictement; ce qui estoit plus aysé apres vn emprisonnement, & moins extraordinaire, que de luy oster la liberté toute entiere. On s'estonne fort peu, quand on dict qu'un prisonnier, qui se pourmenoit sur les tours & répars de

la Bastille, a esté reserré; mais de le voir pendre dans Paris, cela espouuante tout le monde. Celly qui offense, ne pardonne iamais; la mauuaise conscience ne se pouuant assurer, porte ses entreprises iusques aux extremitez: dans l'ame malicieuse vn crime attire l'autre, le desespoir vient à la fin qui ioüe de son reste, & croid que les resentimens des maux qu'il a faict, ne se peuuent etouffer qu'avec les personnes qui les ont souffers. Vous le prendrez comme il vous plaira: mais ie trouue qu'il y a plus de distance de la pleine liberté d'une grande Roynie à la captiuité dans vn chasteau, ou dans vne ville, que de ce chasteau ou de cette ville à vne seule chambre; ce qu'elle a appellé quatre murailles. I'abandonne volontiers le reste du discours de vostre vieux Courtisan, parce qu'il va de mal en pis; & est tellement despourueu de iugement, qu'il est plus digne de compassion que d'indignation, & de risée que de response: tout ce que ie vous peux dire, est, que pour destruire vne bonne cause, & en soustenir vne mauuaise, vous auez choisi vn tres-mauuais Aduocat. Mais vous, qui en voulez auoir de toutes

tes façons , auez iugé que cestuy feroit bon pour les espiciers , droguistes, charlatans, esguilletiers, rubantiers , & beurrieres de Paris, pour plier leurs marchandises avec les feüilles de ce pretendu desinteressé , qui se tire d'une Compagnie religieuse pour arracher vn Euesché à ses amis affligez, & pour oster les droicts à la Roynne: au moins il luy deuroit laisser la reputation, & pour mieux couvrir le mespris de ses interests, il feroit bien de ne se servir point du temps pour chicaner ceux qui ne se peuvent defendre, & pour demander ce qui ne peut iamais estre à luy, de quel costé que les affaires tournent. *La charité*, dict saint ^{1. Cor.} Paul, *ne cherche point ce qui luy appartient*; à plus ^{13.} forte raison ce qui ne luy appartient pas : & nous pouuons dire que ce n'est pas estre desinteressé de passer au delà de ses interests, pour desrober ou prendre hardiment ceux d'autrui. C'est vne petite remonstrance que vous ferez , s'il vous plaist, à vostre defenseur : & que vous deuez appeller protecteur par raillerie , comme vous faictes le bon Monsieur le Duc de Montbazon.

Nous

Responſe
au troi-
ſieſme li-
belle.

Nous en auons veu vn autre qui eſt d'humeur bien differente , encore qu'il ſoit aſſez vieux Courtiſan; ayant eſté banny de la Cour du temps du feu Roy , pour auoir mal faiët ſon premier meſtier, qui eſtoit d'eſtre miniſtre d'amour : il eſt vray qu'il exerçoit cette charge vn peu plus honorablement , que ne font les huiffiers de la Samaritaine: celuy là a eu honte de s'appeller deſintereſſé, parce que toute la Cour a ſceu qu'il a eſté quelque temps hors de vos bonnes graces , pour auoir trop groſſierement eſcroqué vingt mille liures en la recherche des Financiers, & auoir lourdement coupé la bourſe en faiſant branſler la ſonnette. C'eſt ce bon Seigneur , qui eſt Autheur d'vn eſcrit de quatre ſeüilles (c'eſt à dire , de deux ſols) & qui s'appelle *Discours au Roy touchant les libelles faiëts contre le Gouvernement de ſon Eſtat*. Ce beau diſcoureur eſt ſemblable à Don Quixote , qui ne trouuant point d'enemy, combattoit contre les toiles des moulins à vent. Deuant cet imprimé, & les autres qui ont prouoqué les deſenſes de la Royne Mere, & de Monſieur , on n'a point veu de libelles , ſi on

si on ne donne ce nom là à des lettres enuoyées,
& receües par sa Maiesté, auxquelles on a re-
spondu.

Cet Escriptuain, qui n'est pas apprentif comme
l'autre (car il a faict la premiere & seconde Sa-
uoisienne, l'Entretien des champs Elisées, & au-
tres œuures du temps) nous a faict esperer qu'il
refuteroit quelques escrits : mais il a voulu com-
battre plus au large, & n'a rien proposé de ce qui
a esté escrit contre vous. Il parle par tout en ter-
mes generaux, & s'egaye en l'air, comme vn oy-
seau qui a pris l'effor. Son commencement est
semblable aux prefaces que font ordinairement
quelques compositeurs des imprimeries de Paris;
lesquels pour auoir moyen de faire vn bon repas
inuentent vn iour de petite feste quelque histo-
re d'un monstre né, ou d'un prodige apparu, ou
d'une deffaite aux Indes, & pour remplir la feüil-
le employent les deux tiers du discours en auant-
propos. Vostre Apologiste en faict de mesme;
& parce qu'il cognoist bien que vous auez vn
esprit assez delicat, qui ayne mieux les choses
belles que les bonnes, & les apparentes que les

solides, il a faict sur vostre table trois ou quatre seruices de viandes peintes à la mode d'Heliogabale, afin que cette gentillesse fust plus agreable à la veüe qu'à l'appetit. Apres ce festin de viandes creuses, il a dressé vn theatre comme Tabarin, & faict venir vn Astrologue, vn Physionomiste, & Chiromantiste, auxquels il faict voir l'horoscope, le visage, & la main du President le Coigneux, & faict conclurre à tous trois qu'il est insensé. C'est ainsi que vos gens, pour vous diuertir de vos melancholies, conuertissent en risée les plus importantes & plus serieuses affaires qui soient iamais arriüées en France; & montrent la verité de la parole de Dieu, qui a dict,

PROU. 10. *Le fol faict le mal comme en riant.* La Royne Mere du Roy, la plus grande & meilleure Princesse du monde, estoit en prison; le Frere vnique du Roy, qui est sans enfans, chassé hors du Royaume; toute la Chrestienté esmeüe par ces scandales; toute la France affligée de peste, & la plus grande partie de famine: on conuertit toutes ces choses en bouffonnerie; on ioüe dans le Royaume vne sanglante tragedie, & on la faict passer de-

uant

uant le Roy pour comedie: on luy desguise tous ces maux, en disant que le premier Officier de Monsieur a perdu l'esprit, & mesme qu'il est né sans ceruelle. Chose estrange, qu'il aye esté sage lors qu'il a esté en bonne intelligence avec vous, & qu'il soit deuenu fol lors qu'elle a cessé. Si cela estoit, il faudroit que Dieu fist des grands miracles pour vous: car de dire que le deffaut que vous imposez, soit deuant la rupture; vous vous accuseriez ou de sottise, ou de malice: de sottise, si vous ne l'auiez pas apperceu, ayant traicté si souuent avec le President le Coigneux de tant d'affaires importantes, dans lesquelles il estoit ayse de recognoistre ce manquement. Si vous en auiez eu quelque cognoissance, vous estes vn meschant de n'en auoir pas aduerty le Roy, la Royne Mere, & Monsieur; & auez esté encore plus malin de l'auoir assisté (comme vous luy reprochez) pour auoir la charge de President au mortier, & de l'ayder pour monter en vne place, en laquelle il doit estre arbitre, non seulement des biens, mais de la vie & de la mort des plus grands & des plus sages de France, & mesme estre vostre

Iuge, si la haine que vous declarez auoir conceu contre luy, & l'iniure que vous luy faictes, ne vous seruent de moyens de recusation. Vous tesmoignez encore vne meschanceté plus noire, lors que vous aduoüiez, que vous auez porté le Roy à demander vn chapeau de Cardinal pour le mettre au dessus d'une marotte: vous des-honorez aussi bien le College Eminentissime par vos discours, comme vous faictes par vos mœurs & actions; & vous faictes paroistre que vous n'estes pas sage, lors que vous auez désiré de vous rendre compagnon des fols. Il est bien vray, qu'on dict que vous ne l'estes que par interualles; mais que la malice ne vous donne point de relasche, non pas mesme le loisir de dormir. On dict aussi que vostre esprit melancholique, semblable à celui de Saul reprouué, vous agite; mais qu'il s'appaise vn peu lors que Monsieur le Surintendant ioüe de la harpe pour vous, & que ce bel Escrivain farceur tasche de vous prouuer, qu'il y a des personnes plus insensées que vous au monde. Apres ces badins viennent vos Docteurs en Thuyologie, qui vous assurent, que Dieu par vn iuste

iuste iugement faiët fondre & couler par le nez toute la ceruelle à ceux qui s'opposent à vos desseins; & que vouloir troubler le courāt de vostre fortune faiët perdre le sens aux personnes, comme faisoit l'eau de cette fontaine en Grece, si on ne la beuuoit dans le sabot d'un asne: le foulier de vostre Escriuain pourroit bien auoir cette vertu.

C'est vne chose veritable, que ceux que vous desirez de faire passer pour hommes qui ont perdu l'esprit, ont tesmoigné qu'ils en auoient beaucoup dans les charges & deputations publiques, dans les harangues de la part de la chambre des Comptes faiëtes au Roy, & receües avec admiration, dans les affaires traictez avec vous & le Conseil de sa M^{te}: & tant s'en faut que le iugement de Dieu leur aye osté le leur en vous resistant, qu'au contraire ses graces & assistences extraordinaires les ont rendus & faiët paroistre plus aduisez, lors qu'ils ont approuué & fortifié les resolutions de Monsieur; qui seroit, peut estre, mort de desplaisir, ou autrement dans le Donjon de Vincennes, & eux dans la Bastille, & apres cela l'Estat en proye. Si vous appelez ces preuoyances des

folies, c'est que vostre plus grande manie consiste en ce que vous croyez ; que c'est, estre priué de raison d'auoir vne bonne conscience : & vous estes semblable à Antipheron, qui s'imaginoit qu'il voyoit tousiours son pourtraict, ainsi le vostre est sans cesse deuant vos yeux, lors que vous ne descouurez que des insensez : souuenez vous qu'il y en a eu, & qu'il y en a encore d'enfermez de vostre race.

Et pour vous monstrier que le prouerbe est veritable, Tel maistre tel valet; vos flatteurs ne sont pas mieux timbrez que vous. Nous vous ferons remarquer quelques impertinences & sottises qu'ils ont faict, en voulant defendre vostre cause; elles sont si euidentes, qu'il n'y a que la seule manie qui les puisse mettre à couuert du crime de preuarication : comme lors que vostre discoureur dict en la page septiesme, *que c'est vne espece de sacrilege de disputer du iugement du Prince, & de reuoquer en doute, s'il a bien ou mal faict à quelqu'un.* Si pour excuser vostre Escriuain on ne met en fuite de ces paroles *avec raison*; & qu'on n'assure que cela est demeuré au bout de sa plume, il faut neces-

necessairement qu'il passe pour insensé, s'il veut dire que ce soit *sacrilege* de douter si le Prince a fait bien ou mal à quelqu'un; veu que ce ne sont point articles de foy diuine, ny morale, ny naturelle: *faire du bien & du mal à quelqu'un* sont des faits desquels on peut douter sans péché mortel, & à plus forte raison sans *sacrilege*. Il y a mesme du merite de se deffier si le Prince a fait le mal, duquel vous estes plustost l'auteur que luy, & qui vous peut estre imputé avec certitude, par ceux qui cognoissent la vertu du Roy. Si entrer en doute d'où vient le bien que sa M^{te} fait, est vn crime; qui est plus coupable que vous, qui vous faites auteur de toutes les bonnes actions, & chargez sa Maiesté des mauuaises que vous faites? Ainsi par vn horrible péché, qu'on peut appeller double sacrilege plus à propos que ce que vous dictes, vous faites cet eschange abominable de donner à vostre Maistre la hayne des maux que vous faites, & luy desrober les loüanges, & les recognoissances des biens qu'il a fait.

De la mesme source de folie vient cet autre discours en la page douziesme, *que les Ministres de M^r*

vous

vous auoient donné assurance que leur Maître ne s'opposeroit point à vostre grandeur, & rechercheroyent toute sorte de moyens pour ayder à vostre aduancement. Il est vray que le subiect de tous les troubles vient de l'opposition à cette grandeur, non à la gloire du Roy, & à la paix de son Royaume. Je laisse à penser, si Monsieur a esté si lasche de vous promettre qu'il vous porteroit sur sa teste, & donneroit secours pour la conqueste ou dissipation de l'Estat.

Vous iugerez aussi, si c'est discourir en homme sage, d'escrire en la mesme page, *que le Roy craignant que la grosse nuë du desplaisir de Monsieur, sous pretexte de son principal Ministre, ne se deschargeast sur sa personne & sur son Estat, ingea qu'il falloit destacher son Frere d'aupres de la Royne sa Mere, gratifier le Coigneux de la charge de President au mortier, & de l'esperance du chapeau de Cardinal.* Où est le iugement de vostre Escrivain, lors qu'il dict que le Roy a eu peur de Monsieur, qu'il a mis la diuision entre luy & la Royne sa Mere? cela est vn peché, la bõne intelligence n'ayant point esté pour mauuais dessein, ce que

VOUS

vous ne ſçauriez monſtrer, & n'ayant eu autre fondement que celui du Sang, & du ſervice du Roy, avec quelque deſgouſt de vos imprudences, malices, & insolences. Vous faiſtes auſſi vn grand tort à ſa Maieſté, & la deſcriez parmy ſon peuple, lors que vous diſtes, qu'elle a donné vne charge de Preſident au mortier à vn homme qu'elle eſtimoit fol & meſchant, & luy a preſenté le lurre d'un chapeau de Cardinal pour le faire venir ſur le poing, & le chapperonner. Vous nous repreſentez le Roy qui eſt genereux & bon, comme timide; & vous taſchez de perſuader, qu'un Prince qui ne doit rien auoir en plus grande recommandation que ſa foy & ſa parole, ſe mocque de ceux auxquels il l'a donnée.

Pour monſtrer que voſtre diſcours eſt tellement deſpourueu de ſens commun, qu'il ne corrige iamais ſes premieres penſées par les ſecondes, & ne faiſt aucune election ny des paroles ny des choſes: il diſt en la page trezieme, *que les Miniſtres de Monſieur auoient promis au Roy, qu'ils retiendroient leur Maïſtre dans l'obeïſſance au eugle*: que vous deſirez d'eſtendre iuſques à ſouffrir le

S

renuer-

renuersement, le pillage, la dissipation, la ruine, & l'vsurpation de l'Estat; & à faire que Monsieur ne se plaigne non plus de l'emprisonnement de la Royne sa Mere, qu'un Moyne bien reformé, qui faict profession d'obeissance au eugle d'un changement de Conuent ou de chambre, ou un soldat d'estre mis en faction.

En la page quatorziesme nous remarquons que les paroles genereuses & trop douces, que Monsieur vous dist en partant de Paris, sont appellées *frasque honorable pour vous*. Il est vray, que sa retenuë fut, peut estre, trop grande, & accompagnée de quelque respect rendu au Roy, & à vostre dignité; mais le mot de *frasque* est tres mal employé.

De pareille etoffe sont les termes, avec lesquels on faict que le Roy vous parle apres le depart de Monsieur. Vostre Escriuain dict, *que sa Maiesté vous promet de vous assister enuers tous, & contre tous*. Quand la bonté de sa Maiesté se feroit abaissée iusques à vser de ces paroles de pair à compagnon, vostre modestie deuroit publier que le Roy vous auoit pris en sa protection:

on diroit en lisant cet escrit, que vous auez vne querele, & que vous croyez que le Roy sera vostre second.

Tous les manquemens de iugement que nous auons remarqué semblent estre à couuert par ceux qui s'ensuyuent. Vous parlez en la page quinzième des affaires d'Angers, & les appelez *la rebellion du pont de Cée*. Vous auez donc esté le chef des rebelles. Toute la France sçait que vous fustes le seul autheur de ces mouuemens, pour gaigner dans vn traicté le chapeau de Cardinal, qui fut la recompence de cent tours de souplesse que vous fistes, & qui vous ont donné le nom de Cardinal de la trahison: belle qualité, que vous porterez dans les plus veritables Histories de France. Vous sçauiez que vous estiez d'accord lors que vous fistes tuer cinq cens hommes, & ne tint pas à vous, que plus de dix mille ne fussent assommez. Vous croyez qu'on ne sçait pas que vous donniez tous les iours les aduis des resolutions, que vous preniez avec les Princes, & Grands qui estoient aupres de la Royne, & que vous seul descouuristes au Roy apres la desroute

le dessein, que la Royne auoit d'aller passer la riuere de Loire à Ansenis, ce que vous ne desiriez pas, de peur que la Royne ne rencontrast en Angoumois & en Guienne des puissans & fideles seruiteurs, qui luy eussent descouuert vos menées. Le Roy qui les auoit sceües en tira sa gloire, & nous en loüions Dieu; mais sa Maiesté vous mesprisoit, & detestoit si fort pour ce mauuais procedé, & double ieu, qu'elle recula de deux ans vostre promotion au Cardinalat, & de deux autres apres vostre entrée dans ses conseils, n'allé-
gant point d'autre raison à la Royne Mere, qui estoit portée par sa mauuaise destinée, à presser sa Maiesté de vous donner cognoissance de ses affaires.

Vous auez bonne grace, lors qu'en la page seizieſme, reuenant sur les affaires d'Angers, vous dictes, *que vostre prudence pacifia le tout*. Je vous prie ne faićtes pas ce tort à cette belle vertu de luy donner quelque part dans vos finesſſes & lâchetes, qui ont faićt disputer aux plus sages, si le dessein de cette guerre a esté plus infame, que la conclusion. Il suffit de dire, que le commence-
ment

ment & la fin sont de vostre seule inuention , & que Dieu a tiré du bien de vostre peché , comme il a faict le salut des hommes de la perfidie d'un Apostre.

En la mesme page vous faictes parler le Roy en si beaux termes, & pensées si releuées, à la Royne sa Mere , lors que sa M^{te} entreprit de vous remettre en ses bonnes graces, auxquelles vous fustes restabli (ce que vous ne dictes pas) qu'il est aysé de iuger que vous auez dressé ce discours pour ietter la Royne dans son tort, la faire blâmer de mespris enuers le Roy , & de trop grande rigueur contre vous. Outre que ces paroles bien recherchées par vostre Escriptuain , ne sortirent iamais de la bouche de sa M^{te}, qui parle bien , mais en Roy : vous sçauiez qu'il n'auroit iamais dict *que vous l'auiez si dignement seruie , ny que vous auiez preferé ses interests à tous autres.*

Nous renuoyons la refutation de ce discours à la cognoissance publique: personne ne dira que vous n'ayez eu plus de soing de faire vos affaires que ceux de vostre Maistresse , ayant faict en sorte, que vous auez plus de reuenu qu'elle. On ne

croira point aussi que vous ayez mangé le bien de vostre maison auprès d'elle ; au contraire, vous l'avez tiré de la discussion generale , & l'avez augmenté au centuple . Ce que vous escriuez, pourra, peut estre , surprendre ceux qui n'auront aucune cognoissance de l'estat auquel la fortune vous trouua , lors qu'elle vous prit pour vous presenter à la Royne Mere du Roy.

Pour donner plus d'autorité à vne imposture plus grande, vous dictes en la page dix-septiesme avec vne effronterie estrange , *que le Roy dist aussi à la Royne sa Mere, qu'il ne mettoit point en ligne de compte les continuels services que vous luy auiez rendus, lors qu'elle n'estoit plus regardée de personne, ny les desplaisirs que vous auiez receus durant son esloignement de la Cour en Auignon.* Vous n'avez pas esté le page (car c'est trop peu pour vous) qui avez porté le flambeau deuant vostre Maistresse ; mais vous croyez auoir esté ce soleil qui a esclairé cette pauvre Princesse , qui demeueroit incognuë dans les tenebres : sa naissance , son mariage , ses enfans , & sur tout le Roy , sa regence , ses vertus , ses bonnes actions ne la faisoient point cognoistre

noistre sans vous : toutes ces lumieres n'estoient que des vers luisans , iusques au leuer de vostre puissance & de vostre conduite; qui ont dissipé les broüillards obscurs , qui enuelopoient & auoient mis la Royne hors de la cōsideration, & de la veüe de toute la terre; estant en toutes façons inuisible comme les Rosecroix , lors que vous auez ietté vos rayons sur elle pour la faire voir & admirer. Mais que voulez vous dire , & de quel temps entendez vous parler , lors que vous dictes, *que personne ne regardoit la Royne Mere* , lors que vostre splendeur a faict esclatter sa gloire ? si c'est lors que vous fustes enuoyé à Angoulesme par feu M^r de Luynes ; vous sçauiez le contraire, que tant s'en faut que vous l'ayez faict mieux regarder, que vous fistes en sorte que tous ces bons & genereux seruiteurs ne la regarderent plus , qu'ils se retirèrent mescontans , & abandonnerent ses interests : le Capitaine de ses gardes , qui deuoit estre le dernier en cette retraicte , tua vostre aîné , pour tesmoigner par cet exemple dans quel desespoir vous auiez ietté les seruiteurs de la Royne.

Si

Si vous dictes *que vous l'avez, faict regarder* dans les affaires d'Angers, vous le pouuez dire de l'œil de compassion; car pour l'assistance & le seruice des Grands, vous les ostates entierement: vous sçauiez le desgoust qu'ils eurent apres vostre traité, dans lequel tous leurs interests furent sacrifiez à vostre chapeau de Cardinal; qui fut cause que dix-sept ou Princes ou Officiers de la Couronne, & plus de dix mille Gentilhommes ne regarderent plus la Royne Mere du Roy; parce que vous estiez vn broüillard espais qui leur desrobiez sa lumiere: vos mauuais offices les chasserent du lieu où son merite & leur affection les auoient appelez. Nous vous pourrions nommer ceux que le desplaisir fit mourir de regret, ceux qu'il precipita dans les morts violentes, ceux qu'il fit cacher dans les Cloistres, & ceux qu'il fit retirer dans leurs maisons: de sorte que nous qui sçauons comme les choses se passerent, & les tyrannies que vous auez exercé du depuis, pouuons dire avec verité, que tant s'en faut *que vous ayez faict regarder la Royne, lors qu'elle ne l'estoit de personne*; qu'au contraire, lors qu'elle estoit regardée
de

de tous les Grands du Royaume , vous l'auez emprisonnée , pour faire en forte qu'on ne la regardast plus. Mais c'est que vous auez voulu que leurs yeux fussent employez pour contempler, admirer , & adorer vostre puissance absoluë, qui est tellement brillante & brulante , qu'il y en a desia beaucoup d'aueuglez par les eclats de sa gloire.

Vous reprochez aussi à la Royne *les maux que vous auez soufferts en Avignon en sa consideration, durant son esloignement de la Cour.* Dictes plustost que vous estes la seule cause des cruels desplaisirs que la Royne a receu à Blois, & que son depart de la Cour, & les affaires qui arriuerent deuant & apres, sont les effects de vos mauuais conseils, & de vos violences: vous estiez seul auteur de tout ce qui despleut au Roy , que nous n'accusons pas; mais sa Maiesté, qui a vne memoire excellente, se souuiendra bien, que vous estiez le grand Conseiller de ceux qui perdirent l'honneur de ses bonnes graces, les biens & la vie ; & que toutes les choses qui furent trouuées mauuaises, estoient sorties de vostre inuention. Ce n'est pas

T donc

donc le mal de la Royne Mere, qui a faict le vostre, mais le vostre qui a faict le sien, & vous auez plus de subiect de luy demander pardon, que de luy faire vn reproche.

Vostre Discoureur dict, pour monstrier que vous auez bien faict d'emprisonner la Royne; ce que vous appelez *pretendu arrest*, qu'il faut donner le coup pour ne le recevoir point. Quel coup vous a on voulu donner, que vous n'ayez deu souffrir, deuant que de frapper la Royne? vous estiez obligé de mourir plustost que de viure dans l'infamie d'ingratitude. Où sont les entreprises contre vostre vie, ny contre vostre liberté, ny mesme contre vostre faueur, qui vous ayent peu porter à venir aux extremitez que vous auez pris, & à donner ce coup pour ne le recevoir pas? Dans le discours que vous appelez *Coup d'Estat*, vous dictes que vous auez resisté pour le bien du Royaume, auquel vous croyez estre autant necessaire comme Dieu au monde; & dictes avec luy, *Par moy les Roys regnent*. Cela est autant esloigné de la verité comme de la modestie; il y auroit mesme quelque impieté de croire, que la Prouidence

diuine

diuine n'eust point d'autres moyens que ceux que vous pouuez fournir pour conseruer le Roy, & son Estat: vos actions persuadent le contraire, & ne peuuent produire que toute sorte de malheurs; si vos desseins ne sont bien tost arrestez par la puissante main de Dieu, qui appuyera celle des hommes qui s'opposeront à vous.

L'impudence de vostre Escriuain paroist en la page dix-neufiesme, là où il se mesle de faire vne verte reprimende au Roy: apres auoir representé à sa Maiesté, *que la cause essentielle de tous les malheurs de la France, est la promesse faicte au Coigneux d'un chapeau de Cardinal*; il a dict: *Vne autre fois vostre Maiesté sera plus retenuë, & considerera avec plus d'attention, à qui elle depart ses liberalitez.* N'est ce pas tancer le Roy d'imprudence, precipitation & temerité, de n'auoir pas eu l'esprit de considerer, quand, comment, à qui, & ce qu'elle promettoit? Que pourriez vous dire dauantage, si le Roy estoit vn petit escolier, & vous son pedagogue? Ce discours est suffisant pour confirmer ce qu'on a voulu persuader, que vous entrepreniez de reprendre & gourmander le Roy;

& qu'en arrachant les plus belles pieces de sa Couronne, vous mesprisiez la teste qui la porte, sans confiderer que sa main de iustice vous peut donner sur les doigts. Si nous qui sommes dans la defense de l'innocence, & dans la souffrance des maux qu'on nous faiët sous l'autorité de sa Maiesté, auions escrit avec cette irreuerence, on publieroit que nos escrits deuroient estre brulez par la main du bourreau ; là où les vostres remplis d'iniures contre le Roy sont impunement criez dans Paris, & distribuez par tout le Royaume.

Ce qui augmente l'estonnement, est, que M^{rs} du Parlement dissimulent non seulement le mespris de la M^{te}, mais encore de la iustice Royale, qui est entre leurs mains. Comment ont ils peu souffrir ces paroles qui sont és pages vingt-six & vingt-septiesme, *que le Roy enuoye & adresse les Edicts & declarations aux Parlemens plustost par honneur, pour estre publiez. & pour estre enuoyez aux Iuges inferieurs, que pour estre authorisez.* Il adioust plus bas, *qu'il faut receuoir les Edicts & declarations, comme articles de foy :* & en l'autre

page

page il dict , que *M^{rs} du Parlement* refuserent la
declaration contre Monsieur plustost par ialousie, que
par raison. Ainfi escrit cet infame sycophante,
 qui a souuent dict en vostre presence, qu'il fail-
 loit chastier ces pedants du Parlement; encore
 qu'il y en aye dans ce grand corps vn bon nom-
 bre de meilleure maison, que ce poltron, qui ne
 tira iamais l'espée du fourreau, & auquel on peut
 contester sa noblesse. Les Roys ont voulu que les
 Parlemens retinssent quelque espece de l'ancien-
 ne liberté des peuples, & representaissent en cer-
 taine façon les trois Estats, qui ne peuuent estre
 appelez dans tous les rencontres des affaires de
 grande consequence. C'est pour cela, que cette
 auguste Compagnie a esté composée de gens
 d'Eglise, & de Nobles, & que le tiers Estat y a eu
 entrée du depuis. Les bons & iustes Princes qui
 les ont assemblez, n'ont pas voulu que les Edicts
 nouueaux & les declarations importantes leurs
 fussent adressées par ceremonie, pour laquelle il
 ne faudroit point prendre la peine de demander
 les suffrages, de les peser, & de les compter; mais
 d'escouter la lecture de ce qui est apporté, & le

mettre dans vn registre; afin que la posterité le trouuaſt là dedans, non pas comme approuué, mais comme inſinué, & pour eſtre gardé dans les archiues du Roy : la préſence duquel ne ſeroit point neceſſaire, mais il ſuffiroit d'enuoyer ces pieces par le Commis de quelque Secretaire d'Eſtat; & aux Parlemens eſloignez, par les meſſagers ordinaires. Si le genereux Preſident du Harlay viuoit, on feroit bonne & briefue iuſtice à ce beau diſcoureur, & on condamneroit au foüet tous ceux qui crient dans Paris, & meſmes deuant la porte du Palais, ces infames eſcrits: mais il faut eſperer qu'Aſtrée fera à ſon tour Nemis.

La conſeſion de ce bel ouurage eſt à la mode de cet Eſcriuain, qui finit touſiours par vos eloges, parce que ſon deſſein principal eſt de vous plaire; ſçachant bien que ce qu'il eſcrit ne peut agréer qu'à vous ſeul, qui eſtes la perſonne du monde qui ſe laiſſe le plus piper par les loüanges: & nous pouons dire, que la maladie de voſtre cerueau eſt ſemblable à celle des femmes, qui eſt pluſtoſt apaiſée par les puantes odeurs que par les douces.

douces. Les plus infames flatteries sont les meilleures pour vous; entre lesquelles la prise de la Rochelle est tousiours la premiere: c'est vn ouvrage auquel on ne faict point de part ny à Dieu ny au Roy; il est tout reserué pour vous, qui en auez eu tout l'honneur & le profit. Vostre insolence est passée plus auant: nous auons sceu d'un grand Prelat, fort sage & tres-vertueux, qu'apres la reddition de cette place, lors qu'il vous tesmoigna sa resioiïssance, vous fustes tellement transporté, que vous luy distes, qu'il escriuiſt hardiment, que vous auiez pris la Rochelle en despit de trois Roys, entre lesquels celuy qui vous auoit donné le plus de peine estoit le Roy de France; pour les autres deux on entend assez que c'estoient, le Roy d'Espagne, & le Roy d'Angleterre: cela est tellement veritable, qu'il n'est pas plus vray que vous estes Cardinal.

Voila quelques eschantillons de trois pieces, qui sont imprimées non seulement sur vostre approbation, mais par vostre commandement; & dans lesquelles, sur tout en la premiere, il y a quelque chose de vostre façon. Si nous voulions
refuter

refuter toutes les choses, & anatomiser les paroles, nous remarquerions autant de traicts de malice & d'imprudence, comme il y a de syllabes; outre que cela nous obligeroit à faire des liures trop espais: nous n'employons contre vous que les pieces de vostre production; & declarons, que n'ayant point l'autorité, nous n'auons pas aussi la volonté de defendre la lecture de vos escrits, comme vous faictes des nostres: au contraire, nous prions tous les François de lire les œuvres de vos flatteurs, qui sont aussi mauuaises que vos actions; & nous pouuons dire avec verité, que iusques à present vous n'avez point trouué de bon esprit qui les aye voulu soustenir; il semble aussi que Dieu vous aye osté le vostre, depuis que vous avez quitté la vertu.

*Responſe
au libelle
intitulé
l'Inno-
cence
iuſtifiée.*

Vostre Eſcriuain, qui a la plume ſeconde, nous a enuoyé vn libelle nouueau, qui porte ſur ſon front effronté le tiltre *d'Innocence iuſtifiée*; qui luy eſt donné avec autant de raiſon & de pudeur, comme à vne deſbauchée le nom d'yne femme de bien. C'eſt en eſſect vn liuret diffamatoire contre Monſieur le Duc de Vandosme, & contre

Mon-

Mr le President le Coigneux, Chancelier de Monsieur: ce qui nous faict voir que vous croyez estre iustificié, lors que vous aurez faict voir que vos ennemis sont coupables. A la verité, cela vous pourroit seruir en quelque façon, si vous monstriez qu'ils ont esté malicieux en vous calomniant, & que vous eussiez cet aduantage de refuter par bonnes pieces & raisons les crimes qu'ils vous auroient imposez: mais nous ne voyons rien de cela dans vostre *Innocence iustificée*; nous n'y lisons au contraire, que des recriptions contre le President le Coigneux, qui ne sont pas iustifications pour vous; & des impostures nouvelles contre Mr le Duc de Vandosme, qui ne vous a iamais ny accusé ny offensé, qui a souffert avec patience & silence que vous l'ayez despoüillé de son Gouvernement de Bretagne, & honnestement chassé de France. Vous n'avez point de raison d'appeller son peché, & celui du President le Coigneux (s'ils en auoient faict) vostre innocence; laquelle ne despendra iamais des fautes pretendues d'autrui, mais de vos bonnes actions. Vous seriez malheureux, si vous ne pou-

V uiez

uiez estre homme prudent & vertueux, si vos ennemis n'estoient fols & vicieux; & vous deuriez craindre qu'ils ne voulussent par despit estre gens de bien & sages, pour vous faire paroistre meschant & insensé.

Nous auons vne autre preuue pour monstrier que vous ne pouuez iamais estre iustificié innocent: elle est tirée de la parole de Dieu, qui a dict,
 Prou. 28 *que celuy qui se haste pour estre riche, ne sera point innocent.* Qui s'est plus hasté & precipité que vous, qui auez acquis dans sept ou huiet ans deux cens mille escus de rente, auez basti & meublé des maisons pour plus de deux millions d'or, & auez mis dans deux citadeles trois fois autant, sans beaucoup d'autres choses que nous ne dirōs pas: de sorte qu'il faut, ou que la parole de Dieu ne soit point veritable, ou que vous ne foyez ny innocent ny iustificié; & vous qui autrefois auez faict rages d'arguer sur les bancs de Sorbonne, ne scauriez respondre à cet argument. Je ne rangeray point en bataille, pour combatre vostre pretenduë innocence, tous les maux que vous auez faicts, tous les hommes qui ont esté sacrifiez à
 vostre

vostre ambition, tous les pauvres que vostre avarice tuë tous les iours, toutes les violences que vous avez faict souffrir à vostre Maistresse & Bienfaitrice, & celles que vous continuez à l'endroit de trois cens prisonniers de toutes qualitez, qui sont les victimes de vostre furie & vengeance. Si apres tout cela vous meritez les tiltres d'innocent & de iustifié, nous ne croyons pas qu'aucun homme puisse estre coupable devant Dieu, qui a dict, *que tout homme vivant*, & sur Psal. 142 tout comme vous faictes, *ne sera point iustifié devant luy.*

Vostre flatteur remplit vne de ses cinq feüilles d'une grande preface, qu'il tasche d'embellir de similitudes, comme on faict l'entrée des Eglises vn iour de pardon de quelque lierre & papier peint. Pour monstrier sa pieté, de laquelle il n'a iamais eu que les contenance & les mines, ayant esté plus soigneux de porter les marques dans sa pochette, que les effects dans son cœur; il tord sa teste à l'accoustumée, il roule ses yeux en haut, & dict en ton d'hypocrite & caffard: *O donc sainte Verité, fille du Ciel, ie vous inuoque, & vous*

coniuire de faire voir que vous m'inspirez ces paroles; & que comme vous estes belle, simple, & naïfue, elles sont pures, sans art, & en leur pureté i'examineray toutes choses. O le beat, qui est plus capable de presenter vn poulet d'une main, en tenant vn chapelet de l'autre, que de faire descendre la Verité du Ciel ! ô le sainct personnage, qui veut seruir d'escuyer à la fille de Dieu ; ayant rendu à ce qu'on dict, & continuant de rendre cet office aux dames, qui ont prostitué leur honneur à la puissance, aux faueurs, & aux Finances ! n'est ce pas cet homme qui fut chassé par le feu Roy pour auoir voulu faire vne cabale dans la Cour, en se seruant en mesme temps de deux choses bien contraires, de la Religion, & de l'amour ? Il a si grande peur de n'estre pas reconnu, qu'il dict en la page vingt-troisiesme, *qu'il couroit le cerf avec le feu Roy* : mais ce vieux chasseur ne dict pas qu'il fut chassé pour n'auoir pas si bien entendu la venerie de Venus, comme il a faiet du depuis la volerie de Mercure. Il dict aussi en la premiere page, qu'il est *auther du discours faiet sur les libelles, touchant le gouvernement de l'Estat.* Quand

il

il ne l'auroit pas dict, nous l'aurions bien reconnu; & qu'il est vn des Eſcriuains ou Secretaires de vostre cabinet, dans lequel il apprend les nouuelles que vous desirez qu'il sçache: car pour les secretes, nous voyons bien ou qu'il les ignore ou qu'il les deguise, lors qu'il dict *que vous possédez* Pag. 9.
les cœurs & les courages des plus vaillans, & des plus habiles. C'est sans doute que vostre flatteur croid estre le chef de ces deux sortes de personnes: mais comme le bon Seigneur ne vous donne que la mine, à cause du bien que vous luy faictes, non-obstant la mauuaise opinion que vous auez de luy, il s' imagine, que les contenance de ceux qui sacrifient quelque visite, compliment, protestation, & mesme quelque seruice à vostre pouoir, en mesprisant & detestant vostre personne & vos desseins, vous donnent leurs cœurs & leurs esprits; mais ces offrandes sont de celles que les anciens appelloient representations, qui se faisoient avec de la cire & de la paste, auxquelles on changeoit de figure selon la necessité & les occasions. Pensez vous que celuy qui escrit pour vous, vous offre autre chose; & ne croyez

vous pas, qu'il feroit contre vous, si la fortune vous auoit tourné le dos?

Pag. 10.

Il dict, *que nous trouuerons que tous les mulets desquels nous auons parlé, c'est à dire, qui ont porté vos thresors au Haure, n'estoient chargez que d'auoine & de foin, pour repaistre des asnes comme nous sommes.* Ainsi escriuent ceux qui sont plus voisins de Mirebalais que nous, & qui vous ont faict achepter cette terre; afin que vous fussiez Seigneur comme vous estes Maistre des plus grands asnes de France. On verra vn iour, lors que la porte de la iustice nous sera ouuerte, si on eludera deuant cette auguste Compagnie du Parlement de Paris ce chef d'accusation contre vous, d'auoir faict transporter au Haure les Finances desrobées au Roy, & tirées du sang du peuple, en disant que vingt & cinq mulets sont partis avec vne grande escorte de gens de guerre, qui n'ont point logé dans les villes & dans les bourgs pour porter dans de barrils & ballots, à trente & cinq lieües de Paris du foin & de l'auoine.

Pag. 11.

Vostre Escriuain faute des asnes au Dieux, &
dict

dict *que ce n'est pas merueille si on vous fait descendre des Roys, puis que les Payens faisoient sortir les grands personnages des Dieux.* A la verité, il y a peu de chose à oster de Dreux à Dieux : mais comme les idolatres des Empereurs mentoient, aussi font les vostres, qui vous font descendre de la maison de Dreux; & ont obligé les curieux à la recherche de vostre genealogie, & à tirer vn certificat d'vn Conuent de Cordeliers, qui ne vous est pas honorable.

Vous auez fait dire en la page vnziesme *que* Pag. 11.
vous n'auiez peu resister à la bienueillance, & à la liberalité du Roy, qui vous ont forcé de prendre les charges & honneurs que vous possédez. Si cela est que vous soyez riche & puissant par contraincte, vous estes plus digne de compassion que d'en-
 uie; & vous vous estes acquité d'vne tres-grande obligation, lors qu'on vous accable de tant de dons, de dignitez, de places, de gouuernemens, & d'emplois contre vostre volonté, qui gemit sous ses fardeaux; desquels on ne croit pas pourtant que vous desiriez d'estre deschargé, n'ayant point trouué iusques à present qu'vn
 pauvre

En la
Défense
des Mi-
nistres.

pauvre Moyne qui aye voulu estre caution de ce dessein. Je m'assure que cet Escrivain, qui a par vostre moyen quelque chose à perdre, ne s'offrira pas seulement pour estre certificateur.

Pag. 12.

Il dict, *que le Roy vous a cheri deslors que vous estes entré en son service par une liaison d'esprits causée par aduantage par une occulte conspiration des astres.* Il ne sçait donc pas que iamais sa Maiesté n'a eu auersion d'homme comme elle a eu de vous, qu'elle a reculé de deux ans vostre promotion au Cardinalat; & que durant deux autres années vous n'approchiez iamais du Roy, qu'il ne dist, en tournant le dos, *Voicy venir le fourbe;* que son visage ne changeast, & que son esprit ne fust en garde. Sans faute, les astres n'auoient point operé dans les naissances, & cette sympathie imaginaire ne vient pas du Ciel, si par quelque notable reuolution les constellations ne se sont rencontrées depuis six ans seulement. Vous sçauiez bien la peine qu'on eut à surmonter les influences qui vous estoient contraires, & les soins que la Royne (que vous traictez avec tant d'ingratitude) prist pour vous les rendre fauorables,

rables, la peine qu'elle a eu pour vous remettre dans les bonnes graces de sa Maiefté; & combien de fois vous vous estes ietté à genoux deuant elle, pour la supplier les larmes aux yeux de vous conseruer, lors que vous auez esté sur le point d'estre chassé. Ce qui excuse vostre flatteur, est, qu'il dict *par aduanture*; & nous adioustons, pour estre plus barbares, & plus veritables que luy, par male aduanture.

Pour monstrier que vous n'estes pas content de la plus grande partie des ports de l'Océan, & qu'il faut que vous ayez le reste, & ceux aussi de la mer Mediterranée, vous faictes que vostre Iustificateur dict au Roy: *Pour les ports de mer, la loy de bienseance qui porte son thrône par tout, les donne & les attache à sa charge de Surintendant des mers.* A ce compte là nos Roys n'ont point gardé cette loy de bienseance, n'ayant iamais donné trois ports à vn Admiral. Je croy aussi, que par *cette loy de bienseance* vous ne parlez point de celles des Roys, mais de la vostre, *qui porte, comme vous dictes, son thrône par tout*; c'est à dire, qui veut regner par tout. Si on ne luy resiste, el-

le est par ce droict de bienſeance Maistresse du Royaume: & s'il n'y a rien à faire, lors qu'on a la puissance, qu'à prendre tout ce qui nous ac-
cōmode; il n'y a point de doute, que vous n'ayez trouué le moyen de porter vostre thrône non seulement sur la Royauté, mais sur l'Empire, & principalement sur la Papauté. Par ce discours on void où vostre aueuglement vous faiet broncher, & où l'ambition vous conduict.

Pour empescher que le Roy ne s'y oppose, & pour le disposer à vous donner le reste du Royaume, duquel vous & vos creatures tenez desia presque la moitié; vous dictes, *que les fauoris sont les parellies & images du Prince; lors qu'il ne luit plus sur eux, & pour eux, ils tombent dans le neant: c'est pourquoy il n'y a rien à craindre.* Quand on leur donne ou qu'ils prennent toutes les Prouinces, places & charges, pourueu qu'on garde le nom de Roy: il sera suffisant, à ce que vous dictes, pour deffaire celuy qui en aura l'effect; comme si les Histoires du monde n'enseignoient point par mille exemples, que les seruiteurs deuenus trop puissans ont chassé leurs Maistres, qu'ils

qu'ils ont partagé les Royaumes avec eux; qu'ils ont resisté, lors que ceux là mesme qui les auoient faiçts les ont voulu deffaire; & que la ruine de leur fortune a plus cousté de sang & d'argent, que n'auoit faiçt le bastiment. Outre cela, tout Souuerain doit considerer qu'il est mortel: cette condition le faiçt souuenir, que si Dieu l'appelloit deuant son fauory, peut estre qu'il ne seroit point en humeur de rendre au successeur les pieces de la Couronne qu'il auroit en sa main; & desquelles les Roys ne peuvent disposer que pour leur vie, qui doit estre reglée plustost par la prudence, qui enseigne de n'abandonner iamais tout son Estat à la disposition d'un homme: la liberalité ne permet pas aussi qu'on donne tout à vn. Ces vertus doiuent plustost conduire les actions d'un grand Prince qu'une affection trop chaude, & trop prompte, qui n'est pas vne estoille pour esclairer les Roys, mais vn feu folet qui les meine dans vn precipice.

Ce feu fat qui sert de guide à l'esprit de vostre Escriuain, luy faiçt dire au Roy: *Vostre Ma-*

iesté qui commence encore, s'il faut ainsi dire, à pousser dehors les boutons, les fleurs, & les fruits de son courage. C'est vne belle loüange que vous donnez à vn Roy de trente ans : vous diriez que ce n'est que depuis que vostre souffle a touché le grand arbre qui nous couure, & à l'ombre duquel nous viuons, qu'il nous a donné des feüilles, des fleurs, & des fruits; & qu'auparauant c'estoit vn aloës, qui auoit demeuré trente ans rempant en terre, estant monté tout à coup, comme faiët cette plante, lors que vous l'auiez arroufée & eschauffée. Toute la France & les Pays estranges auoient veu avec admiration les fruits excellens des vertus de sa Maiesté, deuant que vous, qui vous en donnez toute la gloire, les eussiez desfrobez.

Pour monstrier que vous estes par tout contraire à vous mesme; vous qui loüiez les boutons & les fleurs naissantes de sa Maiesté, depuis que vous auez esté auprès d'elle, estimez les fruits *de la iustice que le Roy fit du Marechal d'Ancre*, il y a quatorze ans, à vostre compte : les fruits estoient donc venus deuant les fleurs,

&

& vous les auiez sentis en vostre bannissement que vous approuuez.

Vostre Escruiuin veut faire passer le feu Roy pour Prophete, & dict qu'il est tesmoing de la prediction de ce grand Prince, qui assura *que son Estat seroit mal gouverné apres sa mort par Conchine*. Celuy qui escrit cette Histoire, a logé cent menteries dans vn liuret de cinq feüilles, & en a mis cinq ou six dans trois lignes; c'est icy où il dict qu'il chassoit avec le Roy Henry le Grand: il veut faire croire qu'il estoit en consideration aupres de ce Prince, qui mesprisoit cet homme par dessus tous ceux de son Royaume.

Il adiouste, *que nous auons veu les effects de cette* Pag. 24.
prophetie, & quelques restes du gouvernement defectueux des femmes. Se peut il bien faire, que ceux qui escriuent pour vostre defense, blasment vne conduicte dans laquelle vous auez eu tant de part, que les esclats de son renuersement tomberent sur vostre teste, & l'eussent ecrasée, si la mi-
 tre ne l'eust vn peu defenduë? Vos violences & imprudences firent les maux à la Roynes, que vous reiettez sur elle. Osez vous parler du gou-

tiernement des femmes, vous qui en auez receu tant d'aduantages; & le nommez vous defectueux apres qu'il a si bien establi vostre fortune? Les ennemis de la Royne ny trouuerent rien à redire que vostre aduancemēt: vous estes d'accord avec eux contre vous mesme; & pour faire mespriser vostre Maistresse, vous aduoüiez qu'elle a mal faict de vous auoir faict ce que vous estes. Si la protection du Roy, & la puissance que vous auez iniustemēt vsurpé, ne vous seruoient de preseruatif, vous ne vous empoisonneriez pas si hardiment comme vous faictes: vous estes semblable à vn charlatan, que nous auons veu sur le Pont neuf: il mangeoit les testes de viperes avec du sublimé, parce qu'il estoit assuré du remede qu'il auoit souuent esprouué.

Pag. 24.

Vous reuenez tousiours à Chalais, & vos Escriuains luy baillent autant de coups de meschante plume, comme celuy que vous fistes passer maistre bourreau sur sa teste, luy frappa de coups avec la vieille espée d'un Suisse. Vous citez deux tesmoins, qui, peut estre, sont enterrez, comme son procez brulé.

Vous

Vous dictes *que Chalais protesta devant que de mourir, qu'il n'auoit chargé personne au preiudice de la verité que Madame de Cheureuse, qu'il auoit deschargé.* Passe pour l'honneur des Princesses que vous honnorez, & desquelles vous ne deuriez parler, ny en bien ny en mal. Il ne les faut iamais mesler dans nos discours, ny dire qu'on les charge & descharge. Je m'estonne fort, que vous n'ayez tancé vostre indiscret Iustificateur, qui a oublié de dire, que Chalais estant conduict au supplice, & sur l'eschaffaut, repeta plusieurs fois, *Ah traistre Cardinal!* Vous sçauiez bien aussi ce qu'on fit au Minime qui l'auoit confessé; & où ce pauvre homme a esté enfermé, & peut estre etouffé à present. Il n'y a point de doute, que dans vos frequētes visites, durant la prison de Chalais, vous ne l'ayez porté à accuser ceux que vous croyez estre contraires à vos desseins, apres luy auoir promis impunité, pour luy faire dire plus qu'il ne sçauoit. Cet artifice n'estoit qu'une fuite de celuy qui auoit commencé la tragedie, qui estoit toute de vostre inuention; & il n'y a rien de plus vray que ce qui est dans la lettre de Monsieur

sieur

fieur sur ce subiect, qui vous a tellement picqué à cause de sa verité, que vous y portez tousiours la main, & vos Escriptuains leur encre, qui aigrissent plustost qu'ils ne guarissent cette playe.

Pag. 25.

A quoy pensez vous, lors que vous dictes *que le grand Prieur fut accusé par Chalais d'auoir proposé, que pour tirer le Marechal d'Ornano de prison, il vous falloit poignarder, & si on estoit pressé s'en aller en Flandres?* Cette deposition pretenduë estant posterieure à l'emprisonnement du grand Prieur, n'en pouuoit estre la cause: il est donc bien plus probable, que pour iustifier la detention precedente, vous auez extorqué cette declaration; & ainsi vous auez arresté vn Prince non seulement sans crime, mais deuant qu'il fust accusé. Si vous l'eussiez sceu lors qu'on se faisoit de sa personne, & de celle de Monsieur de Vandosme son Frere, vous n'auriez pas manqué de le publier: mais au lieu que la condamnation supposoit vn crime, vn accusateur & des tesmoins, vous condamnez les hommes à la prison; & apres vous supposez des crimes, & cherchez des accusateurs & des tesmoins, pour tascher de
monstrer

monstrer qu'une persécution sans cognoissance de cause a esté vn iuste chastiment. Vous vous souuiendrez aussi, s'il vous plaist, d'auoir dict il y a trois ans, qu'une personne qui possede maintenant vos bonnes graces, estoit le chef du conseil pris de vous assassiner: ce qui faict voir qu'il faut que cette histoire soit inuentée; car sans doute vous ne vous fieriez iamais, iusques au point que vous faictes, à ceux qui auoient tenu les dez, avec lesquels vous auez dict qu'on ioüoit vostre vie, & qu'on iettoit au sort qui auroit la commission de la vous oster. Ce que vous dictes du dessein d'enleuer le Marechal d'Ornano, n'a point d'apparence, parce qu'il y eut si peu de iours entre sa detention & l'enuoy que vous fistes de Mr le grand Prieur, pour luy faire conduire innocemment Mr son Frere en prison: & le Marechal sur ces commencemens estoit gardé dans le donjon de Vincennes, avec tant de sureté qu'il n'y auoit point de puissance qui le peust oster à celle du Roy, ny de corruption à la vostre. Apres tout cela, pour vous conuaincre entierement d'imposture, il vous faut faire souuenir d'une chose

Y que

que vous auez dict si souuent, qu'on peut iuger que c'est plustost le manquement de conscience que de memoire qui vous faict escrire que dans le mesme conseil, où on auoit traicté de vous poignarder, on auoit deliberé de mettre en liberté le Marechal. Vous sçauiez bien que vous auez assuré cent fois, que cette resolution d'attaquer vostre personne auoit esté prise deuant sa detention: ce qui fit croire à ceux qui entendoient ce discours, que la fausse creance que vous auiez eu de cet attentat, estoit la vraye cause de son emprisonnement, qui fut aussi celle de la captiuité du grand Prieur; & en suite de la mort d'un Prince, & d'un Marechal de France: en quelle façon que ce soit, vous les auez perdus. Vous dictes *que celuy là estoit mal sain, & estoit fort incommodé de la pierre*: il le fut encore bien dauantage par celle du donjon de Vincennes; l'autre estoit subiect à vne suppression d'vrine: ces deux maladies se guarissent ou se soulagent par vn peu d'exercice; vous l'auez osté par vos grandes rigueurs, qui ne leur ont iamais permis la sortie hors d'une petite chambre: vous auez donc tué ces deux personnes;

sonnes ; comme celuy qui laisse mourir de faim le pauvre, l'estrange. Ainsi par vostre confession nous voyons le subiect de l'emprisonnement, & de la mort, sans nous arrester à ce que la lumiere de Dieu esclairera vn iour.

Vous dictes aussi *que le Cardinal de Berule est mort de repletion*, & le faictes passer pour vn pöüacre; mais on crainct fort que vous ne mouriez d'inanition, non de dignitez, de biens, & de vanité, qui vous font creuer; mais de sang & de sens.

Pour Fancan vostre Medecin des corps & des esprits, dict *qu'il est mort de remors de conscience, pour auoir eu, estant Prestre, de trop grandes communications avec ceux de la Religion pretendüe reformée*. Il est vray qu'il en pouuoit auoir eu par les mesmes ordres, que vous avez donné du depuis à vn Moine des plus reformez en habit, qui traicte de vostre part avec tous les Protestans, & les Turcs. Celuy là n'a esté ruiné que pour vous auoir trop cognu, & sceu vos secrets qui tiennent encore son frere prisonnier: vostre Moine n'en fera pas peut estre meilleur marchand.

Vous estes comme les dames , qui croient auoir trouué le moyen de couurir leur mauuaise vie en se deffaisant de ceux qui ont esté les ministres de leurs amours.

Parmy ces choses non seulement serieuses , mais deplorables, vostre Escriptuain en mesle des ridicules , comme lors qu'il dict, *que si le Marechal d'Ornano ne fust point mort d'une suppression d'urine, on l'eust mené a la Conciergerie*. Vous n'avez pas voulu dire qu'on luy eust donné des Commissaires, comme on a faict à vn autre de mesme condition : mais vous dictes que ç'a esté vn grand bon-heur pour luy qu'il soit mort (comme on dict à Paris) de sa belle mort , parce qu'il en eust souffert vne fort sale . Au mesme endroit vous dictes, *que Modene & de Haian auoient esté ses principaux conseillers* . Pourquoi donc les avez vous gardez en prison trois ans apres la mort du Marechal ? pourquoi les en avez vous tirez sans forme de iustice, ou sans abolition ? pourquoi les avez vous faict conduire à soixante lieües de Paris , pour de là les renvoyer chez eux ? pourquoi avez vous eu ap-
pre-

prehension qu'ils ne vissent quelqu'un à Paris, ou auprès, pour descouvrir vos iniustices? Mais pourquoy ne les auez vous enuoyez à la Conciergerie? Il n'y a point de doute que le priuilege de celuy qui estoit Secretaire du Roy ne vous eust porté à le faire, si vous eussiez eu de quoy luy faire faire son procez. Je vois bien qu'il y auroit moyen de vous faire rougir sur ces affaires, & sur vos escrits, s'il vous restoit vn peu de bon sang: si c'est l'esclat de vostre pourpre, ou les frequentes saignées, ou la grande habitude de mal faire qui empeschent que vostre honte ne paroisse, ie m'en rapporte; nous auons vne autre question à traicter.

En la page vingt-huictiesme de vostre Iustification vous entreprenez vn grand discours, pour monstrier *que le Roy a eu raison d'oster le Gouvernement de Bretagne à Monsieur de Vandosme, parce qu'il a tasché de diuertir le peuple de l'obeissance qu'il doit à cette Couronne* (vous parlez en Roy) *parce qu'il s'est faict appeller Monsieur le Duc sans queüe*; (prenez mieux garde à ce que vous escriuez) *qu'il a faict mettre dans les prieres*

*du Missel, pro famulo tuo Duce nostro; qu'il a voulu corrompre le Lieutenant du chasteau de Nantes; qu'il s'est servi du Pere George, Recolet, qui sous pretexte de quelques predications & confessions disposoit les femmes d'eminente condition, (regardez bien à qui vous donnez l'eminence) de persuader à leurs maris de prendre son party. Bref qu'il a tasté le poux de la Noblesse, des Parlemens, de la chambre des Comptes & du tiers Estat; (iamais Medecin n'en tasta si grand nombre) & que tout cela ne tendoit qu'à se faire Duc. Toutes ces cognoissances vous deuoient fournir plus de mille tesmoins contre ce Prince, qui n'estoit pas en estat ny les siens de les intimider; vous n'auez eu qu'un miserable emballeur de menfonges de Lambale, qui a esté pendu à la Croix du tiroir, pour auoir dict qu'il auoit esté corrompu par argent pour deposer contre M^r de Vandosme. On n'a point veu de tesmoins, qui ayent ouy ces prieres *pro Duce nostro*; point de Dames practiquées par le Pere George, point d'homme des trois Estats auquel on aye parlé, ny de Lieutenant du chasteau de Nantes qui aye esté interrogé. Si*

vous

vous eussiez eu ces preuues publiques, vous n'aurez pas manqué de les produire; vous n'aurez pas eu recours à vne demissiõ du Gouuernement, qui a esté le pris de la liberté de ce Prince, mais vous l'auriez osté avec Iustice. Pour monstrier que ses fautes ne vous en ont point donné, vous changez de batterie, & dictez *qu'il a esté depossédé par raison d'Estat; qui ne peut souffrir que celuy qui pretend quelque droit sur vne Prouince, pour estre descendu de ceux qui en ont esté Souuerains, en aye le Gouuernement.* Sur quoy vous dictez, *que Henry III. faillit en donnant celuy de Bretagne à Mr de Mercœur; que le feu Roy fit la mesme faute, en le mettant entre les mains de Mr de Vandosme.* Vous alleguez aussi *vn Factum de feu Madame de Mercœur; de laquelle vous dictez, que toute sainte qu'elle estoit, ne laissoit pas de faire mention de ses pretentions.* Vous donnez poids à vos raisons par l'autorité du Cardinal d'Osat; qui escriuit à Monsieur de Villeroy, *qu'il s'estonnoit de ce que le Roy donnoit les Gouuernemens des Prouinces à ceux qui auoient des pretentions, quoy qu'elles fussent vieilles ou prescriptes.* Il est certain que si cette loy
rigou-

rigoureuse, de laquelle nous ne disputons pas, auoit lieu, le Roy l'a violée en vous faisant Gouverneur de Bretagne, ou il faut que vostre genealogie soit fausse. Vous aurez agreable s'il vous plaist, que ie la vous represente le plus succinctement que ie pourray, & que ie me serue de vos armes pour vous combattre. En la page soixante deux & soixante trois de vostre genealogie, qui vous faiët descendre de Louys le Gros par la branche de la maison de Dreux, qui est venue iusques à vous par vostre grãd Mere Françoisse de la Rochechoüard, vous dictes qu'elle estoit issuë de Marie de Bretagne Comtesse de S. Paul, & fille de Iean II. Duc de Bretagne, & de Beatrix d'Angleterre. Vous assurez aussi au mesme endroit, que vous descendez de Blanche de Bretagne. Vous ne pouuez donc pas auoir le Gouvernement par la regle que vous avez faiët, si vostre genealogie appuyée par vostre puissance n'est plus forte que vostre loy. Souuenez vous qu'en l'an 1626. pour ietter le fondement de la destitution de Monsieur de Vandomme, vous fistes coucher sur les registres des Estats de Bretagne,

tagne, tenus à Nantes en presence du Roy, la resolution qui fut arrestée, *que sa Maïesté seroit tres-humblement suppliée de ne donner point le Gouvernement de cette Prouince à ceux qui seroient descendus de la maison de Bretagne, & qui pourroient auoir pretensions directes ou indirectes sur la Souueraineté de ce Pays.* Au preiudice de cette deliberation vous auez faict, que les mesmes qui l'ont prise vous ont demandé pour Gouverneur. Ou supprimez vostre genealogie, ou declarez la fausse; ou aduoïez que vous faictes des loix assez fortes pour deposseder les Enfans des Roys, & trop foibles pour empescher les vsurpations des petits fils de Moine.

Ce que vostre Escriuain adioust, n'est pas Pag. 31. moins contre vous que les ordonnances que vous auez faict: il dict, *qu'il ne faut point irriter l'ambition & le courage des Grands, puis qu'il faut* Voyez la Genealogie. *toujours octroyer en un Estat la moindre puissance à celuy, qui a le plus de naissance.* Par cette maxime, vous qui estes descendu de nos Roys, de ceux d'Angleterre, de Nauarre, & des Ducs de Bretagne & de Normandie, des Comtes de Pro-
Z
uence,

uence, de Champagne, & de Toulouse; qui estes par dessus tout cela Prince de l'Eglise; ne deuez pas auoir tant de puissance, sur tout en vn Pays dans lequel vous tenez toutes les meilleures places: de sorte qu'il vous est tres-aisé de vous rendre Souuerain quand il vous plaira.

Pag. 32.

Vous dictes au Roy *que vous estes trop attaché à sa fortune pour luy donner de l'ombrage*. Vous visez avec sa Maiesté de termes d'un camarade de guerre: au lieu de dire que vous estes trop obligé à sa bonté pour luy donner ombrage, vous dictes que vous estes trop attaché à sa fortune. Pardonnez moy, si ie dicts que vostre fortune parle comme yure; & que vous auez aueuglé celle du Roy, si elle ne void bien tost les insolences & les entreprises de la vostre.

Fortu-
naque
dulci
ebria.

Et parce que nous sçauons bien où elle va, & que son dessein n'est pas de s'arrester en Bretagne, mais de passer au trauers du Royaume pour aller en Prouence, le tenir assiegé par les deux bouts, & enuironné par les deux mers; nous iugeons bien que vous desirez de faire valoir contre Monsieur de Guise *la mesme loy de bienseance*,
qui

qui porte, comme vous dictes, son thrône par tout,
 & qui vous a serui pour chasser Monsieur de
 Vandosme de Bretagne : vous la rendez trop
 generale, pour ne vous en seruir pas pour la
 Prouence ; pour laquelle vous alleguez la lettre
 du Cardinal d'Ossat faicte sur ce subiect. Mais
 vous en ferez exclus, comme de la Bretagne, par
 vostre genealogie, qui vous faict descendre (dans
 les pages soixante deux & soixante trois) des
 Comtes de ce Pays là par Eleonor de Prouence,
 que vous dictes estre issuë de la maison Royale
 d'Arragon ; voulant inferer par là, que les Roys
 l'ont vsurpée sur l'Arragonnois, & que sa Ma-
 iesté & tous autres pretendans n'y ont point
 de droict à vostre exclusion : cela est capable,
 si on ne vous veut punir de vostre crime, au
 moins de vous fermer la porte à ce Gouver-
 nement : & Dieu veuille que le temps ne des-
 couure pas, que la guerre de Gennes, à laquel-
 le vous donnez vn si beau pretexte, ne soit point
 entreprise, pour persuader au Roy qu'il est ex-
 pedient, pour tenir l'Italie subiecte, que vous
 ayez le Gouvernement de Prouence avec les

meilleures places , & la Generalité des Galeres.

Vostre genealogiste se tourmente bien fort pour vous faire descendre des Roys de Nauarre, & rencontre en fin que vous estes de ce Sang Royal, de deux costez : assauoir de par Blanche de Nauarre fille de Thibaut Comte de Champagne , & par Marguerite de Nauarre sœur de Thibaut II. aussi Comte de Champagne , & de Henry premier Roy de Nauarre.

Vous trouuez aussi que vous estes sorti des Comtes de Toulouse & d'Artois , & des Ducs de Normandie & de Guyenne , qui ont possédé ces Prouinces en souueraineté : mais vous vous attachez principalement à la Bretagne, Prouence, & Nauarre; ce qui doit estre fort suspect, parce que ce sont les dernieres pieces qui sont venuës à la Couronne. Vous voyez aussi par là de combien de Gouuernemens vostre vanité vous auroit priué, si vous ne croyez que vostre autorité aura plus de puissance que toutes les loix ; qui sont aux plus grands Princes du Royaume des barrieres bien fortes , & à vous des toiles d'aragnée.

Ce seroit vne grande merueille , si vous auiez assez de prudence pour accorder ce que vous faictes avec ce que vous escriuez ; mais ce pendant qu'on amuse les ignorans par les escrits , vous faictes progres par vos actions : vous opposez les loix à ceux qui vous attaquent, vous les enuoyez contre ceux qui vous resistent ; & vous tesmoignez que vous estes desia dans la Souueraineté , en vous mettant par dessus elles.

Vostre Escriuain qui suit vostre passion, comme vostre faueur les flatte toutes deux en mesdisant du President le Coigneux, le plus souuent & plus effrontement qu'il peut ; il veut finir son libelle comme il l'a commencé , & le charge de trois notables calomnies , qu'il croid estre pieces iustificatiues de vostre innocence . La premiere est l'accusation d'auoir laissé perir Chalais, *parce que Mr le Duc de Bellegarde, qui estoit son parent, poursuinoit son abolition.* Il assure que des gens de qualité luy maintiendront qu'il l'a dict : ils ne prendroient donc pas en mauuaise part s'ils estoient nommez en cet escrit , puis qu'ils sont prests à se declarer pour soustenir ce que vous dictes : mais

comme la chose en soy n'a point d'apparence, ce que vous escriuez des tesmoins en a encore moins; & vous les auriez produicts assez hardiment, si vous les cognoissiez, sur tout estant assuré que vous ne leur feriez point de desplaisir.

La seconde piece est, *que le mesme President le Coigneux empescha la bonne volonté que Madame de Guise auoit de poursuivre la liberté du Marechal d'Ornano; & vous dictes qu'elle fut destournée de cette loüable & sainte resolution.* Vous ne vous souuenez pas que vous auez escrit que le Marechal estoit atteint de crimes horribles, tous de leze Maïesté. Comment peut on appeller *sainte & loüable* la resolution de faire instance pour sa liberté, veu qu'il n'est point permis de solliciter, si ce n'est aux plus proches, pour ceux qui les ont commis? Croyez vous que cette Princesse, qui ne faict rien qu'avec grande consideration, eust entrepris cette poursuite? Et si elle l'eust trouuée iuste, pensez vous que le President qui n'auoit iamais parlé à elle, deuant le iour auquel il receut le commandement du Roy de luy aller dire, que sa Maïesté auoit resolu le Mariage de
de

de Monsieur avec Madamoiselle de Montpensier sa fille, eust eu le pouuoir de la diuertir d'une œuvre que vous appelez *saincte & loiable*? Je croy que le President ne me desdira pas, lors que j'assureray qu'il se tiendra pour conuaincu en ce chef, si vous estes aduoié par le tesmoing que vous alleguez, sa personne ne receuant point de reproche. Il n'y a point d'innocent qui ne se confesse criminel sur sa deposition, & qui n'adiouste plus de foy aux yeux & aux oreilles de Madame de Guise, qu'au tesmoignage de sa propre conscience. Je diray bien dauantage, que dans tout le traicté du Mariage de Monsieur il ne fut iamais parlé de la liberté du Marechal.

Après ce discours, vous donnez subiect au President le Coigneux de vous faire vn remercement, lors que vous luy faictes l'honneur de dire qu'il a contribué quelque chose par son industrie pour conseruer Mr de Puy-laurans dans les bonnes graces de Monsieur. Il est vray, que ce Seigneur estant vn des plus sages, des plus genereux, & des plus accomplis qui soient en France, & le plus digne de posseder les affections d'un grand

grand Prince, celuy qui a aydé à le maintenir (s'il en auoit eu besoin) auroit rendu vn notable seruice à son Maistre, & grandement obligé le public. Confessez donc en cet article, ou que vostre Escriuain s'entend avec ceux que vous luy commandez de blasmer, ou que vous auez eu dessein de rendre le President suspect d'auoir intelligence avec vous, lors que vous le loüiez en faisant semblant de l'accuser. Cela seroit suffisant de donner quelque ombrage, si vous ne luy auiez dict des iniures de harangere, & ne le chargiez aussi tost d'un grand crime.

Pag. 35.

Vous auez reserué pour la derniere & plus furieuse calomnie, vne re crimination, pour eluder l'accusation des empoisonnemens, desquels on a dict que vous estiez soupçonné: vous croyez que c'est le plus beau traict de visage de vostre Innocence iustificée, de monstrier la laideur d'un abominable peché du President le Coigneux. Vous dictes *qu'il a empoisonné sa troisieme femme, & qu'il est soupçonné d'en auoir fait autant à la seconde*. Je m'estonne comme vous n'y auez encore mis la premiere: pour la seconde, deux mille

mille personnes ſçauent qu'elle a langui long temps apres vne mauuaife couche: ſes parens, qui ſont de grande qualité, les Medecins, Chirur- giens, & Apoticaireſ l'ont veüe fort ſouuent du- rant ſa longue maladie; iamais perſonne n'a eu la moindre penſée de ce que vous diſtes; & chacun a ſceu que c'eſtoit vn tres-bon & tres-heureux mariage, que la mort naturele a rompu. Pour ce pretendu troiſieſme, nous pouuons dire qu'il n'a iamais eſté. Nous auons bien ſceu, qu'une cer- taine femme infame, qui a eſté entretenuë au- trefois par feu Moiffet, & qui auoit prostitué ſes filles, auoit perdu la derniere, qui mourut quel- que temps apres le depart du Preſident le Coi- gneux, & fut enterrée comme fille en la Parroiſſe de ſainct Euſtache; c'eſt à dire avec les draps, pa- remens, cierges blancs, & chapeau de fleurs: ce n'eſt donc pas ſigne que cette mere la tint pour femme mariée; encore qu'on diſt qu'elle n'eſtoit pas fille; & que vos parens & alliez en ſçauent plus de nouuelles que ceux que vous accuſez. C'eſt donc par le moyen de ceux là, & par la cor- ruption de voſtre argent, que trois ſepmaines

apres cette mort, la mere s'est aduifée de dire que
 le President, qui estoit bien loing de là, auoit fait
 empoisonner sa fille, par l'entremise de l'Euesque
 de Madore, qui n'a iamais veu la damoiselle, ny
 ouy parler d'elle qu'apres son decez: & pour lais-
 ser à part la question, si le President la cognois-
 soit aussi peu que l'Euesque, ie vous diray fran-
 chement, que c'est vne chose qui ne peut estre
 faicte, que durant vostre gouuernement, & par
 vostre puissance absoluë, de receuoir la plainte
 d'une femme abandonnée qui a vendu ses filles;
 & qui dict, trois sepmaines apres vn enterrement;
 qu'une morte qui a eu vn conuoy de fille estoit
 mariée, qu'une prostituée estoit femme d'un Pre-
 sident au mortier, & qu'elle a esté empoisonnée
 apres qu'elle a esté pourrie. Où sont les Medecins
 qui ont veu les marques deuant & apres la mort?
 où est le procez verbal de l'ouuerture du corps?
 où sont les tesmoins qui disent avec quoy on a
 donné le poison, & qui l'a apporté? où est le con-
 tract de mariage? Tout ce crime est reduict à la
 plainte acheptée d'une femme qui a vendu son
 ame, apres auoir vendu son corps; & qui s'est
 conten-

contentée de faire du bruiet, pour voir si celuy del'argent l'appaiseroit. Ceux qui vous auoient promis qu'ils feroient bien iouïr cette piece, ont publié le deshonneur de la mere & de la fille, ont faict cognoistre leur bestise, ont descouuert vostre malice, & ont porté quelques curieux à rechercher vostre vie priuée; de laquelle on ne veut rien dire, à cause du respect qu'on porte à la pourpre sacrée. Si nous le voulions entreprendre, nous dirions que ce ne sont pas des femmes impudiques, mais des plus vertueuses, qui se plaignent des attentats & violences que vous auez voulu faire sur leur honneur: vous sçauiez aussi qu'on vous a soupçonné de plus grands crimes en ce genre de peché. Nous ne croyons pas le mal si legerement comme vous faictes; nous ne le publions pas temerairement, & nous ne l'inuentons pas malicieusement. Nous sçauons qu'il y a vn flambeau de verité, *qui esclairera les choses obscures, & manifestera les conseils des cœurs, & pour lors loüange sera donnée de la part de Dieu à celuy qui aura bien faict*: comme le meschant receura aussi le blasme, & la punition de son vice. De-

1. Cor. 4

uant ce Iuge on n'aura point d'Eminence que celle de sa vertu, point de gardes que ses bonnes œuvres, point de citadelles que son innocence, point de retranchement que sa penitence, point de thresors cachez que les aumosnes, les prieres, & les ieusnes.

Vous dictes *que le President le Coigneux a confessé, que les songes qu'il auoit eu depuis peu de iours, luy auoient faict penser qu'il y auoit un Dieu : & vostre Escriuain dict, qu'il l'a leu dans la lettre d'un Genti'homme;* qui ne peut estre amy du President, & doit estre suspect, s'il l'a escrit: s'il ne l'a point faict, comme il est plus probable, vous luy imposez le plus grand crime, qui est de n'auoir point cognu celuy qui ne peut estre ignoré; & faictes paroistre que s'il a esté si abominable, Dieu l'a assisté d'une grace extraordinaire pour le conuertir, lors qu'il a entrepris de vous resister: ce qui feroit dire que la Maiesté diuine approuue grandement son dessein: mais vous ne sçauriez desmentir la croyance publique, dans laquelle le President est tenu pour homme fort religieux. Laissons là les songes qui sont men-
ges;

ges ; s'il s'y falloit arrester , on rapporteroit icy les tesmoignages de ceux qui ont couché dans vostre chambre, qui ont dict fort souuent, que vous en auez de plus espouuentables que celuy d'Apollodore , qui songea que les furies luy auoient arraché le cœur , & dançoient toutes en feu au tour de la marmite dans laquelle il boüilloit. Vous sçauiez ce que l'Escripture sainte a dict, *que la conscience agitée presume & craint tousiours* Sap. 17. *choses cruelles* : la vostre doit estre dans ces troubles , estant impossible qu'elle soit en repos , lors que vous rauissez celuy du Roy vostre Maistre, de la Royne vostre bonne Maistresse & Bien-faëtrice, de la Royne Epouse du Roy, de Monsieur Frere vnique de sa Maiesté, des Princes & Grands du Royaume, de deux Mareschaux de France, de plusieurs personnes de haute, mediocre, & basse condition, que vous tenez prisonniers ; de tout le peuple de France que vous affligez par la guerre, la famine, & la peste ; de toute l'Europe que vous renuersez ; de l'Eglise de Dieu qui patit dans ces mouuemens , & pert en beaucoup d'endroits l'exercice de la Religion , que

vous chassez par l'assistance que vous donnez à ses ennemis.

Quand toutes ces choses ne vous osteroient point la tranquillité de l'esprit, la pouuez vous conseruer estant tourmenté par les quatre bourreaux de la vie, qui sont l'ambition, l'auarice, la vengeance, auxquelles on dict que depuis peu vous auez adiousté l'amour? La premiere passion vous porte à faire tous les iours quelque nouveau progrez à ioindre au Cardinalat, au premier Ministere, à la Connestablerie, à l'Admirauté, aux Gouuernemens des plus grandes Prouinces & des meilleures places, les tiltres de Duc & Pair, & à chercher des Escriptuains qui vous font descendre de nos Roys, de tous les anciens Princes de France, & passer pour vn Dieu.

L'auarice vous faict entacer finances sur finances, terres sur terres, benefices sur benefices: elle vous pousse à doubler les tailles, & contraindre les pauvres à les payer par auance, pour mettre tout l'or de France dans vos citadeles, qui seront plustost remplies que vostre cœur.

La vengeance vous faict ietter tous les iours quelqu'un dans la Bastille, & dans les autres prisons du Royaume, qui sont plaines de pauvres innocens qui se sont plaints de vostre tyrannie, qui s'y sont opposez, ou qui ont leu quelque escrit qui la descouvroit. Vostre rage a esté si grande, qu'elle n'a point espargné ceux qui ont esté enuoyez de la part de la Royne Mere du Roy pour apprendre des nouvelles de la santé de sa Maiesté : vous avez contre le droict des Gens emprisonné le Sr de la Barre, & avez traicté plus indignement vn Gentilhomme, que le plus cruel ennemy de la France n'auroit faict vn Tambour ou vn Trompette, qui seroit allé pour demander vn prisonnier de guerre. Cette furieuse passion vous a faict chercher tous les moyens pour faire mettre sur vne roüe deux hommes, comme criminels de leze Maiesté au premier chef, dans les procez desquels les iuges, que vous avez choisi, n'ont rien trouué qui meritaist la mort.

Je ne parleray point de vos amours, qui nous font croire que vous estes entre les mains de vostre

stre dernier Maistre , & esperer que celuy là deliurera la France , & tous les gens de bien que vous persecutez : c'est l'escueil où ceux qui ont esté plus sages que vous ont faict desbris ; c'est le banc, où les vaisseaux des plus grandes fortunes se sont eschoüez, & c'est le feu qui a brulé les plus riches & les plus grandes maisons. Le desir que nous auons de sauuer vostre ame , faict que nous vous descouurons charitablement ces dangers ; que nous vous deurions cacher , si nous estions portez à poursuiure vostre perte plustost que vostre conuersion . Vous aurez de la peine, lors que vous ne penserez qu'au mal que vous auez faict, de vous persuader qu'il y aye au monde vne misericorde plus grande que vostre peché : & si la Clemence de la Royne Mere , qui est celle que vous auez le plus cruellement offensé, ne vous assure, ie crains que les maux que vous adiousterez à ceux que vous auez desia faicts , ne soient des effects de vostre desespoir. Souuenez vous , que ce mauuais conseiller peut pouffer vostre puissance à la ruine de ceux que vous n'aymez pas ; mais sans faute vous y trouuerez

uerez la vostre. Les presens que le monde vous faict, sont des pommes d'or qu'il iette deuant vos pieds, pour vous attraper & poignarder : les personnes que vostre cholere poursuit, sont des coureurs qui vous conduisent dans vne embuscade. La belle statuë de Fenele vous presente le riche globe de l'Empire du monde; mais si vous y touchez, il en sortira vn traict qui vous percera le cœur.

Arrestez le cours de vos desseins, & ne donnez point cette gloire à ceux qui peuuent estre instrumens des iugemens de Dieu de les auoir rompus, ou à la mort de les auoir etouffez. Tout ce que vous possédez en honneurs & en biens, vous a peu tirer de la bassesse & de la pauureté; mais il ne vous scauroit oster ny la fragilité, ny la mortalité: vous auez les bonnes graces d'un grand Roy, & le trompez; mais vous ne pouuez auoir la vie qu'avec ces conditions, ne tromperez point celuy qui vous l'a donnée, & qui est sur le poinct de la vous demander, avec le compte de vos actions. Regardez entre les mains de qui tombera ce que vous auez ramassé, & entre les mains

Sap. 6.

de qui vous tomberez. Craignez celuy qui mes-
 prise vos citadeles, & vos gardes; & qui a dict
 que *les puissans seront punis puissamment*. Donnez
 vous la paix, & nous la procurez; elle s'accorde-
 ra mieux avec la plus belle de vos qualitez, que
 la guerre que vous mettez par tout. Ne vous ima-
 ginez pas qu'elle puisse estre eternelle, pour vous
 fournir le moyen de regner tousiours parmy les
 confusions, dans lesquelles vous perirez plustost
 que dans l'ordre, qui vous conseruera avec l'E-
 stat. Vostre fortune est de verre, encore que vous
 la croyez de diamant parce qu'elle est fort riche.
 Comment pourroit elle estre de longue durée,
 veu que vostre vie ne l'est pas, & qu'elle est vio-
 lente? Reconnoissez que vous estes aujourdhuy
 Maistre de la liberté de cent millions de person-
 nes, & pouuez estre demain le prisonnier d'un
 chetif guichetier. On monte par plusieurs eschel-
 lons au plus haut de l'eschelle de Pittacus; mais
 il n'y a qu'un faut à faire depuis le sommet ius-
 ques au pied. La bonté de Dieu est sur le point
 d'estre contentée de la patience de ceux que vous
 affligez, & sa Iustice n'est pas esloignée de vostre
 info-

insolence : son Iugement ne sçauroit estre arresté par le vostre , & vostre bel esprit ne peut persuader que vous ne l'ayez prouoqué.

Si V. E. ne reçoit pas nostre charitable Remonstration, la reiette avec indignation , & employe tous les moyens que sa grande puissance luy fournit , pour nous faire du mal ; nous déclarons, que vous nous auez attiré au combat, & que vous auez faict si grande quantité de libelles diffamatoires, que nous auons esté contraincts de mettre la responce à quatre, dans vn mesme traicté. Si vous vous plaignez de nostre hardiesse, nous vous supplions de nous dire, sur quel droit vous fondez la licence de mesdire de la plus grande & meilleure Roynede la terre, de la Mere de vostre Maistre, & de vostre Bienfaitrice, de Monsieur Frere vnique du Roy, vous qui estes seruiteur, & tres-obligé : sur quelle loy vous appuyez les despits & les rages que vous auez conceu contre nos responses ; & pour quelle raison vous taschez de ruiner ceux que vous presomez en estre les auteurs. Si vous estes fasché de voir des pauvres argolets qui vous attaquent, vous

en auez des plus chetifs qui les irritent. Mais on se prend à vous qui estes Cardinal, & Generalissime: vous ne pouuez entrer en la meslée, que ceux qui sont du party contraire n'ayent droict de se defendre contre vous, comme on feroit contre le moindre de vostre armée, sur tout en vn combat d'honneur. Cela vous doit faire cognoistre vostre imprudence d'auoir escrit tant de liurets, pour nous obliger à repartir aux despens de vostre reputation. Si vous & vos Escriuains la mesnagez mieux pour l'aduenir, & si vous espargnez la nostre, nous demeurerons dans le silence, & dans l'esperance: si vous nous contraignez de rompre celuy là, vous en aurez fort peu de consolation; & si vous forcez cette cy, nous prierons, soupirerons, regarderons le Ciel, & croirons fermement, que Dieu tout seul aura la gloire de vostre chastiment, & de nostre deliurance.

F I N.

